

ኢዮቤ ማጻፋ ጊደ ቆፋ

ኢዮቤ ማጻፋን ኑኒ ቤኢዛ ታሪኬይ ዋልቃማ ሜቶይኔ ቆሆይ ኢዛ ቦላ ጋኪዳ ኢሲ ሱሬ ኣሳ ገሻሰ ቆንጨሲሰ፡፡ ሄ ኣዴዚካ ባ ናይታኔ ባ ሃሮ ኡባፌ ሜላ ኣቶይሳፌካ ቦላራ ኢታ ማዲንሐ ማዲንጺዲ ዋዩቴሰ፤ ሄሳፌ ጉዬ ጊንጾ ማላን ሄቩቶ ሸቂዳ ሃሳያን ኢዮቤኔ ኢዛ ላጌቲ ሃ ኢታ ዋዩሲዛ ሜቶዛን ባሰ ሴቴቲዛ ዮኦዛ ቆንጨሲቴሰ፤ ወርሴፋንካ ጸሲ ኢዮቤሰ ቆንጨሲዴሰ፡፡

ኢዮቤ ላጌቲ ኢዛ ቦላ ጋኪዳ ዋዩዛ ገሻሰ ካሴ ባንቲ ኤሪዛ ሃይማኖቴ ዋጋፔ ዴንዲዲ ባንታሰ ዲዛ ዴማ ዴማ ቆፋ ሺሼቴሰ፤ ሄሲካ፡ «ጸሲ ኪያ፤ ኣሳሰ ሎኦ ዋጋ ኣሜሰ፤ ኢታ ኣሰ ጊዲኮ ቃጸዬሰ» ጌቴሰ፡፡ «ሄሳፉካ ኢዮቤ ሃ ኡባ ሜቶይ ጋኪዳይ ኢዚ ናጋራ ኦሊዳ ገሻሰ ጊደንታ ኣጌና» ጌቴሰ፡፡ ኢዮቤ ጊዲኮ ኢዛ ቦላ ዋሶይ ባይንዳዴኔ ሱሬ ኣሰ ጊዲዳ ገሻሰ ሃይሳ ማላ ዋልቃማ ቂጻቴይ ኢዛሰ ቤሴና፡፡ ኢዮቤ ማላ ሱሬ ኣሳ ቦላ ሃይሳ ማላ ዋልቃማ ሜቶይ ጋኪዳይሲ ቢርሼቶንታ ማሌሶ ጊዲዴሰ፡፡ ሃ ኡባ ሜቶዛን ኢዮቤ ኣማኖይ ያኔ ሃ ቃጸንታ ኣጊኮካ ቱማ ፒርዲዛ ጸሳይ ሊኬ ፒርዳ ኢዛሰ ኢሚዲ ኢዛ ጋኪዳ ሜቶዛፔ ኬሳና ማላኔ ካሴ ዴኦዛ ኢዛሰ ዛራና ማላ ጸሳ ሚኒዲ ዋሳፔኔ ኦይሾፔ ጉዬ ጊቤና፡፡

ጸሲ ኢዮቤ ኢዛ ኦይቺዳ ኦይሻታሰ ዛሮ ማራራ ማራራ ኢሞንታ ኣጊኮካ ኢዮቤሰ ዲዛ ሚኖ ኣማኖዛ ናሺዲ ጸሲ ባ ዋልቃኔ ባ ኤራቴፋ ማላሊሲዛ ኦጌራ ጊንጾን ኢዛሰ ቆንጨሲዴሰ፡፡ ሄሳፌ ጉዬ ኢዮቤ ጸሲ ባይራኔ ኤራ ጊዲዳይሳ ሻኪ ኤሪዴሰ፡፡ ጸሳ ጸሳቴፋ ሻኪ ኤሪዳፔ ጉዬ ካሴ ኢዚ ሃንቆን ኩሚዲ ኬሲዳ ዴጾ ቃላታ ገሻሰ ዬላቲዲ ማርቴፋን ጌሊዴሰ፡፡

ማጻፋሰ ወርሴፋ ሸምፖይ ኢዮቤ ባና ጋኪዳ ሜቶዛፔ ዛሮ ዴሚዲ ካሴ ዴኦዛን ሲሚዳይሳኔ ቃሴካ ሃሮ ባጋራ ካሴይሳፌ ሃ ኣጵ ዴሚዳይሳ ቆንጨሲሰ፡፡ ሃራ ባጋራ ቃሴ ኢዮቤ ቦላ ጋኪዳ ሜቶይ ኣይ ጋሶን ኢዛ ቦላ ጋኪዳኮን ኢዮቤ ላጌታሰ ጌሎንታ ገሻሰ ጸሳይ ኢሰታ ሚንሒ ሴሪዴሰ፡፡

ሎሴ ጊዲዳ ዴማ ዴማ ሃይማኖቴ ዋጋታፔ ጸሲ ባ ባጋራ ባይራ ጊዲዳይሳ ኢዮቤ ጸላላ ኤሪዳ ገሻሰ ባ ላጌታ ገሻሰ

ዋሲዳስ፤ ጸሲካ ኢዛ ዋሳ ሲደዳስ። ጸሲ ኢዮቤስ ወርሱላ ዳኦዛ ኮይሮይሳፊ ኣሊ ሎኤሊዳስ።

ሃ ማጻፋይ ኦይኪዳ ኩሜላ ቆፋ

ኢዮቤ ጋኪዳ ሜቶታ 1:1—2:13

ኢዮቤ ባ ዬሌታ ጋላሳ ቃንጊዳስ 3:1-26

ኮይሮ ዩሾ ሃሳያ 4:1—14:22

ናምኣንሉ ዩሾ ሃሳያ 15:1—21:34

ሄዝንሉ ዩሾ ሃሳያ 22:1—26:14

ኢዮቤስ ወርሱላ ሃሳያ 27:1—31:40

ኤሊሁ ሃሳያ 32:1—37:24

ጸሲ ኮይሮ ዩሾ ሃሳይዳ ሃሳያ 38:1—39:30

ናምኣንሉ ዩሾ ጸሳ ሃሳያኔ ኢዮቤ ዛሮ 40:1—42:6

ጸሲ ኢዮቤስ ዛሮ ኢሚዲ ኣንጂዳስ 42:7-17

ኢዮቤ ቦላ ጋኪዳ ፓጩ

¹ ኡጼ ጌቲቲዛ ዳሬን ኢሲ ኢዮቤ ጌቲቲዛ ኣሲ ዳስ። ኢዚካ ኢታ ኡባፊ ሃኪዳዳ፤ ዋሶይ ኢዛ ቦላ ባይንዳዳ፤ ጸሳስ ያዩዛዴኔ ሱሬ ኣሳ።

² ኢዛስ ላፑን ኣቱማ ናይቲኔ ሄዝ ማጫ ናይቲ ዳቲስ።

³ ሃሮ ባጋራካ ኢዛስ 7,000 ዶርሳቲ፤ 3,000 ጋሜላቲ፤ 500 ዋላ ቦራቲኔ 500 ሃሬቲ ዳቲስ፤ ቃሴካ ኬሂ ዳሮ ኣይሌቲ ዳቲስ። ኣርሼይ ሞኪዛሶ ባጋራ ኢዛ ማላ ዱሬኔ ጌታ ኣሲ ሃራይ ዳና።

⁴ ኢዮቤ ኣቱማ ናይቲ ኢሶይ ኢሶይ ባሶን ታራን ታራን ዲጊሳ ገግሲዲ ኢሲፊ ሺቂ ኡፋዬቲቲስ፤ ሄዝ ሚቹታካ ባንታኮ ጴይጊሲዲ ኢስታራ ኢሲፊ ሜቲሲኔ ኡዬቲስ።

⁵ ዲጊሳ ጋላሳቲ ኣፂዳፔ ጉዬ ኢዮቤ ዋንታራ ዳንዲዲ ባ ናይታ ጴይጊሲዲኔ ኢሳ ኢሳ ሱንሳን ያርሾ ሺሽስ። ኢዚ ሄሳሉ ኣሊዛይ፤ «ታ ናይቲ ጌሊ ጊዳ ጸሳ ጫዩዲ ኣዉኮራ ናጋራ ኦሊዳኮኔ!» ጉሳ ሂርጋን ናይታ ናጋራፔ ጌሻናስ ጊዲ ኦሌስ። ኢዮቤ ሃይሳ ያርሾ ዋጋ ቃንጸንታ ኡባ ዋዴ ኦሌስ።

⁶ ጋላሳታፔ ኢሲ ጋላስ ሳሎ ኪታንቻቲ ጎዳ ሲንሐ ሺቂዳ ዋዴ ጸላኤይካ ኢስታራ ኢሲፊ ሺቂዳስ።

⁷ ጸሲካ፤ «ኣዋፔ ያዲ?» ጊዲ ጸላኤ ኦይቹዳስ። ጸላኤይካ፤ «ሳኣ ጋጸ ኡባ ያኔ ሃ ዩዬሬታዳ ያዲስ» ጊዲ ጎዳስ ዛሬዳስ።

8 ጎዳይ ጸላኤዛ፡ «ታ ኣይሌዛ ኢዮቤ ሎኤፋ ቤያዲ? ኢዛ ማላ ኣማኔቲዳኔ ሱሬ ኣሰ ቢታ ቦላ ቤቲቤና፤ ኢዚ ኢታ ኡባፌ ሃኪዲ ታሰ ያዪዛ ሱሬ ኣሳ» ጊዴሰ።

9 ጸላኤይካ ዛሪዲ፡ «ኢዮቤ ኔሰ ጸሳሰ ጮ ያዪዜ?

10 ኢዚ ኔሰ ያዪዛይ ኔኒ ኢዛኔ ኢዛ ናይታ፡ ኢዛሰ ዲዛ ሃሮ ኡባ ሎኤፋ ናጊዳ ጊሻሳ፤ ኢዚ ኦፊዛ ኦሶዛ ኩሜል ኣንጂዳ ጊሻሲኔ ዳሮ ዉዴ ሜሄታ ኔ ኢዛሰ ኣሚዳ ጊሻሰ ጊዴኔ?

11 ኣኔ ኔ ኩሼ ዬዳዳ ኢዛሰ ዲዛይሳ ኡባ ኔ ጳይሲዳኮ ቱማ ኢዚ ኔና ቆንጨኝ ጫያና» ጊዴሰ።

12 ጎዳይካ ጸላኤሰ፡ «ኤሮ ኣኔ ኢዮቤ ቦላ ኢሲ ሜቶካ ጋሶፋ ኣቲን ኢዛሰ ዲዛ ሃሮዛ ቦላ ኔ ኮዪዳዚ ኦፋናዉ ዳንዳያሳ» ጊዴሰ። ሃሳፌ ጉዬ ጸላኤይ ጸሳ ሲንፋፌ ከኢዲ ቢዴሰ።

ኢዮቤ ናይታ ሃይቆኔ ኢዛ ሃሮ ጳዮ

13 ጋላሳታፔ ኢሲ ጋላሰ ኢዮቤ ናይቲ ባይራ ኢሻሶን ዉሪ ሸቂዲ ሚዲኔ ዎይኔ ጫጃ ኡዪዲ ኡፋዬቲቲሰ።

14 ሄ ጋላሰ ኢሶይ ከቲቲ ዪዲ፡ «ኑኒ ቦሪታ ዋጺዲ ጎዪሺን፤ ሃሪቲካ ኑ ማታ ዴምባን ሄሜቲሺን፡

15 ሳባ ዴሬ ኣሳቲ ዪዲ ኑ ቦላ ኦላ ዴንፊዲ ኡባካ ዲኢ ኤኪ ቢዳ፤ ኔ ኣይሌታ ኡባታካ ማሻን ዎጲዳ፤ ታኒ ጸላላ ኣታዳ ሃኒዳ ኡባ ኔሰ ዮታናሰ ያዲሰ» ጊዴሰ።

16 ኮይሮ ኪታንቻይ ባ ሃሳይዛ ሃሳያ ቡሮ ኦንጎንታ ዲሺን ናምኣንፋ ኪታንቻይ ዪዲ፡ «ዶርሳታኔ ሄሚዛ ሄንፋንቻ ኡባ ዎልቃንፋ ሳሎፔ ዎጲዲ ዎጲዴሰ፤ ታኒ ጸላ ኣታዳ ሃኒዳ ኡባ ኔሰ ዮታናሰ ያዲሰ» ጊዴሰ።

17 ሃይሳ ኪታንቻይ ሃሳዪ ኦንጎንታ ሃራ ኪታንቻይ ዪዲ፡ «ሄዙ ቡቲን ሻኬቲዳ ቦንቁዛ ካላዳዌ ኣሳቲ ዪዲ ቆፖንታ ዲሺን ኑ ቦላ ኢታ ሜቶ ጋሊዳ፤ ጋሜላታ ኡባ ዲኢ ኤፊቲዳ፤ ኔ ኣይሌታ ኡባ ማሻን ዎጲዳ፤ ታኒ ጸላ ኣታዳ ሃኒዳ ሚሽ ኡባ ኔሰ ዮታናሰ ያዲሰ» ጊዴሰ።

18 ሃይሳ ሃ ኪታንቻይ ሃሳዪ ኦንጎንታ ሃራ ኪታንቻይ ዪዲ፡ «ኔ ናይቲ ኡባቲካ ባንታሰ ባይራ ኢሻሶን ሸቂዲ ሚሼኔ ዎይኔ ጫጃ ኡዪሼ ኡፋዬቲዛ።

19 ባዘፌ ዪዳ ጎቲ ጫርኮይ ቆፖንታ ዲሺን ዪዲ ከፋ ኩሜል ሸሬቺ ዬጊዴሰ፤ ከፋዚካ ኢሰታ ቦላ ዎጲን ዉሪካ ሃይቂዳ፤ ታኒ ጸላ ኣታዳ ሃኒዳ ሚሽ ኡባ ኔሰ ዮታናሰ ያዲሰ» ጊዴሰ።

20 ሄሳፌ ጉዬ ኢዮቤ ዳንዲዲ ካዮተዲ ባ ማይኦዛ ዳኪዳስ፤ ባ ሁኔ ቡሉሲዳስ፤ ቢታን ጉፋኒ ጎይኒዳስ።

21 «ታኒ ታ ኣዬይ ኡሎፔ ካሎ ዩሌታዲስ፤ ሃይቂዛ ዎዳካ ካሎ ባና፤ ጎዳይ ኢሚዳስ፤ ጎዳይ ኤኪዳስ፤ ጎዳ ሱንፊ ጋላቴተዳዝ ጊደ» ጊደስ።

22 ሃ ፓጩይ ኡባይ ኢዮቤ ቦላ ጋኪንካ ኢዚ ኡባካ ናጋራ ኦሊቤና፤ ጸሳ ቦላካ ጫሞ ቃላ ኬሲቤና።

2

ቃሴካ ኢዮቤ ጋኪዳ ፓጩ

1 ጋላሳታፔ ኢሲ ጋላስ ሳሎ ኪታንቻቲ ጸሳ ሲንሐ ሺቂዛ ዎዳ ዳላኤይካ ኢስታራ ኢሲፌ ሺቂዳስ።

2 ጎዳይካ፡ «ኣዋፔ ያዲ?» ጊዲ ዳላኤ ኦይቹዳስ። ዳላኤይካ፡ «ቢታ ኡባ ቦላ ያኔ ሃ ሲሜሬታዳ ያዲስ» ጊደስ።

3 ጎዳይካ ዳላኤ፡ «ታ ኣይሌዛ ኢዮቤ ሎኤፋ ቤያዲ? ኢዛ ማላ ኣማኔቲዳይኔ ኪያ ኣስ ቢታ ቦላ ቤቴና፤ ኢዚ ኢታ ኡባፌ ሃኪዲ ታስ ያዩዛ ሱሬ ኣሳ፤ ኢዛ ጳይሳናስ ኔ ዳንዳያና ማላ ታ ኔስ ኣፋ ኢማና ማላ ኔ ታና ዳንፊሊዳይ ሃዳና። ቤያ ኢዮቤ ጊዲኮ ሃኖ ጋካናስ ባ ሱሬቴፋን ሚኒ ኤቂዳስ» ጊደስ።

4 ዳላኤይካ፡ «ጋልባ ጊሻስ ጋልባ»* ጊዛይሳ ማላ «ኣሲ ባ ኣሾ ኣሻናስ ጊሼ ባስ ዲዛይሳ ኡባ ኢሚስ።

5 ሃኢ ጊዲኮ ኔ ኩሼ ኢዛ ቦላ ሚጫዳ ኢዛስ ኩሜፋ ኣሳቴፋ ቦላ ቆሆ ኔ ጋሊዳኮ ቱማ ኔና ቆንጩራ ጫያና» ጊደስ።

6 ጎዳይካ ዳላኤዛ፡ «ኣኔ ሎኦ፤ ዎጶ ዎጶፓ ኣቲን ኢዛ ቦላ ኔ ኮዩዳይሳ ኦፋናስ ዳንዳያሳ» ጊደስ።

7 ሄሳፌ ጉዬ ዳላኤይ ጸሳ ሲንፋፌ ኬኢዲ ኢዮቤስ ሁኔ ቢናናፔ ዶሚዲ ቶሆ ጸጉንሐ ጋካናፒ ዎልቃማ ማዲንፋን ዎዩታና ማላ ኦሊዳስ።

8 ሄሳፌ ዳንዲዳይሳን ኢዮቤ ቢዲንፋ ቦላ ኡቲዲ ባ ማዲንፋ ኮንኣን ቃቾ ዶሚዳስ።

9 ኢዮቤስ ማቹያ፡ «ሃኢካ ጸሳ ቦላ ዲዛ ኔ ኣማኖዚ ሚኖ ዲዜ? ጸሳ ጫያዳ ሃይቃ!» ጋዲስ።

10 ኢዮቤካ፡ «ዋናዳ ኤያ ማጫሳ ሃሳያ ሃሳያይ? ጸሲ ሎኦ ሚሽ ኢሚዛ ዎዳ ኡፋይሳን ኤኮስ፤ ሃኢ ጊዲኮ ኢታ ኢዚ ኦ ቦላ ኤሂሺን ኢዛ ቦላ ዙዙማናስ ቤሲዜ?» ጊደስ። ኢዮቤ ሃ

* 2:4 ጋልባ ጊሻስ ጋልባ ጊዛይሲ ታልኤ ዎይኮ ኩሼ ዛና ጊዲዳይሳ ቆንጪሴስ።

ኡባ ሜቶይኔ ዋዬይ ኢዛ ቦላ ጋኪንካ ኢዚ ጸሳ ቦላ ኢታ ሚሽ ሃሳይዲ ናጋራ ኦሊቤና።

ኢዮቤ ላጌ ሄዛታ

11 ቲማኔ ዳሬ ኣሰ ኤልፋዜ፥ ሹሃ ዳሬ ኣሰ ቤሊዳዲኔ ናኢማኔ ዳሬ ኣሰ ዘፋሬ ጌቲቲዛ ሄዙ ላጌቲ ኢዮቤስ ዳቲስ። ኢስቲካ ኢዮቤ ቦላ ጋኪዳ ሚቶዛ ሰዪዳ ዋዴ ኢዛሰ ኢስቲ ቃጴቶይሳ ቆንጪሳናሲኔ ኢዛ ሚንፊላናሰ ባንታ ዳሬፔ ጸይጌቲዲ ኢሲፊ ኢዮቤኮ ዪዳ።

12 ቡሮ ሃኮራ ዪሺን ኢዮቤ ቤኢዳ፤ ጊዶ ኣቲን ኢዚ ኢዮቤ ጊዲዳይሳ ሻኪ ኤራናሰ ዳንዳይቤቴና። ኢስታሰ ዋዚናይ ሜቂን ኢዛሰ ሚሽቲዲ ባንታ ማይኦዛ ዳኪዳ፤ ጉዲላዛ ኤኪዲ ፑዴ ሳሎ ላሊዳ፤ ባንታ ሁኤንካ ማኪዲ ኣዳፊ ዋሲዲ ዬሆ ዶሚዳ።

13 ኢዛሰ ዋዬዛ ዳራ ቤኢዳ ጊሻሰ ኣይኮ ሃሳዮንታ ኢዛራ ላፑን ጋላሳኔ ላፑን ኦማርሰ ቢታ ቦላ ኡቲዲ ጋምኢዳ።

3

ኢዮቤ ባ ዬሌቲዳ ጋላሰ ቃንጌል

ኢዮቤ ሃሳያ

1 ሃይሳፊ ጉዬ ኢዮቤ ሃሳያ ዶሚዴስ፤ ባ ዬሌቲዳ ጋላሳ፡

2-3 «ታኒ ታ ኣዬይ ኡሎን
ሜጴቲዳ ኦማርሳያኔ
ታኒ ዬሌቲዳ ጋላሳያ
ቃንጌቲዳይታ ጊዴቶ!

4 ሄ ጋላሳይ ጴማን ላሜቶ፤
ሳሎ ጸሳይ ኢዛ ቆፖፎ፤
ፖኦይ ሙሌካ ኢዛን ቤቶፎ።

5 ሻሩማኒኔ ጊርዲ ጊዳ ጴማን
ካሜቲዳይሳ ጊዶ፤
ሻራይ ካሚን ጴማይ
ኢዛ ፖኦ ሚቶ።

6 ሄ ጋላሳ ኦማርሳዮ
ጊርዲ ጊዳ ጴማይ ካሞ፤
ላይላ ጋላሳታራ
ኢሲፊ ታይቤቶፎ፤
ኣጊናታ ቆዳን ጌሊ ቆፊቶፎ።

7 ሄ ጋላሳ ኦማርሳይ
ኣይኮይ ባይንዳዝ ጊዶ፤

- ኡፋይሳ ቃላይካ ኢዛን ሴቴቶፎ።
- 8 ሌዋታኔ* ጌቴቴዛ ዶኣ
 ቃሴፋናሰ ዳንዳይዛይቴ፥
 ጋላሳታ ቃንጊዛይቴ፥
 ሄ ጋላሳዮ ቃንጌቶ።
- 9 ሄ ጋላሳ ኦማርሰ
 ባካሌ ጸለንቴቴ ቆሜቶ፤
 ፖኦ ሂዶታይ ኢዛን ቤቶፎ፤
 ዋንታ ጸልቄይ ኢዛን ጸልቆፎ።
- 10 ታ ኣይፌታፔ ሜቶ ጌንፋና፥
 ታ ኣዬይ ኡሎ ታ ቦላ
 ጎርዶንታ ኣጊዳ ጊሻሰ
 ሄ ጋላሳይ ቃንጌቴዳይሳ ጊዶ።
- 11 «ታ ኣዬይ ኡሎን ዳሼ
 ሃሌ ጊዳ ኣተዳኮ ኣዜ!
 ታ ኣዬይ ኡሎፔ ኬኢዳ ማላ
 ኣይሰ ሃይቃቤኪና?
- 12 ጉልባቴቴ ታና ሞኪ ኤካናሰ፥
 ቋንፋቴካ ታና ቋንፋናሰ
 ኣይሰ ቤቴዶ?
- 13 ሃኢ ታኒ ሳርን ኢቺዳኮ፥
 ቋሰካዳካ ሼምፖ
 ዴማናኮሺን።
- 14 ሃኢ ላሌቴ ቤቴዛይታ
 ባሰ ኬጺዳ ቢታ ካዋታራኔ
 ዘሪዛይታራ ታ ቋሰካዳ
 ሼምፖ ዴማናኮሺን።
- 15 ባ ኬፋ ዋርቃኒኔ
 ቢራን ኩንሊዳ፤
 ዳናታራ ታ ኢሲፌ
 ሼምፓናኮሺን።
- 16 ቃሴካ ኣይሰ ቢታ ጋርሳን
 ሞጌቴዳ ኣጩጫያ፥
 ዋይኮ ኢሲ ጋላሳ ፖኦ
 ሙሌካ ቤኦንታ ና ማላ

* 3:8 ሌዋታኔ ጌቴቴዛይሲ ቤኒ ዋዴን ሃይላሾ ሚሳቲዛ ጊታ ዶኣኮ።

3:9 ኤር

- እይሰ ጊዳቤኪና?
 17 ሄን ኢታታ ዋዪሶይ ኣታና፤
 ዳቡርሲዛ ኦሶን
 ዴኢዳይቲ ሼምፓና።
 18 ቃሼቲ ዲዛ ኣሳቲካ ሳሮ ዴማና፤
 ሳና ኦሲሲዛ ኣሳታ ሃንቆ ቃላ
 ሲያናይሳፊካ ኣታና።
 19 ላፋቲኔ ጊታ ኣሳቲ
 ኢሲፌ ቤታና፤
 ኣይሌቲካ ሄን
 ባ ጎዳታፔ ዋዜታና።
 20 «ጸሲ ኡንኦ ቦላ ዲዛይታሰ ፖኦ፥
 ዲሳዚ ጫሞ ቆፋን ኩሚዳዴሰ
 ዴኦ ኣይሰ ኢሚዜ?
 21 ሃይቆ ላሞቲዛይታሲኔ
 ቆቴቲ ዲዛ ኣቆፔ
 ኣሊ ኮዪዲ ዴሞንታይታሰ
 ዴኦ ኣይሰ ኢሚዜ?
 22 ዲጌ ዲፎን ጌሊሼ ኡፋዬቲዛይታሰ
 ዴኦይ ኣይሰ ኢሚቲዜ?
 23 ኢዚ ቢዛ ኦጌይ
 ኢዛዴፌ ጌሚቲዳዴሲኔ
 ጸሲ ጎርዲ ዋሊዳ ኣሳሰ
 ፖኦይ ኣይሰ ኢሚቲዜ?
 24 ዬሆይ ታሰ ካሐ ጊዲዴሰ፤
 ዋሶይካ ታሰ
 ጎጊዛ ሃላ ማላ ጊዲዴሰ።
 25 ታ ያዪዳ ሚሽ ታ ቦላ ዪዴሰ፤
 ታ ዳጋሚዳይሲካ
 ታ ቦላ ጋኪዴሰ።
 26 ታ ጊዶን ሂርጋይ ጸላ ዲዛ ጊሻሰ
 ሳሮይ፥ ዋፓይኔ
 ሼምፖይ ዴና» ጊ ቃንጊዴሰ።

4

ኤልፋዜይ ኮይሮ ሃሳይዳ ሃሳያ

- 1 ቲማኔ ዳሬ አስ ኤልፋዜይ ሂዘጊ ዛሬደስ፤
- 2 «ኢዮቤ! ኢሲ አሲ ኔ ቦላ
 ዋልቃሊ ሃሳይኮ
 ኢዛዳ ኔ ዳንዳያን ኤዘጋኔ?
 ሃሳያናፔ አቲን
 ኦኒ አጋኔ?
- 3 ኔኒ ዳሮ አሳታ ታማርሳዳሳ፤
 ዳቡርዳ ቄሴታካ ሚንፋዳሳ።
- 4 ካሴ ኔ ቃላቲ ቆጵቲዛይታ
 ማዴቲስኮሺን፤
 ኔኒ ኮኮሪዛ ጉልባቲታካ
 ሚንፋሳኮሺን።
- 5 ሃኢ ጊዲኮ ሜቶይ
 ኔ ቦላ ጋኪዳ ጊሻስ
 ሂዶታይ ባይንዳዴ ጊዳዳሳ፤
 ሜቶይካ ኔ ቦላ
 ሚኒዳ ጊሻስ
 ሂዶታ ቃንጸዳሳ።
- 6 ጸሳስ ኔ ያዪዛ ያሻይ
 አማንሴዛዝ ጊዴኔ?
 ኔ ሱሬ ኦጌቲካ
 ኔስ ሂዶታታ ዴቴኔ?
- 7 ጸሎ አስ ጊዲ ዲሺን
 ኢዛ ሜቶይ ጋኪዳዴይ፥
 ሱሬ አስ ጊዲ ዲሺ
 ቲሞኢ ጊ ጳይዳዴይ፥
 ዲኮ ኣኔ ቆፓ።
- 8 ታኒ አኬኪዳ ማለ፥
 ኢታቲሰ ጎዪዲ ሜቶ ዜሪዛይቲ
 ሂይታንቲ ባ ኦሶሮ
 ሺሻና።
- 9 ኢስቲ ጸሳ ፔሮን ጳያና፤
 ኢዛ ሃንቆ ዳሞባላን
 ኢስቲ ዲፒ ጊ ጳያና።
- 10 ኢታቲ ጋሞ ማላ ጸጋና፤
 ባ ቃላ ቶቄ ኦሴዲ
 ዋሳና፤
 ጸሲ ጊዲኮ ኢስታስ

- እቻ ሜንጩልላና።
- 11 ጋሞይ ሻንካቲዲ
ሚዛዝ ጳይዳ ዋዴ
ሃይቂዛ ማላ ኢስቲካ ሃይቃና፤
ጋሞ ማራቲካ ላሌቲዛ ማላ
ኢስታ ናይቲካ ላሌታና፤
- 12 ጋላሳፌ ኢሲ ጋላስ ጸራ ጊዲዳ
ኪታይ ታኮ ዪዴስ፤
ሄሳ ሄ ኪታዛ ሳሱኬላን
ታ ሲያዲስ።
- 13 አሳይ ኦማርስ ዋልቃማ ዲስኮ
ሴሪዳ ዋዴ፥
ታና ኢታ አጉሞይ አጉንጢዴስ።
- 14 ባቦይኔ ኮኮርሲ ታና ኦይኪን፥
ታስ ሜቄላቲ ኡባይ
ኮኮራና ማላ ኦሊዴስ።
- 15 አያናይ ታ ሲንላራ አዲዴስ፤
ዳጋማፔ ዴንዲዳይሳን
ታ ሃሳይ ኤቂዴስ።
- 16 ሄንካ ኢሲ ሚሺ
ኤቂ ዲዛይሳ ቤያዲስ፤
ቲሺ ኦላ ዴላዲስ ሺን
ኢዚ አዛኮ ሻካ
ኤራናዉ ዳንዳያቤኬ።
ሄሳፌ ጉዬ ጮኡ ገዳሶሆፔ
ሂዝጊዛ ቃላ ሲያዲስ፥
- 17 ሩጳ ሲንላን ጸሎ ጊዲ
ቤታናስ ዳንዳይዛ አሲ ዲዜ?
ዋይኮ ባና ሜዲዳይሳ
ሲንላን
ጌሻ አሲ ቤታኔ?
- 18 ጸሲ ባስ ኦሊዛይታን
አማኔቶንታ አጊኮ፥
ባ ኪታንቻታ ቦላካ
ኢዚ ሞሮ ሚሺ
ዴሚዛዝ ጊዲኮ፥
- 19 ሂስቲን ሃራዶይ

- ሞንታ ዲሺን ላሌቲዛ
 ኢስታ ዮቻይ ቢታፌ ጊዲዳ
 ኡርቃፌ ኦሴቲዳ ኬላ ጊዶን
 ዲዛይታ ቦላ
 ዋኒ አማኔታኔ?*
- 20 ማላዶፔኔ አማርሳፌ ጊዶን
 ኢስቲ ሜቄሬታና፤
 ኤሬቶንታ ዲሺን
 ኢስቲ ሜርናሰካ ቆያና።
- 21 ቶሌ ቋሽኬይ
 ሾዴቲቺዳ
 ዱንካኔ ማላ
 ኢስቲ ኤራቴሉ ባይንዳ ሃይቃና።

5

- 1 «እዮቤ! ኔ ጾይጊን
 ኔስ ኮያናዴይ ዲኮ ጾይጋ፤
 ኔስ ማዶ አማና ማላ
 ከታንቻታፔ
 አዋይሳኮ ጾላይ?
- 2 ኤያ አስ ዪሎይ ዋቆና፤
 ቃናቴይካ አስ ቆይሳና።
- 3 ኤያ አሲ ሚኒዲ ዲሺን ቤያዲሰ፤
 ጊዶ አቲን ኢዛ አቆይ
 ቆፖንታ ዲሺን
 ጸሳ ሃንቆን ላሌቲዴሰ።
- 4 ኢዛ ናይቲካ ባ ዴኦዛሰ
 አማንሉዛዝ ዴሜቲና፤
 ዱቡሻንካ ኢስታ ጊሻሰ
 ሃሳይዛ አስ
 ኢስቲ ዴሞንታ ጊሻሰ
 ኢስታ ቦላ ቆሆይ ጋካና።
- 5 ኢዚ ዜሪዳ ካላካ
 ኮሻቲዳ አሳቲ ማና፤
 ሃራይ አቲን አጉንላ ጊዶን
 ሞኪዳይሳካ ኢዛሰ አሼቴና፤

* 4:19 ኦላላ ጌቲቲዛይሲ ኢሲ ኢሲ ባጋ ጋሞላ ቃላን ሃራጾ ጌቲቲስ።

- ሳሜቲ ኡቲዳ አሳቲ
ኢዛ ሃርዛ ኤካናሰ አሞቴቴሰ።
- 6 ሜቶይ ጮ ቢታፌ ዴንዴና፤
ዋዩይካ ጋዴፔ ጮ ኬዜና።
- 7 ታማ ፊንጾሴ ቦንቆፌ ዴንዲዲ
ፑዴ ፊንጸዚ ማላ፤
አሰካ ዋዩሰ ዩሌቴሰ።
- 8 «ታኒ ኔና ጊዲዳኮ
ጸሳ ዋሳና፤
ታ ሜቶ ኡባ ኢዛሰ ቆንጨሳና።
- 9 ኢዚ ቆዳይ ባይንዳ
ማላሊሲዛ ሚሽ፤
ፒልጊን ጋኬቶንታ
ጊታ ሚሽ ኦሌሰ።
- 10 ቢታ ቦላ ኢራ ቡኪሴሰ፤
ሳሻታካ
ሃፋን ሹጊሴሰ።
- 11 ካወዱዳይታ ቦንቾን
ጵቁ ሂሰቴሰ፤
ሙዘቲዛይታ ሚንፍሊዲ
ኡፋይሴሰ።
- 12 ኢሰታ ኦሶይ ፖሌቶንታ ማላ
ጌኔ አሳታ ቆፋ ሃዳ ኦሌሰ።
- 13 ጨንጫታ ኢሰታ ጌኔ ኦሶዛን
ዛሪ ኦይኬሰ።
ጌኔ አሳታ ቆፋካ
ኤሶራ ዳይሴሰ።
- 14 ጋላሳይ ኢሰታሰ ጵማ ጊዴሰ፤
ቡሮ ሴታ ጋላሳን
ኦማርሰ ጵማ ጊዶን ዲዛ ማላ
ኢሰቲ ታታፌታና።
- 15 ማንቆታ ኢሰታ ሞርኬታ
ማሻፌ አሼሰ፤
ሜቶታንቻታካ
ዋዩሲዛይታ ኩሺፔ
ኬሲ ኤኬሰ።

- 16 ማንቆታስ ሂደታ አሜስ፤
ማካላቴሉካ
ቢታ ቦላፌ ቆይሶስ።
- 17 «ጸሲ ሰሪዛ ኣሲ ኣንጃቲዳይሳ፤
ሄሳ ጊሻስ ኡባ ዳንዳይዛ
ጸሳ ሰራ ሌቆፋ።
- 18 ጸሲ ማደንሊኮካ
ዛሪዲ ፓሕስ፤
ኢዚ ሚንሕስ፤
ባ ኩሼን ዛሪዲ ኮሌስ።
- 19 ኡሱፑን ቆሞ ቦሻፔ
ኔና ኣሺ ኤካና፤
ላፑንፋዛንካ ኣይ ቆሆይካ
ኔ ቦላ ጋኬና።
- 20 ኮሻ ላይፋን ኢዚ ኔና
ሼምፖራ ፓጻ ዋፋና፤
ኦላ ላይፋንካ ኢዚ ኔና
ሃይቆፔ ኣሻና።
- 21 ጸሲ ኔና ኢታ
ኢንጻርሳፌ ናጋና፤
ቦሻይ ኔ ቦላ
ዪኮካ ያያካ።
- 22 ዋልቃማታ ቆሆይኔ
ኮሻይ ኔና ዳጋንሐና፤
ቢታ ዶኣታሰካ ኔ ያያካ።
- 23 ኔ ጎዪዛ ጋዴን ኔና
ሹቺ ዋዪሴና፤
ዶኣታራካ ኔ ሳሮን ዳና።
- 24 ኔ ኬፋን ሳሮይ ኩማናይሳ
ኔ ሻካ ኤራና፤
ኔ ሚሄ ጴሊሺን
ኣቆፔ ፓጩና።
- 25 ኔ ዜሬፋይ ዳራናይሳ ኔ ኤራና፤
ኔ ዜሬፋይካ ዴምባን ዲዛ
ማታ ማላ ዳራና።

- 26 ካሏ ካዲዲ ማጽቲዛይሳ ማላ
ኔካ ሎኤሳ ጨማዳ
ዲፎን ባና።
- 27 ኦኒ ሃይሳ ኡባ ፒልጊዲ
ቱሙ ጊዲዲይሳ ኤሪዶስ፤
ኔኒካ አኬካዳ
ሃይሳ ኦሶን ፔይሻ።»

6

ኢዮቤ ሃሳያ

- 1 ሃይሳፌ ጉዬ ኢዮቤ ሂዝጊ ዛሪዶስ፤
- 2 «ታ ሙዘቴሌ ጌዳሪቲ
ኡቲዳኮ አዜ ዲዛይ!
ታ ሜቶይ ኡባይ
ጌዳሪን ጌዳሪቲ ኡቲዳኮ
አዜ ዲዛይ!
- 3 አባ ላንቄን ዲዛ
አጩፔ አጂ
ዴጸናኮሽን፤
ሂሳ ገሻስ ዳንዳያይ ፓጪዳ
ታ ሃሳያይ
ኔና ማላሊሳናስ ቤሴና።
- 4 ኡባ ዳንዳይዛ ጸሳይ
ታና ባ ዪሻታን ጫዲዶስ፤
ኢስታ ማርዜቲካ
ታ አሳቴላ ጊዶን ላሌቲዳ፤
ዳጋንሊዛ ጸሳ ቦሻይ
ታ ዩሾን ዩዩ አጂዶስ።
- 5 ቱማፔ ሃርዲዲይ ጨሊላ ማታ
ዴሚዲ ጫጊ ኤሪዜ?
ቦራይካ ባሶ ማታ ዴሚኮ
ጸጊ ኤሪዜ?
- 6 ማዲኔይ ጌሎንታ ማልኦንታ
ካሏ ሜቲቲዜ?
ጰጰሌ ሃሏ ማልኢዜ?
- 7 ሃይሳ ማላ ካሏ
ማናስ ኮይኬ፤
ሙሲ አቲን ኩሼንካ ቦቺኬ።

- 8 «ታ አሞቲዛይሳ ጸሲ
ታስ ኢሚዳኮ አዜ ዲዛይ!
ኢዚ ታ ዋሶ ሲዪዳኮ
አዜ ዲዛይ!
- 9 ሃይሳ ኡባፌ ኢዛስ ሸኔ ጊዲን
ኢዚ ታና ሜንፌሬላ
ዬጊዛኮ!
ባ ኩሼዛ ዬዲዲ
ኢዚ ታና ጳይሲዳኮ!
- 10 ሸሞፖ አሞንታ ኣይ ሃርጌይ
ታና ሳኪኮካ
ታኒ ኡፋይሳን ጉፓና፤
ታኒ ጌሻዛ ቃላ
ኣይ ዋዴንካ ካዳቤኬ፤
- 11 «ዴኦን ዴኣና ማላ ዳንዲይዛ
ኣይ ሚኖቴላ ታስ ዲዜ?
ሂዶታይ ባይንዳ ኣጊኮ
ኣይሰ ዴኣዚና?
- 12 ታኒ ሹቻ ማላ ሚኖ?
ታ ኣሳቴላይካ
ጸርቂማላሶ ሚኖ?
- 13 ታና ማዳናስ
ታስ ኣይኮ ዋልቃይ ዴና፤
ታስ ዲዛ ዋልቃይ
ኡባይ ኤኬቲቺዴስ።
- 14 «ኡባ ዳንዲይዛ ጸሳስ
ያሽ ኣጊዳዴሲኔ
ዳቡርዳዴሰካ ኢዛ ላጌይ
ኢዛስ ኪያቴላ ቤሳናስ ኮሼስ።
- 15 ታ ኢሻቲ ጊዲኮ ሃርይ ሃርቲ
ዋጲዳፔ ጉዬ ሜሊዛ
ኣማንሶንታ
ሻፋታ ማላ ባሌላዛይታ።
- 16 ሻፋታን ባልጎ ባልጎ
ሻቺ ኩሜስ።
- 17 ቦኔ ኣጊናታን ጊዲኮ

- ማዩ ዳዩስ፤
ሻፋቲካ ሃሊ ባይንዳ
ሚላታ ጊዴቲስ።
- 18 ጫና ሜሄታ ላጊ ኦጌራ ቢዛ
ኣሳቲ ሃላ ኮሻሰ
ኦጌፔ ከኢ ባዞ ቢታ ጌሊዲ
ቶይሉ ቶይሊሼ ዳዩቲስ።
- 19 ቱማ ቢታፌ ቢዛ ማንዳራ ኣሳቲ
ሃሊ ኮዩቲስ፤
ሳባ ዳሬ ዛልኣንቻቲካ
ሃሊ ዳማናስ
ሂዶታ ኦሌቲስ።
- 20 ባንቲ ኣማኔቲ ኡቲዳ ሻፋቲ
ሚሊዳይሳ ቤኢዲ
ሂዶታ ቃንጾቲስ፤
ሃላኮ ጋኪዛ ዋዴ
ዪሎቲቲስ።
- 21 ኢንቲካ ታስ ሃይታ
ሃ ሻፋታ ማላ፤
ታ ቦላ ጋኪዳ ሜቶዛ ቤኢዲ
ጌዴ ጉዬ ባቃቲዴታ።
- 22 ሂሰቲን ታ ኢንቲና ሄሳ ዋይኮ
ሃይሳ ታስ ኢሚቲ፥
ዋይኮ ኢንቲ ሃርዛፔ ከሲዲ
ታና ኣሺቲ ጋዲና?
- 23 ቃሴ ታ ሞርኬታ
ኩሼፔ ታና ኣሺቲ፤
ዋይኮ ታና ዋዪሲዛይታ
ኩሼፔ ታና
ከሲ ኤኪቲ ጋዲና?
- 24 «ታና ታማርሲቲ፤
ታኒካ ጮኡ ጋና፤
ታ ሞርዛካ ታና ቤሲቲ።
- 25 ቱማ ቃላይ
ጫሞ ጊዲኮካ ኤኬቲስ፤
ኢንቲ ዋላሳይ ጊዲኮ
ኣይኮስካ ጎኤና።

- 26 አንቴ ታ ሃሳያ
 ጫርኮ ማላ ቆዴታ፤
 ሂሰቲኮ ሂዶታ ቃንጺዳ ታሰ
 ዛሮ አማናሰ አይሰ ኮዬቲ?
 27 ዪኦ ናይታ ቦላ ሳማ ዬጌታ፤
 አንቴ አንቴ ሲቆ ላጌታ
 ባይዛናሰ ሚሻን
 ማርሼቴቲ?
 28 «አኔ ታና ሃ ጸሊቴ፤
 አንቴ ሲንፋን ታ ዋርዶታዲና?
 29 አንቴሰ ቆሆ ጊዶንታ ማላ ሲሚቴ፥
 ታኒ ሊኬ አሳኮ!
 30 ቱሙካ ታ አንጸርሳን
 ቆሆይ ቤታኔ?
 ታ ዶናይካ ጌኔ ሚሽ
 ሻኪ ኤራናሰ ዳንዳዬኔ?

7

- 1 «አሳሰ ቢታ ዱሳይ ባጼ ዱሰ ዴኔ?
 አሰታሰ ጋላሳይካ
 ኡኔ ኦሊዛ ኦሳንቻታ
 ጋላሳ ማላ ጊዴኔ?
 2 አሰቲካ ኩዋ ጋርሳን ሼምፓናሰ
 አሞቲዛ ኦሳንቻታኔ
 ባ ዳሞዛ ኤካናሰ ናጊዛ
 ኡኔ አሳ ማላ ጊዴቴኔ?
 3 ታ ዳቡርዳ አጊናቲ ታሰ
 ጎአይ ባይንዳይታ ጊዲዳ፤
 ሜቶ ኦማርሳቲካ
 ታሰ ቆፋ ኦማርሰ ጊዲዳ።
 4 አቺዛ ዋዴ አዉዴ
 ዴንዳንዲናሻ ጋዳ ቆፓይሰ፤
 ኦማርሳይካ ጊዲኮ
 ታሰ ጌዴ አዱቄሰ፤
 ታኒካ ዋንታና ጋካናሰ
 ሃ ሄ ሺሬታሼ አቃይሰ።
 5 ታሰ ኩሜላ አሳቴሳይ

- ጉጹኔን ኩሚደሰ፤
 ታስ አሾይካ ማዲንጸ ሳጊደሰ፤
 ታስ ማዲንሳይካ
 ቆቂዲ ኡዛዜሰ።
- 6 ታ ላይላታ ጋላሳቲ
 ዳሳ ሞቄ ጸንጌላፌ
 ኤሶቴቴሰ፤
 ኢሲ ሂደታይ ባይንዳ
 ወርሴሰ ጋኬቴሰ።
- 7 ታ ጎዳዉ! ታ ሺምፖፖ
 ፔኖ ማላ ጊዲዳይሳ ቆፓ፤
 ሃይሳፌ ጉዬ ኡባካ
 ሎኦ ሚሽ ዳሚኬ።
- 8 ሃኢ ታና ቤኢዛይሲ
 ናምኣንሶ ዛሪዲ ቤዬና፤
 ኢዚ ኮይዛ ጊዲኮካ
 ታና ዳማናዉ ዳንዳዬና።
- 9 ሻራይ ላሌቲ ቆይዛይሳ ማላ
 ሃይቂዲ ዱፎን ቢዛ ኣሲ
 ሃ ሲሚዲ ዬና።
- 10 ናምኣንሶ ዛሪዲ
 ባሶ ሲሜና፤
 ኢዛዳ ኤሪዛይቲ ኡባይ
 ኢዛ ባሌታና።
- 11 «ሃይሳፌ ጉዬ ጮኢ ጊኬ!
 ታስ ኣያናይ ጩጩዳይሳፌ
 ዳንዲዳይሳን ታ ሃሳያይሰ፤
 ታ ሺምፖፖ ኢራዬቲዳ
 ጊሻሰ ዙዙማይሰ።
- 12 ሃይሳ ሊኬ ናጌቲዛዳ
 ኔ ታና ኦሒዳይ ታኒ ኣባዬ?
 ዋይኮ ኣባ ጊደን ዲዛ
 ደኣዬ?
- 13 ታ ሂጸይ ታና ሚንሴሴሰ፤
 ታ ኢቺዛሶይ
 ታ ሳኮዛ ባሌሴሰ
 ጋዳ ታ ቆፓዲሰ።

- 14 ኔኒ ጊዲኮ ታና
 እጉሞን ያሸሳሳ፤
 እጇታንካ ዳጋንላሳ።
- 15 ሃይሳ ሜቶይ ዳሪዳ አሳቴላ
 ቶካዳ ዳናፔ
 ታ ጨለታ
 ሃይቃናይሳ ዶራይሰ።
- 16 ሂደታ ቃንጸዲሰ፤
 ዳናሰካ ታ ኮይኬ፤
 ታሰ ላይላይካ
 ቃንሐ ጊዲዳ ጊሻሰ
 ታና አጋጋ።
- 17 «ኔ ሶሆ አማናሲኔ
 ቆጋናሰ አሲ አዜ?
- 18 ዋንታን ዋንታን ፒልጋና ማላ፥
 ዋዴን ዋዴንካ
 ኔ ፓጫና ማላ አሲ አዜ?
- 19 ጨቶ ሚቲዛ
 ጉላ ዋዴካ ታሰ አሚኪ?
- 20 አሳ ካሌቲዛ ጎዳዉ!
 ታኒ ናጋራ አላይሳን
 ኔኒ አይ ቆሄታዲ?
 አይሰ ታ ሰላ ኔ ቶራ ዛራዲ?
 አይሰ ሃይሳ ኬና
 ታ ኔና ዴጸዲና?
- 21 ኡባካ ታ ናጋራ አቶ ጊኪ?
 ታ አሊዛ ቆሆ
 ታፔ ዲጊኪ?
 ታ ዲፎን
 ጌላና ዋዴይ ጋኪዴሰ፤
 ሃይሳፌ ኑዬ ኔ ታና
 ኮዪዳኮካ ታ ቤቲኬ።»

8

ቤሊዳዴ ሃሳያ

1 ሹሃ ዴሬ አሰ ቤሊዳዴ ጌቴቲዛይሲ ሂዝጊዲ ዛሪዴሰ፤

- 2 «ኔ ደናፔ ከኢዛ ቃላቲ
ጎቲ ጫርኮ ማላ፤
አዉዴ ጋካናሰ ሃይሳሉ
ኔ ሃሳያኔ?
- 3 ጸሲ ፒርዳ ሶካሲ ኤሪዜ?
ኡባ ዳንዳይዛ ጸሳይ
ጸሎቴሉ ሶካሲ ኤሪዜ?
- 4 ኔ ናይቲ ጸሳ ቆሂዳ ጊዲኮ፥
ኢሰቲ ባንታ ፒርዳ ኤኪዳ ጉሳ።
- 5 ጊዲኮካ ኔ ጸሳኮ ሲሚኮ፥
ኡባ ዳንዳይዛ
ጸሳ ዋሲኮ፥
6 ሱሬኔ ጌሽ ጊዲኮ
ኢዚ ኤሶቲ ኔሰ ቤሲዛ ሶሆን
ኔና ዛራና።
- 7 ኔ ደመሳይ
ጉሉ ሚሳቲኮካ፥
ኔሰ ፖሎይ ኬሂ ሎኦ ጊዳና።
- 8 «አኔ ካሴ ዩሌታ ኦይቻ፤
ካሴ አዋቲ ጋኪዳሶዛ
ፒልጋ ጸላ።
- 9 ኦ ላይላዚ
ቡሮ ጉሉ ጊዲዳ ጊሻሰ
ኦኒ አይኮካ ኤርኮ፤
ኦ ላይላይካ
ኤሽ ማላ አዲዛዛ።
- 10 ኢሰቲ ኔሰ ታማርሲዛይሲኔ
ኔሰ ዮቲዛይሲ
ባ ኣኬኪዛይሳፊ
ኤኪዲ ጊዴኔ?
- 11 ቱሙካ ጫሬይ ባይንዳሶን
ሻጫ ማታይ ሞኪ ኤሪዜ?
ሃሉ ባይንዳሶን
ማርጮይ ጨሊሊዜ?
- 12 ሃይሲ ሃኖንታ ኣጊኮ ዲጨዲ
ቡቕ ጋካናፔ ሲንላን
ቡሮ ጨሊላን ዲሼ ሜሌሰ።

- 13 ጸሳ ደጊዛ አሳታ
ኡባ ወርሴላይ
ሄሳ ማላ ሃናና፤
ጸሲ ባዋ ጊዛ አሳታ
ሂዶታይ ቃንጾታና።
- 14 አቻሮ ከላ ማላ
ሚሻን አማኔቴቴሰ፤
ኢሰቲ ሂዶታ ኦሊዛ
ሚሺ ዲኮካ
ካወሻራ ጳያና።
- 15 አቻሮ ከላ ቦላ
ኢሰቲ ዜምፒዛ ጊዲኮ
ኢዚ ሚኒ ኤቄና፤
አቻሮ ከላዛ ኢዚ ኦይኪኮ
ዲዴሬቲ ዋቆና።
- 16 ሃላ ካሊዳ ሃሩማይ
ሆኦ ዴሚዲ ዳዬሰ፤
- 17 ጸጸዛ ሹቻ
ሙሄ ጊደን ዬዴሰ፤
ዛላ ዛኣን ጸጾሰ።
- 18 ባ ዲዛሶፔ ሾዴቲዛ ዋዴ
ኢዚ ዲዛሶዚ ኤሬቴና።
- 19 ኢዛ ወርሴላ ሄሳ ማላ ጊዴሰ፤
ሃራ ማታቲ ቢታፌ ዶሌቴሰ።
- 20 «ጸሲ ዋሶይ ባይንዳ
አሳታ ኦሌና፤
ኢታ አሳታ ቄሴ ሚንሴና።
- 21 ሄሳ ጊሻሰ ኔኒካ
ኡፋይሳን ሚጫና ማላኔ
(ኢሊላና) ማላ ኢዚ ኦላና።
- 22 ኔና ኢዲዛ አሳቲ ጊዲኮ
ዬላ ማይኣና፤
ኢታ አሳታ ከሊካ ጳያና።»

9

ኢዮቤ ሃሳያ

- 1 ኢዮቤ ሂዝጊ ዛሪዴሰ፤

- 2 «ኤ! ታኒ ሃይሲ
 ቱሙ ገዲዳይሳ ኤራይሰ፤
 ገዶ አቲን አሲ ጸሳ ሲንፋን
 ዋኒ ጸሎ ገዳናሰ ዳንዳይዜ?
- 3 ኢዛራካ ኦኒ ማርሼታናሰ
 ዳንዳይዜ?
 ኢዚ ኢሲ ሺ ኦይሾታ
 ኦይቺዛ ገዲኮ
 ኢሰታፌ ኢሲኖካ
 ዛራናሰ ዳንዳይዛዴይ ዴና።
- 4 ጸሲ ኤራንቻኔ ዋልቃማ፤
 ኢዛራ ኤቄቲዲ ጸኔቶንታይ?
- 5 አኬኮንታ ዙማታ ኮኮርሳና፤
 ባ ሃንቆዛንካ
 ሺሬቺ ዬጋና።
- 6 ጸሲ ቢታ ዲዛሶፔ ኮኮርሳና፤
 ቢታ ቱሳታካ ቃሴላና።
- 7 አዋ አርሼይ ሞኮንታ ማላ
 ኦላናዉ ዳንዳይሰ፤
 ጸለንቴቲካ
 ፖኢሶንታ ማላ
 ኦላና።
- 8 ኦኒካ ማዶንታ ዲሺን
 ሳሎታ ሚጨዳይ ኢዛ፤
 ኢዚ አባ ዳምባላ ቦላ ሄሜቴሰ።
- 9 ዛርዶ፥ ኦሪዮኒኔ
 ፒሊያዲሴ ጌቴቲዛ ጸለንቴታ፥
 ቃሴካ ዲጌ ባጋራ ዲዛ
 ዳሮ ጸለንቴታ፥
 ሳሎ ቦላ ሜጲ
 ዋሊዳይ ጸሳ።
- 10 ኢዚ ኦሊዛ ማላሊሲዛ ሚሻታ
 ኦኒ ፒልጊዲ
 አኬካናዉ ዳንዳዮኮ፤
 ኢዚ ፖሊዛ ማካላ ሚሻታ
 ኦኒ ቆዳናዉ ዳንዳዮኮ።

- 11 «ጸሲ ታ ማታራ አዲኮካ
ታ ዴሚኬ፤
ሃ ታኮ ሸቂኮካ
ሻካዳ ኤሪኬ።
- 12 ኢዚ ባ ኮዪዳይሳ ኤኪኮ
ኦኒካ ኢዛ ዲጌና፤
(አይሰ ሃይሳፉ ኦላይ?) ጊዲ
ኢዛ ኦይቻናሰ ጸሊዛይ ዴና።
- 13 ጸሳይ ባ ሃንቆዛፔ
ጉዬ ሲሜና፤
ኤራኣቤ ጌቲቲዛ
ኣባ ጊዲ ዶኣታ
ማዲዛይቲካ
ኢዛ ቶሆ ጋርሳን ጉልባታና።
- 14 «ሂሰቲን ታኒ ኢዛሰ ዛሮ
ዋና ኢማና ዴንዳያዚና?
ኢዛራ ማርሼታናሰ
ኣይ ቃላ ታ ዴማኔ?
- 15 ጌሽ ጊዳ ታ ቤቲዳኮካ፤
ታ ቦላ ፒርዲዛዴይ
ታና ማራና ማላ
ዋሳና ኣቲን
ኢዛሰ ዛሮ ኢማናሰ ጸሊኬ።
- 16 ታ ኢዛ ሱንፋ ጴይጊኮ
ኢዚ ዛሮ ታሰ ኢሚዛ ጊዲኮካ
ታ ማጋና ኢዚ ሲያና ጋዳ
ታ ኣማኔቲኬ።
- 17 ኢዚ ታና ጎቱ ጫርኮን ሊቁሳና፤
ኣይኮ ጋሶይካ ባይንዳ
ታሰ ማዲንፋ ሃ ዳርሳና።
- 18 ሼምፖ ታ ዛራና ዋዴይ
ጋካናሰካ
ታሰ ሼምፖ ኢሜና፤
ታ ሼምፖን ዋዬ ኩንፊዴሰ።
- 19 ታሰ ዲዛ ዋልቃን
ታ ኢዛራ ባጾታና ጎንታ ማላ
ዋልቃን ኢዛራ ኤቄቲዲ

- ዳንዳያናይ ዳና፤
 ታ ሞቲታዳ ኢዛ
 ላላና ጎንታ ማላ
 ኢዛ ፒርዲዛ አሳታኮ
 ሺሻናስ
 ዳንዳይዛ አሲ ዳና።
- 20 ታኒ ጌሽኔ ጸሎኮሺን
 ታ ሃሳያይ ታና
 ቆሃንቻ ኬሴስ፤
 ታ ሃሳይዛ ሃሳያቲ ኡባይ
 ታ ቦላ ፒርዴቲስ።
- 21 «አይኮካ ታኒ
 ቦሬይ ባይንዳዴ ጌዲኮካ
 ታ ጌሻስ ቆፒኬ፤
 ታ ሽምፖዮካ ሃራሴታይስ።
- 22 ጸሲ ጸሎዛኔ ቆሃንቻዛካ
 ዳይሲዛ ጌሻስ
 አይኮ ዴማቴሊካ ዳና
 ታ ጌዳይ ሄሳ ጌሻሳ።
- 23 አሲ ኢታ ሜቶን ወርሺን
 ኢዚ ጌሻ አሳ ሜቶ ቂዴስ።
- 24 ቢታይ ኢታ አሳታ ኩሺን
 አዲ አሜቲሺን
 ኢዚ ፒርዲዛ አሳታ አይፌ ጎዜስ፤
 ሃይሳ ኦሊዳይ ጸሳ
 ጌዶንታ አጌኮ ሃራይ ኦኔ?
- 25 «ታ ላይላቲ ዎጺዛይታፔ
 ሃ አዲ ኤሶቴቲስ፤
 አይኮ ኡፋይሲካ
 ታ ዴሞንታ አዴቲስ።
- 26 ኢስቲካ ሶኬ ጌዛይሳፌ ኦሴቲዳ
 ዎጎሎ ማላ ኤሶቴቲስ፤
 ባቂ ኤኪዛ ጎሌ ካፎ ማላ
 ኤሶቴቲስ።
- 27 ታኒ ታ ዙዙንፋ ባላና፤
 ነታ ሲንፋካ ካሬሶ አጋዳ

- እኔ ፖኢሳ ቤሳይሰን ጊኮ፥
 28 ጸሲ ታና ጌሽ ኦሊዲ
 ቆዶንታይሳ ታኒ ኤሪዛ ጊሻሰ
 ሜቶይኔ ዋዬይ
 ታ ቦላ ጋካና ጋዳ ያያይሰ።
- 29 ሂሰቲን ታ ቆሃንቻ
 ጌቲታ ቆዴቲዳ ጊዲኮ
 ታሰ ሃዳ ዳቡራይ ኣዛሴ?
- 30 ታኒ ታ ኣሳቲላ
 ሳሙናን ሜጨዛ ጊዲኮ፥
 ታ ኩሼዛካ
 ኬሃ ጌሽዛ ጊዲኮ፥
- 31 ሃ ኡባ ኦሊንካ
 ኔኒ ዲጌ ኢታ ጨማን ታና ኦላና፤
 ታ ማይኦቲካ ታና ሻቲታና።
- 32 ኢዚ ታ ማላ ኣሰ ጊዶንታ ጊሻሰ፥
 ፒርዲዛ ኣሳታኮ ቢዲ
 ፒርዴቶሰ ጋናፌ ዳንዳይኬ።
- 33 ኑ ቦላ ባ ኩሼዛ
 ጋሊ ዋሊዲ
 ፒርዲ ኦና ሻኪዛ ኣሲ
 ኑ ጊዶን ዲዛኮ፥
- 34 ኢዛ ቲማቲሊ
 ታና ሂርጊሶንታ ማላ
 ጸሲ ባ ጉፌዛ
 ታ ቦላፌ ዴንሊዳኮ፥
- 35 ታኒ ኢዛሰ ያዮንታ
 ሃሳያናኮሺን፤
 ሃኢ ጊዲኮ ታ ዲዛ ሃኖን ዳሼ
 ሃሳያና ዳንዳይኬ።

10

- 1 «ዲሲ ታና ሳሌሊዴሰ፤
 ታ ዴኢዛ ጫሞ ዴኦዛ
 ቆንጮን ሲሳና።
- 2 ታኒ ጸሳ ሂዝጋና፤
 ታ ቦላ ኔሰ ላንጮይ ዲኮ
 ታሰ ቆንጮሳ ኣቲን

- ታ ቦላ ፒርዶፋ!
- 3 ሃይሳ ሊኬ ኔ ታና ሜቶሶይሲ
ኔስ ዋጋ?
ኔኒ ኔርካ ሜጲዳ አሳ
ኔ ካጃናስ ኔስ ቤሲዜ?
ኢታ አሳታ ዱላታይ
ኔና ኡፋይሲዜ?
- 4 ኔ አይፌይ አሳ አይፌ ማላ?
ዋይኮ ኔ አሳሶ ጸላይ?
- 5 ኔ ዋዴቲ አሳይሳ ማላ?
ዋይኮ ኔ ላይሳቲ
አሳ ላይሳ ማላ ቃንፊ?
- 6 አይስ ኔ ታ ቆሆዛ ጸላይ?
አይስ ኔ ታ ናጋራካ
ካላ ካላዳ አጎንታ ኢጻይ?
- 7 ታኒ ቆሆንታይሳኔ
ኔ ኩሼፔ ኦኒካ
ታና አሾንታይሳ ኔ ኤራሳ።
- 8 ታስ ሜጲኔ ማላ
ኢሚ ሜጲዳይ
ኔ ኩሼታ፤
ሂስቲን ሃኢ ሃ ኩሼቲ
ታና ዛሪ ላሊ ጳይሳኔ?
- 9 ማና ሚሻ ማላ ኔ ታና
ቢታፌ ሜጲይሳ ቆፓ፤
ሂስቲን ሃኢ ኔ ታና
ጉዱላ ማላ ሊቂሳኔ?
- 10 ታና ማላ ማላ ቲጋዳ፥
ሜቆ ማላ ማላ
ኢርኪሳ ኦላዳሳ።
- 11 ታ አሳቲላ ጋልባኒኔ
አሾን ካማዳሳ፤
ሜቄላኒኔ ሻያን
ጋላ ኦይላዳሳ።
- 12 ዴኦኔ ሜርና ሲቆ
ታስ ኢማዳሳ፤
ኔ ናጎይካ
ታ ኢያና ሚንሐዴስ።

- 13 «ሄኮ ሃይታ ሃ ሚሻታ
ኔ ወዚናን
ቆታ ዋላዳ ዳሳ፤
ኔ ቆፋይካ ሃይሳ ጊዲዳይሳ
ታ ኤራዲስ።
- 14 ታ ቆሂዳ ጊዲኮ
ኔ አይፌቲ ቤያና፤
ታ ናጋራ ገሻሰ
ታና ቃጸዮንታ አቆካ።
- 15 ታ ናጋራ ኦሊዳኮ
ኤሶራ ሜቶ ጊደን ኩንዳና፤
ሎኦ ሚሽ ኦሊዳ ጊዲኮካ
ጋላቲቲኬ፤
ታ ገልቂን ዬላይ ታና ጋኪዴስ።
- 16 ታ አቶሬቲዳኮ
ኔ ታና ጋሞ ማላ
ሻንካታዳ አይካና፤
ኔ ታና ቆሃናሰ
ዛራ ዛራ ሻንካታና።
- 17 ታ ቦላ ማርካቲዛ አሳታ
ኔ ኡባ ጋላሰ ዴማና፤
ታ ቦላ ኔ ሃንቆይ
ጌዴ ዳሪ ዳሪ ባና፤
ኔኒ ታና ቆሃናሰ
ኡባ ጋላሰ ኦራላ ቆፋታ
ኦላ አሳታ ማላ
ታ ቦላ ዴንላሳ።
- 18 «ታ ጎዳ ጸሳዉ!
አይሰ ታ ዬሌታና ማላ ኦላዲ?
ኦኒካ ታና ቤኦንታ
ታ ሃይቃይቺዳኮ
ሎኦኮሺን!
- 19 ታ ሜዴቶንታ አታርኪና፤
ታኒ ታ አይይ ኡሎፔ
ዱፎን ቢዳኮ
ታስ ሎኦ ጊዳናኮሺን!
- 20 ታ ዳና ላይላያ

- ቃንሰ ጊዳኬ?
 ሄ ቃንሰ ላይሳይን
 ጉሳራ ታ ኡፋዬታና ማላ
 ታና ኣጋርኪ!
- 21 ሄሲካ ታኒ ናሞኣንሶ
 ሃ ሰማናስ ዳንዳዮንታ
 ጊርዲ ጊዳ ቋማሶ
 ባናፔ ሲንሳና።
- 22 ታ ባናሶዚ ቋማ ኩዋይኔ
 ሺርይ ኩሚዳ ቢታ፤
 ሄን ዲዛ ፖኑዚ ቋማ ማላ።»

11

ዘፋሬ ሃሳያ

- 1 ናኢማኔ ዳሬ ኣስ ዘፋሬይ ሂዘጊዳስ፤
- 2 «ሃይሳ ሃ ሃዳ ቃላታስ ኡባስ
 ዛሮ ኢሚዛይ ባዬ?
 ኣሲ ሃሳያ ዳሮን
 ጸሎ ጊዳና ዳንዳይዜ?
- 3 ኢዮቤ! ኔ ሃሳይዳ
 ሃዳ ሃሳያታስ
 ዛሮይ ኢሜቶንታ ሚሳቲዜ?
 ኔ ሃይሳ ማላ ቁልጪሺን
 ኔና ሴራና ኣሲ
 ባይንዳዝ ሚሳቲዜ?
- 4 ኔ ቆፋን፥ ‹ታኒ ጸሎ› ጋሳ፤
 ጸሳስካ፥ ‹ኔ ሲንሳን
 ታኒ ጌሻ› ጋሳ።
- 5 ጸሲ ኔስ ሃሳይዳኮኔ
 ሊኬ ዛሮ ኢሚዳኮ
 ኣዜ ዲዛይ!
- 6 ኤራቴላስ ኦጌይ
 ዳሮ ጊዲዳ ጊሻስ፥
 ጸሳይ ኔስ ኤራቴላ
 ጸራ ቆንጪሲዳኮ
 ኣዜ ዲዛይ!
 ሄሳ ጊሻስ
 ጸሲ ኔና ቃጸዪዛይ

ኔሰ በሲዛይሳፌ
ጉላራ ገዲዳይሳ ኤራ።

7 «ኔኒ ጸሳስ ጨማ ገዲዳ ጹራ
ኤራናስ ዳንዳያይ?
ኡባ ዳንዳይዛ ጸሳ
ፒልጋዳ ጋካናዉ ዳንዳያይ?

8 ኢዛ ገታቱላይ ሳሎፔ ቦላ፤
ኔኒ አይ አላናዉ ዳንዳያይ?
ኢዛ ጨማቱላይካ
ሲኦሌፔካ ዚቃ፤
ኔኒ አይ ኤራይ?

9 ጸሳ ገታቱላይ ቢታፌ ዳሬስ፤
አባፌ አከሰ።

10 ጸሲ ዪዲ ቃቺኮ፥
ጌዴ ፒርዳ ከሐ ሸሺዳኮ
ኦኔ ኢዛ ዲጋናይ?

11 ጸሲ ጎኦንታ አሳታ ኤሬስ፤
ኢዚ ቆሆ በዪሾ
ጮኡ ገዲ ዶሌና።

12 ኤያ አሲ ኤራንቻ ገዳናፔ
ሃሬይ አስ ገዲዲ
ዬሌታናይሲ ካዉያና፤

13 ገዲኮካ ኔኒ
ኔ ዋዚና ሱሪሲኮ፥
ኔ ኩሺዛ ሚጫዳ
ፑዴ ጸሳኮ ዋሲኮ፥

14 ኔኒ ናጋራፔ ሃኪኮ፥
ኢታ ሚሺካ
ኔሶን በቶንታ ማላ
ኔ ኦሊኮ፥

15 ሄ ዋዴ ቶቁ ጋዳ
ዬላይ ባይንዳ ኡባ ሚሽ
ኔ በያና፤

ዬላይ ባይንዳ
ሚና ኤቃናዉ ዳንዳያሳ።

16 ኔ ሚቶዛ ኡባ ኔ ዳጋና፤
ኔ አከኪዛይካ

- አፄ ቢቺዳ
ሃሮ ሃላ ማላ ገዳና።
- 17 ኔ ሸምፖያ ሴታ ጋላሳ
አዋፔ አቆዳ ፖኦና፤
ቆማይካ ዋንታ
ፖኦ ማላ ገዳና።
- 18 ኔሰ ሂደታይ ዲዛ ገሻሰ
ኔኒካ አማኔታዳ ዳና፤
ጸሲ ኔና ናገዛ ገሻሰ
ኔኒ ሂርጋይ ባይንዳ
ዋፑ ጋዳ ዳና።
- 19 ኔ ኦናሰካ ባቦንታ ኢቻና፤
ዳሮ አሳቲካ ኔ ሲንፋን
ቦንቸ ዳማናሰ ኮያና።
- 20 ኢታታ አይፌይ ቆቃና፤
ኢሰቲ አታና ኦጌቲ ኡባይ
ኅርዳ ገዳና፤
ኢሰታ ዉርሴላይካ ሃይቆ።»

12

ኢዮቤ ሃሳያ

- 1 ኢዮቤ ሂዘጊ ዛሪዴሰ፤
- 2 «ቴሙካ ኢንቴ ከሄ ኤራንቻታ፤
ኢንቴ ሃይቂሺንካ ኤራቴላ
ኢንቴናራ ኢሲፌ ሃይቃና
ሚሳቴሰ።
- 3 ገደ ኣቲን ታሰካ ኢንቴይሳ ማላ
ኣኬካይ ዴሰ፤
ታኒ ኢንቴፌ
ኣይ ሚሻንካ ጉጺኬ፤
ኢንቴ ሃሳይዳይሳ
ኣሲ ኡባይ ኤሬሰ።
- 4 «ታ ጸሳ ጸይጊን
ታሰ ኢዚ ዛሪዳ ዋዴይ ዴሰ፤
ሃኢ ታኒ ታ ላጌታሰ
ቂጴሰ ገዳዲሰ፤
ታኒ ሞሮይ ባይንዳ ጸሎ

- እሳ ኡባስ ቂጼስ አታዲስ።
- 5 ሜቶይ ኢዛ ቦላ ጋኮንታ አሳ
ማታን ሜቶቲዳ አሳ ሜቶ
ሌቃናይሲ ካዉሻ ሚሻ፤
ጊዶ አቲን ኩንዳናስ
ጋንዲጋርዛዴ ሱጊ ዬጌታ።
- 6 ባ ኤቃ ጸሳታ ጎይኒዛይቲ፤
ካይሶቲኔ ጸሳ ካዲዳ
አሳቲካ ሳሮን ዴቴስ።
- 7 «ጊዲኮካ ሜዶሳታ ኦይቻ፤
ኢስቲ ኔና ታማርሳና፤
ሳሎ ካፎታ ኦይቻ፤
ኢስቲ ኔስ ዮታና።
- 8 ዋይኮ ቢታይስ ዮታ፤
ኢዛካ ኔና ታማርሳና፤
አባ ጊዶ ሞሌቲካ
ኔስ ዮታና።
- 9 ሃይሳ ኡባ ጊዶፌ ጸሳ ኩሼይ
ሃይሳ ኦሊዳይሳ
ኤሮንታይ ኦኔ?
- 10 ሼሞፖራ ፓጻ ዲዛ
ሜጼቴሊ ኡባይኔ
ኢሲ ኢሲ አሳ ሼሞፖይ
ጸሳ ማታ ጊዶን ዴስ።
- 11 ኢንጸርሲ ካፋ ቃና
ሻኪ ኤሪዛይሳ ማላ፤
ሃይሊካ ሃሳያ ቆሞታ
ሻኪ ኤሬስ።
- 12 ኤራቴላይ ጨማቲላን፤
አኬካይካ ላይላ
አዲሳቴላን ቤቴቴስ።
- 13 «ጸሳስ ጊዲኮ
ኣጼ ኤራቴሊኔ
ዋልቃይ ዴስ፤
ዞሬይኔ አኬካይ
ኢዛ ማታፔ ቤቴቴስ።

- 14 ጸሲ ላሊዳይሳ
 ኦኒካ ዛሪ ኬጸናው
 ዳንዳይና፤
 ጸሲ ቃቺዳይሳ
 ኦኒካ ቢርሻናው ዳንዳይና።
- 15 ጸሲ ኢራ ዲጊኮ ኮሻ ጊዳና፤
 ኢራ ቡኪሲኮ
 ቃሴ ቢታይ ሃሮን ሜጨታና።
- 16 ጸሲ ሚኖኔ ጸኒዛዴ፤
 ባሌቲዛዴይኔ
 ባሌሊዛዴይ፥
 ናምኣቲካ ኢዛ ጎዳቲፋ
 ጋርሳና።
- 17 ኢዚ ዘሪዛይታ ኤራቴሐ ዲጋና፤
 ዴሬ ካሌሊዛይታ
 ኢዚ ኤያ ኦላና።
- 18 ኢዚ ካዎታ ካዎቴፋ
 ኣራታፔ ዋላና፤
 ቃሾ ኣሳ ማላ ዳንጮ ቢርሺሳና።
- 19 ቄሴታፔ ኢሰታ ቄሴቴፋ
 ዋሊ ኤኪዲ ኢሰታ ጎዳና፤
 ጎዳቴፋ ቦላ ዲዛይታ
 ኢሰታ ጎዳቴፋፌ ዲጋና።
- 20 ኣማኔቲዳ ኣሳታ ጮኡ ኦላና፤
 ጨማታፔካ ኣኬካ ዲጋና።
- 21 ጊታ ኣሳታ ዬላቻና፤
 ዋልቃማታ ዋልቃ ዲጋና።
- 22 ቋማሶን ቆቴቲዳ
 ጹራ ቆንጨሳና፤
 ሳካና ቋማ
 ፖኦን ላማና።
- 23 ካዎታካ ጊታሳና፤
 ዛሪዲካ ቋይሳና፤
 ካዎቴፋካ ዳርሳና፤
 ዛሪዲካ ላላና።
- 24 ካሌሊዛይታሰ ኣኬካይ
 ፓጫና ማላኔ
 ኦጌይ ባይንዳ ባዞ ቢታን
 ቶይላታና ማላ ኢዚ ኦላና።

- 25 ፖኦይ ባይንዳ ቋማሶን
 ኢሰቲ ቋጴታና ማላኔ
 ማሞቲዳ አሳ ማላ
 ኢሰቲ ጋዲጋዳና ማላ ኦላና።

13

- 1 «ሄኮ ሃይሳ ኡባ
 ታ አይፌይ ቤዪዴሰ፤
 ታ ሃይሲካ ሲዪዲ አኬኪዴሰ።
- 2 አንቲ ኤሪዛይሳ ኬና
 ታኒካ ኤራይሰ፤
 ታ አይኮንካ
 አንቲፌ ጉጺኬ።
- 3 ጊዲኮካ ታ ሃሳያይ
 ኡባ ዳንዳይዛ ጸሳራ፤
 ታ ኢዛራካ ማርሼታና።
- 4 አንቲ ጊዲኮ ዋርዶን ኩሚዴታ፤
 ኦናካ ፓላናዉ
 ዳንዳዮንታ አከሜታ ማላ።
- 5 ሃይሳ ኡባፌ አንቲ ጮኡ ጊዳኮ
 ኤራንቻታ ሚሳቲ ቤታናኮሺን!
- 6 ታኒ ሺሺዛ
 ማርሼ ቃላ ሲዪቲ፤
 ታ ቆሆካ ታኒ ዮቲሺን
 ጮኡ ጊዲ ኤዘጊቲ።
- 7 ጸሳ ሱንላን
 አይሰ ዋርዶ ሃሳዬቲ?
 ባሌሶን አንቲ ጸሳ ኡፋይሳና
 አንቲሰ ሚሳቲዜ?
- 8 ኢዛ ቤሶንታ ኦጌራ ማዴቲ?
 ኢዛሰ ጸባቃ ኤቃንዴቲ?
- 9 ጸሲ አንቲና ቆሪዳኮ
 ኢሲ ሎኦ ሚሽ
 አንቲፌ ዴማንዴሻ?
 አንቲ አሳታ ኤይሲዛይሳ ማላ
 ጸሳካ ኤይሳናዉ ዳንዳያና
 አንቲሰ ሚሳቲዜ?
- 10 አንቲ ጌማራ ዋርዶ ማዲኮ

ቱማፔ ጸሲ ኢንቴና ሃንቃና።

11 ኢዛ ቦንቾይ

ኢንቴና ያሼኔ?

ኢዛ ቱማይካ

ኢንቴና ዳጋንሐኔ?

12 ኢንቴ ሌሚሶን ሃሳይዛ ሃሳያቲ

ቢዲንላ ማላ

ጎኣይ ባይንዳይታ፤

ኢንቴ ማርሼቴላይካ

ማና ሚሻ ማላ ሜቄሬታና።

13 ኣኔ ጮኡ ጊቴ!

ታኒ ሃሳያና ማላ

ታሰ ጊሻ ኢሚቴ፤

ሄሳፌ ጉዬ ባ ዶሶይሳ ሃኖ።

14 «ታኒ ኣቶ ሳጸዳ ጌንጩጫሽ

ዲዛይ ኣዛሴ?

ታ ሸምፖያካ

ታ ኩሼን ዳዉሰ።

15 ሄሳ ጊሻስ ጸሲ

ታና ዋቆና ኮይኮካ

ታፔ ኣቲዛ ሚሺ

ኣይኮይካ ዴና፤

ጊዲኮካ ታ ሃኖዛ ኢዛሰ ኤሪሳና።

16 ናጋራንቻ ኣሲ ጸሳ ሲንሐ

ሺቃናሰ ዳንዳዮንታ ጊሻስ

ኦኔ ኤሪዛይ ሃይሲ ታ ጸላቴሐ

ፓጸናሰ ጋሶ ጊዳናሰ

ዳንዳዬሰ።

17 ኣኔ ታ ሃሳይዛ ቃላታ

ዋጋራ ኤዘጊቴ፤

ታ ዶናራ ታ

ማርካቲዛይሳ ሲዪቴ።

18 ታ ማርሼቴላ

ሎኤላ ጊጊሳዳ ሸሻዲሰ፤

ኢዚ ታሰ ፒርዳናይሳካ

ታ ኤራይሰ።

- 19 ታና ሞቲዛይ ዲኮ
 ታኒ ማርሼቶንታ
 ጮኡ ጋዳ ሃይቃና።
- 20 «ጎዳዉ! ታ ኔ ሲንላፌ
 ቆቴቶንታ ማላ
 ሄይታ ናሞኡ ሚሻታ
 ታሰ ኦላ።
- 21 ሄይቲካ ኔ ሃንቆ ቄሴታ
 ታ ቦላፌ ዴንላ፤
 ያሺሲዛ ኔ ታማን
 ታና ዳጋንሶፋ።
- 22 ጸላዉ! ኮይሮ ኔ ሃሳያ፤
 ታ ኔሰ ዛሮ ኢማና፤
 ታኒካ ሃሳያና፤
 ኔካ ዛሮ ኢማ።
- 23 ኤሮ ጊዶ ታ ኦሊዳ ናጋራይኔ
 ቆሆይ ኣይ ሊኬ?
 ኣኔ ታ ሞሮዛኔ ታ ናጋራ
 ታና ኤሪሳ።
- 24 ኔ ሲንላ ታፔ ጌንላዳ
 ታና ኔ ሞርኬ ማላ
 ኣዛሰ ቆዳይ?
- 25 ጫርኮይ ቆቆፊዛ ቦንጮ ማላኔ
 ሜላ ሃፓ ማላ
 ኔ ኣይሰ ታና
 ያሺሴላን ጎዳይ?
- 26 ታ ቦላ ኔ ጸፊዳ ሞቶይ
 ኬሂ ጫሞ፤
 ታኒ ዬላጋቴላን
 ኦሊዳ ቆሆዛካ
 ታሰ ኣጋቤካ።
- 27 ኔ ታ ቶሆታ
 ዱሩማታ ጊዶን ቃቻዳሳ፤
 ታ ታንጎ ኡባ ዎዴ
 ኔ ካሌታሳ፤
 ታ ጌዶን ኔ ኤቃሳ።

- 28 «ሄሳ ገሻሰ ታኒ ዋቂዳ
 መሻ ማላ
 ገዳዳ አታና፤
 ባዳይ መዳ መይኦ ማላካ
 ታ ጳያና።

14

- 1 «አሾ መይኢዳ አሳሰ
 ላይሳይ ቃንላ፤
 ሄሰካ መቶን ኩሚዴሰ።
- 2 ጨሻ ማላ ቤቲዲ
 ሄራካ ቆኬሰ፤
 ኤሾ ማላ ዳሮ ጋምኦንታ
 ሄራ አዴሰ።
- 3 ሂሰቲን ኔኒ ሃይሳ ማላ
 አሳ መጽፎቱላ ካሌታይ?
 ኔ ሲንሉካ
 ፒርዳሰ ሺሻኔ?
- 4 ቱና መሻሻፌ
 ጌሻ መሻሻ ደማናሰ
 ዳንዳይዛዴይ ኦኒካ ዴና።
- 5 አሳ ላይሳሰ ዋዲዳ ዛዋይ ዴሰ፤
 አሲ ዳና አገናቲካ
 ኔ ማታን ቆዳን ዴቲሰ፤
 ኔኒካ ዋሉዳ
 ላይላ ዛዋፔ
 አዲዛዴይ ዴና።
- 6 ኡኔቲ አቂዛዴይ
 ባ ኦላና ጋላሳ ኦሶዮ
 ፖሊዲ ኡፋዬቲዛ ማላ፥
 አሲካ ባ ዳቡራ ጋላሳን
 ኡፋዬታና ማላ
 ኔ አይፌ ኢዛ ቦላፌ ዴንላ።
- 7 ቃንጾቲዳ መላ ኡላሰካ
 ሂዶታይ ዴሰ፤
 ናምኣንላ
 ሲሚ አጫናሲኔ
 ሃጋታ ኬሳናሰ ዳንዳዬሰ።
- 8 አይኮካ ጸጾቲ

- ቢታ ጊደን ጨሚኮካ፥
 እኖይካ ቢታ ጊደን ሙሲኮ፥
- 9 ኢርጸ ዴሚኮ
 ናሞእንሶ አጨሰ፤
 ኦራሐ ቶኬቲዳ ሚላ ማላ
 ሃጋታ ኬሴሰ።
- 10 አሲ ጊዲኮ ሃይቂዲ
 ካሴ ባይንዳ ማላ ሃኔሰ፤
 ሃይቂዳፔ ጉዬ
 አዋን ቤታኔ?
- 11 አባ ሃሊ ዉሪዛ ማላ፥
 ሻፋ ሃሊካ ሜሊዛ ማላ፥
- 12 አሲካ ሄሳ ማላ
 ሃይቂዳፔ ጉዬ
 ሃ ሲሜና፤
 ሳሎይ አቆናሽ
 ጋካናሰ ዴንዴና፤
 ጲሰኮፌካ ቤጌና።
- 13 «ሃይቂዳይታ ጊደን
 ኔ ታና ቆቲዳኮ አዜ ዲዛይ!
 ኔ ሃንቆዚ አቆና
 ዋዴይ ጋካናሰ
 ኔ ታና ቆቲዳኮ!
 ቃጸሮ ጋላሰ ቃቻዳ
 ኔ ታና ቆቲዳኮ!
- 14 አሲ ሃይቂዳፔ ጉዬ
 አሾራ ፓጸ ዳናሰ ዳንዳይዜ?
 ታሰ ዋዴይ ላሜታና ጋካናሰ፥
 ታ ሃይሳ ባጼ ላይላ
 ጌንጫ አላና።
- 15 ሄ ዋዴ ኔኒ ታና ጴይጋና፤
 ታኒካ ኔሰ፥ «ዬ» ጋና፤
 ኔ ሜዴታ ጊዲዳ ታና
 ቤያናሰ ኔ ላሞታና።
- 16 ሄኮ ሃኢ
 ኔ ታ ሄሜታ ካሌታሳ፤
 ጊዲኮካ ታ ናጋራ ቆፓካ።
- 17 ታ ቆሆይ ካራጺቴን ጸንቲታና፤

ታ ናጋራካ ኔ ካማና።

- 18 «ዙማይ ሃሮቲዛ ማላኔ
 ዋዲዛ ማላ፥
 ዛላይካ ባ ዲዛሶፔ
 ጶቃሌቲዛ ማላ፥
 19 ሃሊ ሹቶ ዋጨዲ
 ኦንጊዛ ማላ፥
 ዲኦይ ቢታ ሜጨዛ ማላ
 ኔኒካ ኣሳ ሂደታ ጳይሳሳ።
- 20 ኔ ዋልቃይ ሜርናሰ
 ኢዛዴ ቦላ ሚኔሰ፤
 ኢዚካ ካሴ ባይንዳ ማላ ሃኔሰ፤
 ኔ ኢዛ ሜጻካ ላማዳ
 ኔ ሲንፋፌ ጳይሳሳ።
- 21 ኢዛ ናይቲ ቦንቾ ዴሚዳኮካ
 ኢዚ ኤሪና፤
 ካዉዪዛኮካ ኢዚ ጸሌና።
- 22 ኢዛሰ ኢዛ ኣሳቴፋ
 ዋዬዚ ሲዬቴሰ፤
 ኢዚካ ባ ሜቶዛ ጊሻሰ ጸላ
 ዬኬሰ።»

15

ኤልፋዜ ሃሳያ

- 1 ቲማኔ ዳሬ ኣሰ ኤልፋዜይ ሂዝጊዴሰ፤
- 2 «ቱሙ ኤራ ኣሲ
 ጨርኮ ማላ ኩሼን ኦይኬቶንታ
 ሚሽ ሃሳዪ ኤሪዜ?
 ኢዛ ኡሎን ቆሂዛ ቆፋይ
 ዳናሰ ቤሲዜ?
- 3 ኤራ ኣሲ ኣይኮ
 ጎኦንታ ቃላታኒኔ
 ጎኣይ ባይንዳ ሃሳያን
 ማርሼቲዜ?
- 4 ኔኒ ጸሳሰ ያዪዛይሳ ኣጋዳሳ፤
 ጸሳሰ ቤሲዛ
 ጎይኖዛካ ዲጋሳ።

- 5 ኔ ቆሃንቻ ገዲዳይሲ
ኔ ሃሳያን ኤሬቴስ፤
ገደ አቲን
ጨንጫቴላ ሃሳያን
ካማናስ ባጾታሳ።
- 6 ኔ ቦላ ፒርዲዛይ
ኔ ዶናፔ አቲን
ታና ገዲኬ፤
ኔ ሃሳያይ ኔናቴላ ቆንጨሲስ።
- 7 «አሳፔ ሲንላን
ዩሌቲዳይ ኔኔ?
ዙማቲ ሜጾታናፔ
ሲንላን ኔ ዩሌታዲ?
8 ቱሙ ጸሳ ጹራ ሲያዲ?
አሳ ኤራቴስ ኤሪዛይ
ኔና ጸላ ኔስ ሚሳቲዜ?
- 9 ኑኒ ኤሪዛይሳፌ ዱማ ሚሽ
ኔ ኤሪዛይሲ አዜ?
ኑ ኤሪዛይሳፌ ኔስ ቆንጨዳ
ዱማ ሚሺ አዜ?
- 10 ዩሌታን ኔ አዋፔ ጨሚዛ
ሁኤይ ፑሉሚዳ ጨማቲ
ቆፋን ኑናራ ዴቴስ።
- 11 ኑ ባጋራ ኔስ ዮቴቲዛ
ጸሳፌ አሜቲዳ ሚንሐዶይ
ኔስ ገዴኔ?
- 12 ኔና ኔ ዋዚናይ
አይስ ሃራሶ ኤፊዜ?
አይስ ሃንቆን ዴሬቃ ጸላይ?
- 13 ሃይሳዶ ኦሶን ጸሳ ቦላ
ኔ አያና ዴንሐላዳሳ።
ሃይሳ ማላ ሃንቆ ቃላ
ሃሳያናዉ ጋካዳሳ።
- 14 «አሲ ጌሽ ገዳናስ ዳንዳይዜ?
አሾ ማይኢዳይ
ጸላናስ ዳንዳይዜ?

- 15 ጸሳይ ባ ከታንቻታ ቦላ
 አማኔቴና፤
 ሳሎይካ ኢዛ ሲንፋን
 ጌሽ ጊዴና።
- 16 ሞሬቲዳይኔ ቱኒዳይ
 ናጋራካ ሃፋ ማላ
 ኡዪዛ አሲ አይ ማላ ኢታ?
- 17-18 «ኢስታ አዋቲ ቆቶንታ
 ኢስታስ ኦሐዳይሳ፥
 ኤራንቻቲ ቆንጨሲዳይሳ፥
 ታኒካ ፒልጊዳይሳ
 ታ ኔና ኤሪሳይሰ፤
 ሲያ ታ ኔሰ ዮታይሰ።
- 19 ቢታያ ኢስታስ ጸላ አሜታዱሰ፤
 አማፋቲካ ኢስታ ጊዶን
 ዋላኬቲቤቴና።
- 20 አሰ ዋዪሲሼ ዴኢዛ ኢታ አሲ
 ባ ላይፋ ኩሜላን
 ዋዪቲሼ ዳና።
- 21 ዳጋንሐዛ ገሪሰ ኢዚ
 ባ ሃይፋን ሲያና፤
 ኡባ ሚሺ ሳሮ ሚሳቲዱ
 ኢዛሰ ቤቲዛ ዋዴ
 ኢዛ ጳይሲዛ ሚሺ
 ኢዛ ቦላ ያና።
- 22 ኢዛሰ ቃዳይ
 ማሻን ሃይቆ ጊዱዳ ጊሻሰ፥
 ጳማፔ አታና ሂዶታይ
 ኢዛሰ ዴና።
- 23 ካፎሰ ዋራ አቲዳ ካፋ ማላ
 ኢዚ ዋራ አታና፤
 ኢዚ ጳያና ጳማ ጋላሳይ
 ኢዛኮ ማቲዳይሳ ኢዚ ኤሬሰ።
- 24 ሜቶይኔ ጨጮይ ኢዛ ያሻና፤
 ኦላሰ ጊጌቲዳ ካዋ ማላ
 ኢዛ ቦላ ሚናና።

- 25 ሃይሲ ሃናናይ ጸሳ ቦላ
 ባ ኩሼ ዳንፊዳ ገሻሳ፤
 ኡባ ዳንዳይዛ ጸሳ ቦላ
 ጸሊዳ ገሻሳ።
- 26 ኢዚ ባ ኦርዴኔ
 ሚኖ ጎንዳሌ ኤኪዲ
 ጸሳራ ኤቄታና ኬዚዴሰ።
- 27 «ኢዛ አይፌይ ሞጾን ጎዜቲዴሰ፤
 ኢዛ ጸሳይካ ኦርዲዴሰ።
- 28 ሃይሲ ሃ አዴዚ
 ሙሌራ ኩንዲዲ
 ጳይዳ ካታማታን፥
 ላሌታናሰ ማቲዳ
 ካይሳ ኬላታ ጊዶን ዴሰ።
- 29 ዱሬቴና፤ ኢዛ ሃሮይካ
 ዳሮ ዋዴ ጋሞኤና፤
 ቢታ ቦላካ አኬና።
- 30 ጳማፔ አቲ ባናዉ
 ዳንዳዬና፤
 ታማ ላጮይ ሃጋታ
 ሜሊሲዳይሳ ማላኔ
 ጨሻቲካ ጨርኮን
 ቆኪዳ ሚላ ማላ ጊዳና።
- 31 ሃዳ ሚሻን አማኔቲሽ
 ባና ባርካ ባሌሶሮ፤
 ሄሳንካ ኢዚ ጎአይ ባይንዳይሳ
 ጊዲ አታና።
- 32 ኢዚ ዋዴይ ጋኮንታ ዲሺን
 ኡላይ ሜሊዛ ማላኔ
 ሃጋቲካ ጨሊሎንታ
 ሚላ ማላ ሃናና።
- 33 ኢዚ ቡሮን ካጽንታ ዲሺ
 አይፌዚ ቆቆፌቲዛ
 ዋይኔ ሚላ ማላኔ
 ጨሻይ ቆቆፌቲዛ
 ዋጋራ ሚላ ማላ ጊዳና።
- 34 ጸሳ ጸሳቴላ ኤሮንታ አሳታሰ

ዘሬሊ ዳኤና፤
 ጉቦን ኦሴቲዳ ከፋቲካ
 ታማን ዲፒ ጊ ጸጌታና።
 35 ሃይሳ ማላ አሳቲ
 ጌኔ ሚሽ ቆፔቲሰ፤
 ሜቶካ ሜዴቲሰ፤
 አሰታ ዋዚናይካ
 ባሌሉን ኩሚዴሰ።»

16

ኢዮቤ ሃሳያ

- 1 ኢዮቢካ ሂዝጊ ዛሪዴሰ፤
- 2 «ታኒ ሃይሳ ማላ ሃሳያ
 ዳሮ ዋዴ ሲያዲሰ፤
 አንቴ ሳሌሊዛ ዘራንቻታ።
- 3 ሃይሳ አንቴ ሃዳ ሃሳያሰ
 ዉርሴሊ ባዬ?
 ሃይሳ ላጌ ታናራ
 ማርሼታና ማላ
 አንቴና ዴንፌሊዳይ አዜ?
- 4 አንቴ ታ ሶሆን
 ታኒ አንቴ ሶሆን ጊዲዳኮ
 ካዴን ታኒ ሁኤ ቃላዳ
 ሃኢ አንቴ ጊዛይሳ ኡባ
 አንቴ ቦላ ሎኤላ
 ሃሳያናኮሺን።
- 5 ሄሳ ማላካ ታ ዶናን
 አንቴና ሚንፌላናኔ
 ሚንላናሰ ዳሮ
 ሃሳያናኮሺን።
- 6 «ጊዶ አቲን ዳሮ ሃሳይኮካ
 ታ ሃርጌይ ሃ ሎኤና፤
 ጮኡ ጋ ዳንዳይኮካ
 ታ ዋዬይ ታፔ ኪቼና።
- 7 ጸሳዉ! ታና አሳቲላፌ
 ካሬ ኬሳዳሳ፤
 ታ ዴሬ አሳ ኡባ ዳይሳዳሳ።

- 8 ታ አሳቴላይ ጉንደይሲ
 ታ ቦላ ዴንዲዲ
 ኔኒ ናጋራንቻ ጊዲ
 ታ ቦላ ማርካቴስ።
- 9 ጸሲ ታና ሃንቂዲ
 ታ አሳቴላ ቃንጾሬሊዴስ፤
 ታና ኢዲዲ ባ አቕ
 ታ ቦላ ጋርጨዴስ፤
 ታ ሞርኬይ ባ አይፌ
 ታ ቦላ ማጸ ኬሲዴስ።
- 10 አሳይ ታ ዩሾን ሸቂቲዲ
 ታ ቦላ ጨቂቲዴስ፤
 ታና ቂዴ ቃላን ባቂዳ።
- 11 ጸሲ ታና ኢታ አሳታስ
 አሊ ኢሚዴስ፤
 ማካላንቻታ
 ኩሼን ዩጊዴስ።
- 12 ታ ሳሮን ዳይሲኮሺን
 ጊዲኮካ ጸሲ ባ ሃንቆዛን
 ታና ሜንፊሬሊዴስ፤
 ታ ቆዴ ጨሊ ኦይኪዲ
 ታና ዳቡርሲዴስ፤
 ባ ቆፋ ታ ቦላ ፖሊዴስ።
- 13 ዋንዳፋንቻቲ
 ታና ጊደሊዳ፤
 ቃዴቴሊ ባይንዳ
 ታ ኪላሆታ ቃንጾሬሊዳ፤
 ታ ጨዩዛካ ቢታ ቦላ ጉሲዳ።
- 14 ኢዚ ታና ዛሪ ዛሪ ማዲንሊዴስ፤
 ሚኖ ኦላንቻ ማላ
 ዚዚሚ ዩዲ
 ታና ሾጨዴስ።
- 15 «ታ ካዮቴላስ
 ማቃ ሲካ ማይአዲስ፤
 ጉዲላ ቦላ ጉፋናዲስ።
- 16 ታ አይፌሶይ ዩኮን ዘኢዴስ፤
 ሳካና ቋማይ

- ታ ሲጸንህ ካሚደስ።
- 17 ሃይሲ ኡባይ ሃንሺን
 ታ ኦሊዳ ቆሆይ ዳና፤
 ታኒ ታ ዋሳ
 ጸሳኮ ሺሺዛይ
 ዋዚና ጌሻቴላና።
- 18 «ቢታዘ! ታና ጋኪዳ ቆሆዛ
 ኔ ካሞፋ!
 ሱሬ ፒርዳ ጌሻስ
 ታ ሺሺዛ ማጋናይ
 ካሜቲ ኣታና ማላ
 ኔ ኦሶፋ!
- 19 ሄኮ ታስ ማርካቲዛይይኔ
 ኣፋካቶ ኤቁዛይይ ሳሎን ደስ።
- 20 ታ ላጌቲ ታና ሌቆን ጸሌቴስ፤
 ታኒ ጌዲኮ
 ፑዴ ጸሳስ ዩካይስ።
- 21 ኣስ ኣሳራ ጋሊ ሃሳይሲዲ
 ማቃዪንሊዛይይ
 ዲዛይሳ ማላ፤
 ኣስ ጸሳራ ጋሊ
 ማቃዪንሊዛ ኣሲ ዲዳኮ
 ኣዜ ዲዛይ?
- 22 «ታ ላይላስ ዉርሴላይ ጋኬስ፤
 ታ ሃ ሲማ ዮንታሶ ባናስ
 ጉላ ዋዴይ ጸላ ኣቲደስ።

17

- 1 «ታ ኣያናይ ዳቡርደስ፤
 ታ ዳና ላይላይካ
 ፖሊታናዉ ማቲደስ፤
 ዲፎይካ ታና ናጌስ።
- 2 ታና ቁዲዛይቲ ታና ዩዩ ኣዲዳ፤
 ታ ኣይፌይካ
 ኢስቲ ኢዲዛይሳ ጸሌስ።

3 ታ ጸሳው! ኔፔ ኣቲን
ታሰ ኤቃናይ ሃራይ ዳና፤
ኔኒ ኔ ሁኤራ ታሰ ዋሴ ጊዳ።

4 ኢሰቲ ፒልጊዲ
ኣኬካናው ዳንዳዮንታ ማላ
ኢሰታ ቆፋ ጎርዳዳሳ፤
ሄሳ ጊሻስ ኢሰቲ
ጸናና ማላ ኦሶፋ።

5 ሚሼ ደማናው ጊዲ
ባ ላጌዛ ኣሉ ኢሚዛ
ኣሳ ናይታ
ቦላ ጎሜይ ጋካና።

6 «ጸሲ ታና ኣሳስ
ካሳ ሚሽ ኦሊዴሰ፤
ኣሳይ ኢዛዴ ቦላ ጩቲዛ
ኣሳ ማላ ጊዳዲሰ።

7 ኣፋንዳፌ ደንዲዳይሳን
ታ ኣይፌቲ ዶልጂሚዳ፤
ኩሚላ ታ ኣሳቴላይካ
ኤሾ ማላ ጊዲዴሰ።

8 ጸሎ ኣሳቲ ሃይሳን ዳጋሜቲዳ፤
ጌሻቲ ጸሳ ኣማኖንታ
ኣሳታ ቦላ ሃንቄቲዳ።

9 ጊዶ ኣቲን ጸሎቲ ቱማ ኦጌፔ
ካሪ ኬኤቲና፤
ጌሻቲ ሚኖቴላ ቦላ
ሚኖቴላ ጉጃቲሰ።

10 «ኢንቲ ኡባይካ ናሞኣንሶ ዪዲ
ታ ሲንላን ማርሼቲኮ፤
ኢንቲ ጊዶፌ ኢሲ ኣኬካራ ዲዛ
ኣሰ ደሚኬ።

11 ታ ላይላይ ወሪዴሰ፤
ታ ቆፋይኔ ታሰ ዋዚና ኣሞይ
ሃዳ ጊዲ ኣቲዴሰ።

12 ሃይቲ ሃ ኣሳቲ
ኦማርሳ ጋላስ ጌቲሰ፤

- ፖኦዛ ቃሴ ጹማና
ሃኔሰ ጌቴሰ።
- 13 ሃይሳፌ ጉዬ ታሰ ዲዛ ቃዳይ
ዲጌ ሃይቂዳ አሳቲ ዲዛሶ
ዲፎን ዋዴላ፤
ያን ጹማሶን ታኒ
ታ ሂጸ ኦንጋና።
- 14 ዲፎ፡ (ታ አዋዉ!)
ጋዳ ታ ጸይጋና፤
ታና ሚዛ ጉጹኔታ ታኒ፡
(ታ አዬ፡ ታ ሚቼዬ!)
ጋዳ ጸይጋና።
- 15 ሂሰቲን ታሰ አይ ሂዶታይ ዲዜ?
ታሰ ሂዶታ ጊዲዛ ሚሽ
ኦኔ ታሰ ጸላናይ?
- 16 ታኒ ዲጌ ሲኦሌ ዋዴሽን
ሂዶታይ ታናራ ኢሲፌ ዋዳኔ?
ኢሲፌካ ዲጌ ዲፎን
ኮ ጌላኔ?»

18

- ቤሊዳዴ ሃሳያ
- 1 ሹሃ ዴሬ አሰ ቤሊዳዴ
ሂዝጊ ዛሪዴሰ፤
- 2 ኢዮቤ! ኔ አይሰ
ሃይሳ ማላ ሃሳያ ዳርሳይ?
አኔ ኤዝጋ፤ ኦኒካ ሃሳዮሰ።
- 3 ኔኒ ኦና አይሰ ሜሄታ ማላ ቆዳይ፤
ኔኒ አይሰ ኦና ቱሌታ ማላ
አኬኮንታ አሰ ኦላ ጸላይ?
- 4 ኔኒ ሃንቁቲኮ ኔና ቆሃሳ አቲን
ኔ ሃንቆዛን ቢታይ
ሚላ አቴና።
ዛላቲካ ባ ዲዛሶፔ
ቃጽቴና።
- 5 ናጋራንቻ ጸሞፔይ ቶኦና፤
ታማ ላጮይካ ናሞኦንሶ ቤቴና፤
- 6 ኢዛ ዲንካኔ ጊዶን ዲዛ

- ፖኦይ ቶኣና፤
 ፖኦዚካ ጳማና።
 7 ኢዛስ ሚኖ ታንጎይ
 ቃሚ ቃሚ ባና፤
 ጌኔ ቆፒዛዴ ቆፋይ
 ኢዛ ዛሪ ኩንዲሳና።
 8 ኢዚ ባርካ ቢዲ ዋጺማዴን ጌላና፤
 ኢዛ ቶሆይካ ጊቴን ቃጾታና።
 9 ዋጺማዴይ ኢዛ ቂርጵ ኦይካና፤
 ሄንካ ዋጺ አሻና።
 10 ሳኦ ቦላ ያርዴ ዋዶርይ
 ሚጩቲዴስ፤
 ኢዛ ኦጌንካ ዋጺማዴይ
 ጊቴቲዴስ።
 11 «ያሺ ኢዛ ጊዶሊዴስ፤
 ጉዬራ ካሊ ካሊ
 ጎዴሬሴስ።
 12 ኢዛ ዋልቃይ ኮሻን ዉሪዴስ፤
 ቦሻይካ ኢዛ ጳይሳናስ
 ጊቴቲዴስ።
 13 ሃርጌይ ኢዛ አሳቲፋ ጊልቂሳና፤
 ሃይቆይካ ሙሌራ ኤኪ ባና።
 14 ሂርጋይ ባይንዳ አማኔቲ ዲዛ
 ኬላፌ ኢዚ ጎዴታና፤
 አስ ኡባ ሃሪዛ ሃይቆይ
 ኢዛ ኤካና።
 15 ኢዛ ኬላን
 አይ ሚሺካ አቴና፤
 ኢዚ አቂዛሶዛንካ
 ዲኔ ታማይ ላሌታና።
 16 ጸጸፔ ሜሊዛ ሚላ ማላኔ
 ሃጋቲካ ሜቄሬቲዛ
 ሚላ ማላ ጊዳና።
 17 ቢታ ቦላ ኢዛ ቆፒዛ አሲ ዴና፤
 ኢዛ ጎባቴሊካ
 ቢታፌ ጳያና።
 18 ኢዚ ፖኦሶፔ

- ጌዴ ጹማን ጎዴታና፤
 ቢታ ቦላፌ ኢዚ ኪቻና።
 19 ኢዛ ዳቦታ ጊደፌ
 ኢዛ ላታና ዩሌታይ ቤቴና፤
 ኢዛ ባቻንካ
 ዛሬይ ኢዛሰ ኣቴና።
 20 ኡሻቻ ባጋራ
 ሃዲርሳ ባጋራ ዲዛ ኣሳይ፤
 ኢዛ ቦላ ጋኪዳ ሜቶዛ ጊሻሰ
 ኬሂ ባቢዲ ኮኮራና።
 21 ኣይ ዎዴካ ኢታ ኣሳታ ዉርሴፋይ
 ሄሳ ማላ፤
 ጸሳሰ ያዮንታ
 ኣሳ ቃዳይ ሃይሳ።»

19

ኢዮቤ ሃሳያ

- 1 ኢዮቤ ሂዘጊ ዛሬዳሰ፤
 2 «ኢንቴ ታና
 ኣዉዴ ጋካናሰ ዋዪሳንዴቴ?
 ኣዉዴ ጋካናሰ ዮኦን
 ታሰ ሜቄሰ ሜንፋንዴቴ?
 3 ሄኮ ኢንቴ ታና ታሙቶ ጫዬታ፤
 ታና ካዉሺሼካ
 ዩላቴኬታ።
 4 ቱሙካ ታኒ ባሌቲዳ ጊዲኮ
 ታ ባላይ ታና ጸላ ቆሃና።
 5 ቱሙ ኢንቴ ኢንቴና ቅቂሲዲ
 ታ ካዉሻቴፋ ኢንቴሰ
 ማርሼ ሚሽ ኦሴታ።
 6 ጊዲኮካ ሃይሳ ኡባ ሜቶዛ
 ታ ቦላ ጋሒዳይኔ፤
 ጊቴ ጊደ ታና ዩጊዳይ
 ጸሳ ጊዲዳይሳ
 ኢንቴ ኤራና ማላ ታ ኮያይሰ።
 7 ታ ቆሄታዲሰ ጋዳ ዎሲን
 ታና ሲዬዛ ኣሰ ዴማቤኬ፤
 ታ ቃላ ቅቄ ኦላዳ

- ማጋኒኮካ
ሱሬ ፒርዳ ደማቤኬ።
- 8 ጸሲ ታስ ኦጌዛ ጎርዲዳ ገሻስ
ኣቋርሶይ ደና፤
ታ ባናሶዛካ
ቋማን ጎርዲዴስ።
- 9 ታ ቦንቸዛ ታ ሁኤፔ ቃሪዲ
ታና ካዉሺዴስ።
- 10 ታ ኣሳቴላ ኡባሶራ
ቆጶሬሊዲ
ሙሌራ ላሊዴስ፤
ታስ ዲዛ ሂደታ
ጸጸፔ ሾዴቲዲ ኩንዲዛ
ሚላ ማላ ኦሊዴስ።
- 11 ጸሲ ታና ሃንቄቲዲ ገታ ሜቶ
ታ ቦላ ጋሊዴስ፤
ባስ ሞርኬ ማላ ታና ቆዲዴስ።
- 12 ታና ቋይሳናስ
ባ ኦሳንቻታ ከቲዴስ፤
ታስ ዲንካኔዛ ዩዪ ኣቋዲ
ታና ገደሊዲ።
- 13 «ጸሲ ታ ኣሻቲ
ታፔ ሃካና ማላ
ኦሊዴስ፤
ታና ኤሪዛ ኣሳቲ ኡባይ ታና
ኣሳ ዴሬ ኣስ ኬሲዲ።
- 14 ታ ዳቦቲ ታፔ ሃኪዳ፤
ታ ላጌቲካ ታና ባሊዲ።
- 15 ታኒ ታሶን ኣማላቴል
ሞካ ኤኪዳይቲ
ኡባይ ታና ባሊዲ፤
ታ ጋራዴቲ
ታና ኣማላ ማላ ቆዲዲ፤
ኣላጋ ማላካ ጸሊዲ።
- 16 ታኒ ታ ኦሳንቻዛ ጴይጊሺን
ኢዚ ታስ ኮዬና፤
ኃታና ማዳርኪ።

- ጋ ታ ዋሲሺንካ
 ኤሮ ጌና።
 17 ታ ማቻ ታፔ ከኢዛ
 ፔናዛ ሻቴታዲሰ፤
 ታ ኢሻቲካ ሃራሬቲዳ።
 18 ቄሪ ናይቲካ ታና ካጴቴሰ፤
 ታና ቤኢዛ ዎዴ
 ታ ቦላ ቁልጩቴሰ።
 19 ታሰ ማታ ላጌቲካ
 ታና ሻቴቲዳ፤
 ታ ሲቆቲ ታ ቦላ
 ሞርኬ ጊዲ ዴንዲዳ።
 20 ታሰ ኣሾዚ ዉሪን
 ጋልባዚ ሜቄላራ ኦይኬቲዴሰ፤
 ታና ሺሺን ኣታዲሰ።

 21 «ታ ሲቆቶ! ጸሳ ኩሼይ
 ታና ሾጪዳ ጊሻሰ
 ኣኔ ዛይ ታሰ ሚሹቲቴ!
 ታሰ ቃጴቲቴ!
 22 ጸሲ ታና ጎደይሳ ማላ
 ኢንቴካ ታና ኣዛሰ ጎዴቲ?
 ሃይሳ ጋካናሰ ኢንቴ ታና
 ዋዪሲዳይሲ ጌዴኔ?
 23 ሃይሳ ጋካናሰ
 ታ ሃሳይዳ ቃላ ኣኬኪዛይኔ
 ማጻፋን ጸፊዛ ኣሲ ዲዛኮ
 ታና ኣይ ማላ ኡፋይሳኔሺን!
 24 ኢሰኪርቶኒኒ ኢርሳሴን ጸፊቲዲ
 ዎይኮ ሹቻ ቦላ
 ዎጩቲ ኡቲዲ
 ሜርናሰ ዳና ማላ
 ኦሲዳኮ
 ኣይ ማላ ታና ኡፋይሳንዴሺን!
 25 ጊዶ ኣቲን ታና ኣሺዛይሲ
 ፓጸ ዴኢዛ ማላ
 ዉርሴሳ ዎዴን
 ታና ዎዛናሰ

- ቢታ ቦላ ኢዚ ኤቃናይሳ
 ታኒ ኤራይሰ።
- 26 ታሰ ጋልባዚ ሜቲቲ ወሪኮካ
 ታኒ ታ ኣሳቴላፌ ሻኬታዳ
 ታኒ ጸሳ ቤያናይሳ ኤራይሰ።
- 27 ሃራ ኣሰ ጊደንታ
 ኢዛካ ታኒ ታ ሁኤን
 ታ ኣይፌራ ቤያና፤
 ታ ዎዚናይካ ሄ ጋላሳዮ
 ኬሂ ላሞቴሰ።
- 28 «ታ ሲቆቶ!
 ታና ዋላሲዲ ዋዪሳናሰ፤
 ሃይሳ ሜቶዛ ኢዚ ባርካ
 ባሰ ኤሂዴሰ» ጊዲ ሃሳዬታ።
- 29 ጸሳ ሃንቆይ ማሻን
 ቃጸዬቴላን
 ጋሊዛ ጊሻሰ ማሻይ
 ኢንቴና ሞንታ ማላ ናጌቲቴ።
 ጸሳ ፒርዳይ ዲዛይሳካ ኤሪቴ።»

20

ዘፋሬ ሃሳያ

- 1 ናእማኔ ዴሬ ኣሰ ዘፋሬይ
 ሂዝጊ ዛሪዴሰ፤
- 2 «ኢዮቤ! ታና ዪሎ ቆፋይ
 ኔ ቦላ ዛሮ
 ኢማና ማላ ሱጊዴሰ፤
 ሄሳ ጊሻሳ
 ታ ሃሳያናዉ ኤሶቲዳይ።
- 3 ታኒ ታና ካዉሺዛ ሴራ ሲያይሰ፤
 ታ ኣኬኪዛ ኣኬካዚ
 ታና ኔሰ
 ዛሮ ኢማ ኢማ ጌሰ።
- 4 «ኣሲ ቢታ ቦላ
 ቤቶሶፌ ዶሚዲ
 ካሴፔ ሃይሳ ማላ

ጊደይሳ ኔ ኤራይ?

5 ኢታ አሳ ጨቁቴላ
ጉሳ ዋዴሳ፤
ጸሳ ካዲዛ አሳታሰ ዲዛ
ኡፋይሳይ ቁጲዳ ኣይፌይ
ጸላና ጋካናሳ።

6 ኢታ ኣሲ ኣይኮካ ኦቶሬቲዲ
ሳሎ ጋኪኮካ፤
ኢዛ ሁኤይ ሻራ ጋኪ
ቦቹንካ፤

7 ኢዚ ባ ሸሻ ኡቴላ ማላ
ሙሌራ ፒቴታና፤
ካሴ ኢዛ ቤዪሼ ዲዛ አሳቲካ፤
(ኢዚ አዋን ዲዜ ጋኔ?)

8 አጉሞ ማላ ቲምኢ ጊ
ዳይዛ ጊሻሰ ቤቴና፤
ኦማርሳ ኤሉንላ ማላ
ኢዚ ዳያና።

9 ኢዚ ዲዛሶፔ ኤሾራ
ዳይዛ ጊሻሰ፤
ኢሲቶ ኢዛ ቤኢዳ ኣሰ
ናምኣንሶ ዛሪ ቤዬና።

10 ኢዛ ናይቲ አዳሺዲ
ኢሰታ አዋይ ማንቆታፔ
ጌኔራ ቦንቂዳ
ሚሻ ዛራና።

11 ዋልቃን ኩሚዳ ዬላጋቴላ
አሳቴላይ ጉላ
ዋዴፔ ጉዬ ቢታ ጊዳና።

12 «ኢታቴላ ኢዛ ዶናን
ካላ ማላ ኣይ ማልኢኮካ
ባ ኢንጻርሳን ኢዚ ላጪ ጸሊኮካ፤

13 ዉሮንታ ማላ ዶናን
ጮሚሼ ጋምኢኮካ

14 ኢዛ ኡሎ ጊዶን
ጫሞን ላሜታና፤
ኢዛሰ ሾሻ

- ማርዜ ማላ ገዳና።
- 15 ኢታ ኣሲ ባ ሚዳ ሚሻ
ኡንኤቲ ዛራና፤
ኡሎ ገደን ዲዛይሳካ
ጸሲ ኢዛ ጮሻና።
- 16 ኢታ ኣሲ ሚዛይሲ ወሪ
ኢዛሰ ሾሻ
ማርዜ ማላ ገዳና፤
ሾሻ ማርዜ ማላ ገዲዲ
ኢዛ ዋጃና።
- 17 ዋጋራ ዛይቲይ ዲኦ ማላ ጎጊሺን
ኤሲኔ ማሊ ሻፋ
ሃላ ማላ ጎጊሺን
ኢዚ ቤኣንታ ሃይቃና።
- 18 ኢዚ ባ ዳቡርዳ ደቡራ ኣይፌ
ዛሬሊ ጌዴ እማና ኣቲን
ባ ሁኤስ ሜና።
ዛልኢዲ ኢዚ ሺሺዳ
ዴኣዛንካ ኡፋዬቴና።
- 19 ሃይሲካ ሃንዛይሲ
ኢዚ ማንቆታ ኡንኤሊዳ
ጊሻሲኔ
ባ ኦሶንታ ኮላ
ጌኔን ኤኪዳ ጊሻላ።
- 20 «ኢዛ ሂርጌቴላዚ
ኢዛሰ ሺምፖ ጳይሲዴሰ፤
ኢዚ ሺሺዳ ሃርይካ
ኢዛ አሻናዉ ዳንዳዬና።
- 21 ኢዛ ሃርይ ወሪ
ቁጨቲ ወሪዛ ጊሻሰ
ኢዛሰ ዶናን ጌልላናዚካ
ኣቴና።
- 22 ኣይኮካ ኢዚ ዱሬ ኣሰ ገዲንካ፤
ኢዛ ዩሎይ ጋካና፤
ዳር ሜቶይካ ኢዛራ ጋይታና።
- 23 ኢዚ ታ ማዳ ካላና ጊሺን
ጸሲ ዋልቃማ ሃንቆ

- ኢዛ ቦላ ይገና፤
ባ ሃንቆዛካ ኢዛ ቦላ ጉሳና።
- 24 ኢዚ ቢራታ ማሻፌ ኣቲኮ
ጸርቂማላ ዋንዳፌን ጫዳታና።
- 25 ዋንዳፌዚካ ዘካራ
ካንሱ ከእና፤
ጸጸልቁ ገዛ ጸራዚ ኢዛሰ
ቲሬዛ ዲቤሬሉዲ ኣቆና፤
ዋልቃማ ሂርጋን
ኢዛ ዋዚናይ ዳጋማና።
- 26 ኢዚ ሺሺዳ ሃርዚ
ኡባይ ገርዲ ገዳ
ቆማ ገዳን ቆያና፤
ኣሲ ኮይሶንታ ታማይ ጸጋና፤
ኢዛሶን ኣቲዛ ሚሽ ኡባ
ዲፒ ሂሰታና።
- 27 ኢዚ ኦሉዳ ናጋራ
ሳሎይ ቆንጪሳና፤
ሳኣያካ ኢዛሰ
ዋርኬ ገዳዳ ዴንዳና።
- 28 ጸሳሰ ሃንቆ ጋላሰ
ኢዛ ሶን ዲዛ ሃርይ ወሪ
ዲኦን ቁጩቲ ቆያና።
- 29 ጸሲ ማካላንቻታሰ
ዋሉዳ ቃዳይ፥
ኢታ ኣሳቲ ኤካና ዋጋይ ሃይሳ።»

21

ኢዮቤ ሃሳያ

- 1 ኢዮቢካ ሂዝጊ ዛሪዳሰ፤
- 2 «ኣኔ ታ ሃሳያ
ዋዚናፔ ኤዝጊቲ፤
ሃይሲ ኢንቲ ታና
ሚንሴሉዳ ማላ
ኢንቲሰ ቆዳታና።
- 3 ኢሲቶ ሃሳያና ማላ
ታሰ ገሺ ኢሚቲ፤
ሄሳፌ ጉዬ ኢንቲ ኮዱዳ ማላ

ታና ቂጃናዉ ዳንዳዬታ።

- 4 «ታኒ አሾ ማይኢዳ አሳ
 ቦላ ሚሼታዚና?
 ሂሰቲን ታሰ ዳንዳዮንታ አጊኮ
 ኢዛን አዚ ማላሊሲዜ?
- 5 አኔ ታኮ ሃ ጸሊቴ፤
 ሃሳያይ ኢንቴና
 ጸናናሼ ጋካናሰ
 ታ ሃኖዚ ኢንቴና ሻጴሰ።
- 6 ታኒ ቆፒሺን ታናካ ዳጋንፊሰ፤
 ታ አሳቴላካ
 ያሻን ኮኮሪሰ።
- 7 «አይሰ ኢታ አሳታ
 ላይላይ አዲቂዲ
 ኢሰታ ሃሮይካ ዳሪዲ
 ቢታ ቦላ ዲዜ?
- 8 አይሰ ኢሰታ ናይቲኔ ናይታ ናይቲ
 ዲጨዲ ሎኢ ዲሺን ቤዪዞ?
- 9 ኢሰቲ አይኮ ሂርጋይ ባይንዳ
 ሳሮን ዳቴሰ፤
 ጸሳፌ ቦሻይ
 ኢሰታ ቦላ ጋኪ ኤሬና።
- 10 ኢሰታ ሜሄቲካ
 ኢሲ ሜቶይ ባይንዳ ዩሌቴቴሰ፤
 ኢሰታሰ ሚዛቲካ
 አዉጫዮንታ ዩሌቴሰ።
- 11 ባንታ ናይታ
 ዶርሳ ዉዳ ማላ ሄሜቴሰ፤
 ኢሰታ ናይቲካ
 ጉፒ ጉፒ ካኤቴሰ።
- 12 ካራቤ ባቂሼ፥ ዲሉ ዲዲሼ፥
 ዲንኬ ፑኒሼ
 ኡፋይሳን ዩጴቴሰ።
- 13 ባንታ ላይላ ዋጌቴላኒኔ
 ኡፋይሳን አሌቴሰ፤
 ዋዩቶንታ ሃ ቢታፌ

ሃይቆን ሻኬቴቴሰ።

- 14 «ሄሲ ሄሳሉ ጊዲ ዲሺን
ኢሰቲ ጸሳ፥
ኦቴ ሃካ፤ ኔ ኦጌ ኤራናሰ
ኑ ኮዮኮ፡፡ ጌቴሰ።
- 15 ኦ ኢዛሰ ጎይናና ማላ
ኡባ ዳንዲይዛ ጸሳይ
ኢዚ ኦኔ?
ኑ ኢዛ ዎሲን ኢዚ ኦና
ኣይ ማዳኔ?» ጌቴሰ።
- 16 ኢሰቲ ሄሳ ጊዛይ
ኢሰታ ኩሼን ዲዛ ሃርይ ዉሪ
ኢሰታ ዎልቃን ኢሰታሰ ሸቂዳ
ሚሳቲዛ ጊሻሳ።
ታኒ ጊዲኮ
ኢታ ኣሳታ ቆፋ ኤኪኬ።
- 17 «ሂሰቲን ኢታ ኣሳታሰ ጸምፔይ
ቶኢ ኤሪዜ?
ቦሻይ ኢሰታ ቦላ ጋኪ ኤሪዜ?
ጸሲካ ኢሰታ ቦላ
ሃንቄቲ ኤሪዜ?
- 18 ኢሰቲ ሃፓ ማላ ጫርኮን ቢዳሶይ
ጉዲላ ማላ ጎቴ ጫርኮን
ኢሰቲ ፒቴቲ
ቆይዳ ዎይይ ዲዜ?
- 19 ኢንቴ፥ ሰዋቲ ቆሂዳ ቆሆን
ጸሲ ናይታ ሃንቄቴሰ፡፡ ጌታ፤
ኣኔ ጸሲ ናጋራንቻታ
ቃጸዮ፤
ሄሳሉ ሃንኮ ባንታ ቆሆ
ኢሰቲ ኣኬካናዉ ዳንዳዬቴሰ።
- 20 ናጋራንቻቲ ባንቲ ኦሒዳ
ቆሆን ባንታ ቂጸቴ ኤኬቶ፤
ኡባ ዳንዲይዛ ጸሲ
ባ ሃንቆዛ ኢሰታ ቦላ ኤሆ።
- 21 ኣሲ ሃይቂዳፔ ጉዬ

ባ ናይታሰ ቆፒ ኤሪዜ?

22 «ጸሲ ጌታ አሳታ ቦላካ ፒርዳና፤
ሂሰቲን አሲ ኢዛ ፒርዳ
ታማርሳና ዳንዳይዜ?

23 ኢሲ ኢሲ አሳቲ
ባንታ ላይላ ወርሴላ
ጋካናሰ አይኮ ሜቶይ
ኢሰታ ቦላ ጋኮንታ ሚኖታኔ
ሃርጌይ ባይንዳይታ ጌዲዲ

24 ኢሰታ ቦላይ ኦርዲዲ
ካይሺዳ ማላ፥
ኢሰታ ሜቁላይካ
ሺጨዳ ማላ ሃይቄቲሰ።

25 ሃራቲ ጌዲኮ ዪሎኔ
ጨሞን ኩሚዳ ማላ
ሜቶን ኦይኬቲዳ ማላ
አይኮ ሎኦ ሚሽ
ቤኦንታ ሃይቄቲሰ።

26 ኡባይካ ዲጌ ዲፎን ጌሊዲ
ቢታ ጌዴቲሰ፤
ጉጹኔይካ ኢሰታ ላታና።

27 «ቤኢቲ! ታና ቆሃናሰ
ቆፒዲ አንቲ ቃቺዳ
ጌኔዛ ታ ኤራይሰ።

28 አንቲ፥ ሃይሳ
ጌታ አዳሶይ አዋኔ?
ናጋራንቻዛ
ዱሳሶይ አዋኔ?› ጌታ።

29 ማንዳራ አሳታ ኦይቺቤኬቲ?
ኢሰቲ አንቲሰ ማርካቲዳ
ማርካቲላ

30 ሄይቲ፥ ሳኢታ አሳታ ቦላ
ቦሻይ ዪዛ ዎዴ
ቆሆይ ኢሰታ ጋኬና፤
ጸሳ ሃንቆይ ቆንጨዛ ዎዴ

- ኢስቲ አቲ ባና ጊዲ ሃሳይዳ።
- 31 ኢታ አስ ኢዛ ኢታቴላ ገሻሰ
 ዋላሲዛይ ኦኔ?
 ኢታ ኦሶዛ ገሻሰ
 ኢዛ ቃጸያናይ ኦኔ?
- 32 ኢዚ ሃይቂዳፔ ጉዬ
 ኢዛ እሃ ቶኪ ኤኪዲ
 ዱፎን ኤፌቴሰ፤
 ኢዛ ዱፎይካ ናጌቴሰ።
- 33 ሾባን ዲዛ ቢታይ
 ኢዛሰ ገጋ ገዴሰ፤
 አሳቲ ኡባይካ ኢዛ ካሌቴሰ፤
 ኣዳፌ ዳሮ አሳቲካ
 ኢዛፔ ሲንላራ ቤቴሰ።
- 34 «ሂስቲን ኢንቴ ሃዳ ገዲዳ ዮኦራ
 ታና ሚንፊላናሰ
 ኣይሰ ቆፔቲ?
 ኢንቴ ታሰ ኢሚዛ
 ዛሮቲ ኡባይ ዋርዶ።»

22

ኤልፋዜ ሃሳያ

- 1 ቲማኔ ዳሬ ኣሰ ኤልፋዜይ
 ሂዝጊ ዛሪዴሰ፤
- 2 «ኣሲ ጸሳ ጎኣናዉ ዳንዳይዜ?
 ሃራይ አቶሺን
 ኤራ ኣሰ ገዲኮካ
 ጎኣዚ ኢዛዳሳፌ አቲን
 ጸሳሰ ገዴና።
- 3 ኔ ጺሎቴሊ ኡባ ዳንዳይዛ
 ጸሳ ኣይ ጎኣኔ?
 ዋሶይ ባይንዳ ኔ ዴኦዚ
 ኢዛ ኣይ ማዳኔ?
- 4 ሂስቲን ኔ ቦላ ኢዚ ፒርዲዳይኔ
 ሃይሳሶ ኔና ሃንቂዳይ

- ኔኒ ጸሰ ያዪካ ገሻሴ?
 5 ሃይሲ ኡባይ ኔና ጋኪዳይ
 ኔ ኢታቴሉ ዳሪዳ
 ገሻሴኔ
 ኔ ናጋራይ ዛዋይ ባይንዳይሳ
 ገዲዳ ገሻሰ ገዴኔ?
 6 ኢሲ ጋሶይካ ባይንዳ
 ኔ ኢሻታፔ ኦይሶ ኤካዳሳ፤
 ቃሴ ኢሰታ ማይኦ ቃራ ኤካዳ
 ኢሰታ ካሎ ኣሻዳሳ።
 7 ጋፊዲኔ ሳሜቲዲ ዳቡርዳይታ
 ካሊኔ ሃሉ ዲጋዳሳ።
 8 ኔ ጋዳዴኔ ዋልቃማ
 ኣሰ ገዲዳ
 ኢዛን ዲዛ ቦንሾ
 ኣሰ ገዲኮካ፤
 9 ኔኒ ኣምኤ ማጫሳታ
 ሜላ ኩሼ ዬዳዳሳ፤
 ዪኦ ናይቲካ
 ባና ኣይሳና ዴኦዛ ቆይሳዳሳ።
 10 ሃይሳ ጋሶን
 ኔና ኦይካና ዋጺማዴይ
 ኔና ዩዩ ኣጲዴሰ፤
 ኔ ኤዘጎንታ
 ሜቶይ ኔና ዳጋንፋና።
 11 ኔና ጼሎይ ሜታና ጋካናሰ
 ኔሰ ቆሚዴሰ፤
 ዲኦ ሃሊካ ኔና ሜጨዴሰ።
 12 «ጸሳይ ቆቃ ሳሎን
 ዲዛይሳ ገዴኔ?
 ጸሊንቴቲ ኣይኮካ
 ቆቃሶሆን ዲኮካ
 ኢዚ ኢሰታፌ ቦላራ ዲዲ
 ኢሰታ ጼሌሰ።
 13 ኔኒ ገዲኮ፡ ረጸሲ ኣይ ኤሪዜ?
 ገርዲ ገዳ ቆማን
 ኢዚ ዋኒ ኦ ቦላ

ፒርዳናው ዳንዳይዜ?

- 14 ሳሎ ቦላን ኢዚ ሲሜሬቲሺን
 ቋፒ ገዳ ሻራይ
 ኢዛ ካሚዛ ገሻሰ
 ኢዚ ቤያናው ዳንዳይና ጋሳ።

- 15 «ናጋራንቻቲ ሲሜሬቲዛ
 ቤኒ ኦጌዛ ኔ ካላይ?

- 16 ኢሰቲካ ዋዴይ ጋኮንታ
 ሲንፋራ ቦሻን ሾጩቲዳ፤
 ዲኦንካ ሚጩቲዲ
 ጸጸራ ቆይዳ።

- 17 ኢሰቲካ ኡባ ዳንዳይዛ ጸሳ፥
 ሉፔ ኔ ሃካ፤
 ኔ ኦሰ ኣይ ኦፋናሰ
 ዳንዳይያ? ገዳ።

- 18 ገዲኮካ ኢሰታ ኩፋ
 ዲሬቱላን
 ኩንፊዳይ ጸሳ።
 ሄሳ ገሻሰ ታኒ
 ኢታ ኣሳታ ቆፋ ኤኪኬ።

- 19 «ኪያ ኣሳቲ ኢታ ኣሳቲ
 ቃጸዬቲሺን
 ቤኢዲ ኡፋዬቲቲሰ፤
 ሱሬ ኣሳቲ ኢሰታ ቦላ ቂልጩቲሰ፥

- 20 ሉቲንካ ኑ ሞርኩቲ ቆይዳ፤
 ኢሰታ ሃርዚ ኩሜሰ
 ታማን ጹጌቲዳሰ።»

- 21 «ሄሳ ገሻሰ ኢዮቤ
 ኔናቲላ ጸሳሰ ሃሪሳ፤
 ኢዛራካ ኔ ሳሮን ዳ፤
 ኔ ሃይሳ ኦፊኮ
 ሎኦ ሚሽ ዴማና።

- 22 ጸሲ ኔሰ ኢሚዛ ቲሚርታ ኤካ፤
 ኢዛ ቃላካ ኔ ዋዚናን ዋፋ።

- 23 ኔናቲላ ኡባ

- ዳንዳይዛ ጸሳኮ
 ኔ ዛሬዳኮ፥
 ኔ ካሴ ማላ ሃናና፤
 ኔ ሶፔ ኢታ ኦሶ ዲጋ።
- 24 ዋርቃ ጉዲላን ኦላ፤
 ኦፊፊ ዋርቃ
 ሻፋ ሹቻ ማላ
 ዋራ ኦላ።
- 25 ሄ ዋዴ ኡባ ዳንዳይዛ
 ጸሳይ ኔሰ
 ዋርቃኔ ሙሩታ ቢራ ጊዳና።
- 26 ሄ ዋዴ ኡባ ዳንዳይዛ ጸሳን
 ኔኒ ኡፋዬታና፤
 ኢዛን አማኔታዳ ኔ ዳና።
- 27 ኔ ኢዛኮ ዋሲዛ ዋዴ
 ኢዚ ኔ ዋሳ ሲያና፤
 ኔ አዲኔቲዳይሳ ኢዛሰ ጋፋና።
- 28 ኔ ቆፋይ ኡባይ ኔሰ ፖሌታና፤
 ኔሰ ኦጌ ኡባይ ፖኦ ጊዳና።
- 29 ጸሲ ኦቶራንቻታ ካዉሻና፤
 አሽኬታ ጊዲኮ ኢዚ አሻና።
- 30 ኔኒካ ሱሬ ዋዚናይ
 ዲዛዴ ጊዲኮ
 ጸሲ ኢታ ኡባፌ ኔና ናጋና፤
 ኔ ኩሼቲካ ቆሆ ኦሶፔ
 ጌሽ ጊዲኮ
 ጸሲ ኔና አሺ ኤካና።»

23

ኢዮቤ ሃሳያ

- 1 ኢዮቢካ ሂዘጊ ዛሬዴሰ፤
- 2 «ሃኢካ ታ ዋዚናይ
 ጫሞ ቆፋኒኔ
 ዙዙንፋን ኩሚዴሰ፤
 ጌንጨጭን ታ ዋሲንካ
 ኢዛ ኩሼይ ታ ቦላ

- ዴዲዳ ማላ ዴስ። *
- 3 ኢዚ ዲዛሶታ ኤሪዳኮ
 ኣይ ማላ ደሳዚናሺን፤
 ጌዴ ኢዚ ዲዛሶ ጋኪዳኮ
 ታ ኣይ ማላ ኡፋዬታኔሺን፤
 4 ታ ማጋና
 ታ ኢዛሰ ሺሻናኮሺን፤
 ታ ሚሻዛ ማራራ
 ታ ኢዛሰ ሺሻናኮሺን።
- 5 ታሰ ኢሜቲዛ ዛርዛዛ
 ታ ኤራናኮሺን፤
 ታና ኢዚ ኣይ ጋናኮ
 ታ ኤራናኮሺን።
- 6 ሂሰቲን ጸሲ ባ ጌታ ዋልቃራ
 ታና ፒርዳንዴሻ?
 ኣካይ፤ ታ ጊዛይሳ ኢዚ ኤዘጋና።
- 7 ሄንካ ሱሬ ኣሲ
 ኢዛራ ማርሼታና፤
 ታሰ ፒርዲዛ ጸሳይ
 ሜርናሰ ታና ናጸ ኬሳና።
- 8 «ጊዶ ኣቲን ታ ኣርሼይ ሞኪዛ ባጋ
 ቢኮ ሄን ኢዚ ዴና፤
 ኣርሼይ ዉሊዛ ባጋካ ሲሚኮ
 ኢዛ ዴማናዉ ዳንዳይኬ።
- 9 ኢዚ ጊዲኮ ፑዴሃን
 ባ ኦሳ ኦሌስ፤
 ታኒ ጊዲኮ ኢዛ ቤያናዉ
 ዳንዳያቤኬ፤
 ዲጌ ባጋ ሲማዳካ
 ኢዛ ዴማናዉ
 ዳንዳያቤኬ።
- 10 ኢዚ ታ ታንጎ ኡባ ኤሬስ፤
 ታና ኢዚ ፓጨኮካ
 ታኒ ዋርቃ ማላ ጌሽ ጊዳ ዲሺን

* 23:2 ኢዛ ኩሼይ ታ ቦላ ዴዲዳ ማላ ዴስ ጊዛይሲ ኢብራዊታ ማጽፋን ታ ኩሼ
 ፑዴ ዴንፋናሰ ታና ዴጼሰ ጌስ።

- ኢዚ ታና ዴማና።
- 11 ታ ቶሆቲ
ኢዚ ደሲዛ ኦጌታራ ቤቴስ፤
ባሌሶን ሃዲርሲካ
ኡሻቸካ ጊኬ።
- 12 ታኒ ኢዛ ኣዛዞታፔ ኬኢኬ፤
ኢዛ ቃላካ
ታ ሚዛ ቁማፔካ ኣሓዳ
ታ ዎዚናን ናጋዲስ።
- 13 «ኢዚ ባርካ ባና ዳንዳይ ዴስ፤
ኢዛራ ኤቄታናይ ዴና፤
ኢዚ ባ ደሲዳይሳ ኡባ
ኦሶ ዳንዳይስ።
- 14 ታ ቦላ ኢዚ ቆፒዳይሳ
ኡባ ፖላና፤
ሃይሳ ሚሳቲዛ
ዳሮ ቆፋቲ ዴቴስ።
- 15 ሄሳ ጊሻስ ኢዛ ሲንፋን
ኤቆይ ኬሂ ያሼስ፤
ታ ሃይሳ ቆፓዳ ያያዲስ።
- 16 ጸሲ ታስ
ዎዚናይ ዳቡራና ማላ
ኦሊዴስ፤
ኡባ ዳንዳይዛ ጸሳይ
ታና ዳጋንሊዴስ።
- 17 ጊርዲ ጊዳ ቋማይ
ታ ኣይፌታ ጎዚኮካ፤
ሳካና ቋማይ ታ ሃሳዮንታ ማላ
ታና ዲጊቤና።

24

- 1 «ኡባ ዳንዳይዛ ጸሳይ
ኣይስ ባ ፒርዳ
ኢማና ጋላሳ ባሪቤኔ?
ኢዛስ ኣማኔቲዳይቲ
ኣዉዴ ጋካናስ
ኢዛ ፒርዳ ቃላ ናጌታንዴቶ?
- 2 ኢታ ኣሳቲ ዛዋ ላሌቴስ፤

- ካይሲ ኤሂዳ ዶርሳታ ሄሜቴስ።
- 3 ዪኦታ ሃሬ ቦንቄቴስ፤
ኢሞኤ ማጫሳያ ቦራ ኦይላዲስ
ጊዲ ባንታስ ኤኬቴስ።
- 4 ማንቆታ ሻቴቲዲ
ጮ ኦጌፔ ጎዴቴስ፤
ኢስታ ሲንላፌ ባቃቲዲ
ቆቴታና ማላ ኦሐቴስ።
- 5 ማንቆቲ ባዞን ዲዛ ሃርዲዳ ማላ፥
ባንታ ናይታስ ካሐ
ኮያና ኬኢዲ ዳቡሬቴስ።
- 6 ኡኔቲዲ ሃራታስ
ካሐ ሺሺዛይታ ጊዴቴስ፤
ኢታ ኦሳታ ሃሮ
ጊዲዳ ዋይኔ ቶኪዛሶሆዛን
ጌዶን ኦቲዳ ፑሹሎ ማጼቴስ።
- 7 ኩሜላ ኦማርስ
ካሎ ኢቺ ኦቄቴስ፤
ሞጩ ኦሺዛ ማይኦይ
ኢስታስ ዴና።
- 8 ዙማ ቦላ ቡኪዛ ኢራን
ኢስታ ኦሳቴላይ ሙሴስ፤
ኦቂዛሶይ ቆዪን
ዛላ ጋርስ ሺቂ ኦቄቴስ።
- 9 ኦዋይ ሃይቂዳ ናይ
ኢስታስ ኦይሌ ጊዳና ማላ
ኦዬይ ቆንሐ ዲጊዲ
ቦንቄቴስ፤
ሜቶቲዳይሳ ናዛ
ባ ኦጮ ገሻስ ጊዲ
ኦይሶ ኤኬቴስ።
- 10 ማንቆቲ ኦይኮ ማይኦይ ባይንዳ
ፓጸ ካሎ ኦሶን ጌሌቴስ።
ካላ ሺሾ ዋዴ
ሚርቄዛ ቶኪ ሚዪሺ
ባንታስ ጋፋን ሃይቄቴስ።
- 11 ኢታ ኦሳታ ጋዴን ዋጋራ ኦይፌፔ
ዛይቴ ኬሴቴስ፤

- ዎይኔ ሚላ አይፈጥ
 ጫጃ አጌቴሴሽን
 ኢስቲ ጊዲኮ ሳሜቴቴስ።
- 12 ካታማታን ሃይቃናስ
 ቶቂዛ አሳቲ ጎታሬቴስ፤
 ማዲንጸዲ አሳቲካ
 ማዶ ኦይሾን ዋሴቴስ።
 ጸሲ ጊዲኮ ኢስታ ቦላ
 ኦሴቲዳ ጌኔዛ ቤዪቤና።
- 13 ፖኦ ኢጸዛ አሳቲ ዴቴስ፤
 ፖኦይ አዛኮ ኤሮንታ ጊሻስ
 ፖኦ ኦጌ ካሌቴና።
- 14 ሼሞፖ ዎዲዛ ኡራይ
 ዎንቶንታ ዴንዲዲ
 ማንቆታኔ ሜቶታንቻታ
 ዎዴስ፤
 ኦማርሲካ ካይሶስ ኬዜስ።
- 15 ላይማ ኡራይ
 ጋዴይ ኦማርሳናይሳ ናጌቴስ፤
 ኦኒካ ቤኦንታ ማላ
 ባ ሲንሳ ጎዜቴስ።
- 16 ካይሶቲ ካይሶታናስ
 ኦማርሳራ ኬል ቦኪ ጌሌቴስ፤
 ጋላስ ጊዲኮ ቆቴቲ ፔኤቴስ።
 ፖኦካ ኢጾቴስ።
- 17 ዲማራ ሸሮቴል
 ኢስታ ኡፋይሲዛ ጊሻስ
 ኡባሲካ ጊርዲ ጊዳ ዲማይ
 ኢስታስ ዎንታ ማላዶ ማላ።
- 18 «ጊዲኮካ ኢስቲ ሃላ ቦላ
 ቤቲዛ ሆሞ ማላ
 ጉላ ዎዴስ ጸላ ኢስቲ ቤታና።
 ኢስታ ቢታይካ
 ቃንጌቲዲይሳ ጊዳና፤
 ኢስቲ ዎይኔ ሚላ
 ቶኪዛሶሆዛ
 ኦኒካ ቤና።
- 19 ሻቺ ሆኦን ማዪዲ

- ጳይዛይሳ ማላ
 ሲኦሌይካ ናጋራንቻታ
 ባኮ ቦንቃ ኤካና።
 20 ኢስታ ኣዩቲ ኡባይ
 ኢስታ ደጋና፤
 ኢስታ ኣሾዛካ ጉጹኔይ ማና፤
 ኢታ ኣሳቲ ቆፌቶኮና፤
 ሄሳሶካ ሚላ ማላ
 ሜቂሬታና።
 21 ሃይሲ ኡባይ ኢስታ ቦላ ጋኪዳይ
 ኢስቲ ዬሎንታ ማይኒዳ ማጫሳታ
 ቦንቂዳ ጊሻሲኔ
 ኢስታ ኣዚናቲ
 ሃይቂዳ ማጫሳታሰ
 ኣይኮ ቃጴቴሊካ
 ቤሶንታ ጊሻሳ።
 22 ጊዶ ኣቲን ጸሲ ባ ዋልቃን
 ዳናቴላን ዲዛ ኣሳታ ዲጋና፤
 ኢስታሰ ዳኑይ ጊጋ ሚሳቲኮካ
 ኢስታ ዱሳሰ
 ኣማንሊዛ ሚሺ ዳና።
 23 ጸሲ ኢስታ
 ሳሮን ዳና ማላ ኦሊኮካ፥
 ኢስቲ ቢዛ ኦጌ ኡባ
 ቲሺ ሂስቲ ጸሌሰ
 24 ኢታ ኣሳቲ ጉላ ዋዴሰ ዱሬታና፤
 ጊዶ ኣቲን ኤሶራ ሻራፋ ማላ
 ሹሊ ጳያና፤
 ሹላ ካላ ማላ ቡጨታና።
 25 «ሃይሳ ማላ ጊዴና ጌቴቲኮ
 ታኒ ዋርዳንቻታኔ
 ታ ሃሳይዳ ቃላይ ሊኬ ጊዶንታይሳ
 ኦኔ ኣማንሳናይ?»

25

ቤሊዳዴ ሃሳያ

- 1 ሹሃ ዳሬ አስ ቤሊዳዴይ
ሂዝጊ ዛሬደስ፤
- 2 «ማታይኔ ያሻቴሉ ደሳሳ፤
ቦላን ባ ሃሪዘሶን ሳሎን
ሳሮቴሉ ሜቆና።
- 3 ኢዛ ዋታዳራታ ቲሪፓቴሉ
ቆዳታናዉ ዳንዳይዜ?
ደሳ ፖኦይ ኢዛስ
ፖኢሶንታዳይ ኦኔ?
- 4 አሲ ደሳ ሲንፋን
ዋኒ ጸሎ ጊዲ
ቤታናዉ ዳንዳይዜ?
አሽ ማይኢዳ ሜቆታ ጊዲዲ
ዋኒ ጌሽ ጊዳናዉ
ዳንዳይዜ?
- 5 ሄኮ ደሳ ሲንፋን አጊናይካ
ሙቃ ቦሐ ጊዳና፤
ደሊንቴቲካ ኢዛ ሲንፋን
ጌሻታ ጊዳቴና።
- 6 ሙሳኔ ጉጹኔ ጊዳዳ ሃይቂዛ አሲ
ሄሳፊካ አይ ማላ ኢታ!»

26

ኢዮቤ ሃሳያ

- 1 ኢዮቤ ሂዝጊ ዛሬደስ፤
- 2 «ሃይሳ ኔ ሃሳዮይሳን
ዳቡራንቻታ ማዲዳ
ኔስ ሚሳቲዜ?
ቄሴይ አርጋጨዳዴ ሚንሉዳ
ኔስ ሚሳቲዜ?
- 3 አጼ ኤራቴሉ ፓጨዳደስ
ኔ አይ ዘሪ አማዲ!
አይ ኤራቴሉካ
ኢዛደስ ቆንጨሳዲ!
- 4 ሂሰቲን ሃይሳ ኔ ሃሳያና ማላ
ኔና ማዲዳይ ኦኔ?
ኔ ሃሳያና ማላ
ኔና ዴንሔሉዳይ

እና አያና!»

5 «ዋልቃማ ዋጋ ጌታ አባፌ
ጋርሳን ዲዛ ሃይቁዳይታ ሼምፖቲ
ዋልቃማ ኮኮርሳን ዴቴሰ።

6 ሲኦሌይካ ጸሳ ሲንላን
ቆንጨን ዴሰ፤
አባዶኔ ጌቴቲዛሶዛ
ኣይ ሚሺካ
ካማናዉ ዳንዳዬና።

7 ጸሲ ፑዴሃ ባጋራ ዲዛ ሳሎዛ
ጫርኮ ቦላ ሚጨዴሰ፤
ቢታካ ኣይኮይ ባይንዳሶን
ኩሎቲ ዳና ማላ ኦሊዴሰ።

8 ጸሲ ሻራቲ
ሃላ ጸንጺ ኦይካና ማላ ኦሌሰ፤
ሃላፌ ዴንዶይሳን
ሻራቲ ዳኬቴቴና።

9 ኢዚ ኡቲዛ
ካዋቴላ ኣራታ ጌንላና፤
ሻራራካ ካማና።

10 ፖኦኔ ቋማ ሻካናሰ
ዋልቃማ ዋጋ ጌታ አባ ሲንላን
ሳሎዛ ዛዋ ኦሊዲ ሚጨዴሰ።

11 ኢዚ ሃንቁዛ ዋዴ
ሳሎ ቱሳቲ ዳጋማን ኮኮሬቴሰ።

12 ኢዚ ባ ዋልቃን አባ ጮኡ ኦሌሰ፤
ኢዛ ኣቶ ኤራቴላይካ
ኤራኣቤ ጌቴቲዛይሳ ቋይሳና።

13 ባ ፔኖዛን ሳሎዛ ጌሻና፤
ጸንጌቲዛ ሸሻ
ባ ኩሼን ጫዳና።

14 ሃይታንቲ ኡባይ
ጸሲ ኦሊዛ ኦሶታፔ
ጉላታ፤
ኦ ሲዪዛይሲ ኢዛሰ ሳሱኬላ ጸላ፤
ዋልቃማ ጌሪሳ ኢዛይሳ
ኦኒ ኣኬካናዉ ዳንዳይዜ?»

27

ኢዮቤ ሃሳያ

- 1 ኢዮቤካ ባ ሃሳያ
ሰንሳው ጉጂዲ ሂዝጊዴስ፤
- 2 «ሱሬ ፒርዳ ዲጊዲ
ታ ሼምፖዮ
አዳፌ ጫሞ ኦሊዳ፤
ኡባ ዳንዳይዛ ዴኦ ጸሳ
ሰንሳን ጫቃይስ፤
- 3 ጸሲ ታና
ሼምፖራ ዋሊዳ
ዋዴይ ጋካናስ፤
- 4 ኡባካ ኢታ ቃላይ
ታ ዶናፔ ኬኤና፤
ታ ኢንጸርሳንካ ዋርዶ ሃሳይኬ።
- 5 ኢንቴ ሃሳይዳይሲ ዉሪ
ሊኬ ጋዳ ሙሉካ ኤኪኬ፤
ታ ሃይቃናሼ ጋካናስ
ሱሬቴላን ሚና
ኤቃናይሳ አጊኬ።
- 6 ታኒ ታ ጸሎቴላን
ሚና ኤቃና አቲን
ጸሎቴላ አጊኬ፤
ሼምፖራ ፓጸ ዲዛ
ላይላ ኡባን
ታ ዋዚናይ ሃ ሚሻን ሲዴና።
- 7 «ናጋራንቻታ ቦላ
ፒርዴቲዛ ማላ
ታ ሞርኬታ ቦላ ፒርዴቶ፤
ታና ኢጸዛይታ ቦላካ
ጌኔ አሳታ ቦላ
ፒርዴቲዛ ማላ ፒርዴቶ።
- 8 ጸሲ ኢስታ ሼምፖዮ
ኢስታ አሾፔ ሻኪዲ
ኢስታ ላይላ ቃንጸዲ ዋዴ
ጸሳ ካዲዳ አሳታስ
አይ ሂዶታይ ዳንዴ?

- 9 ሜቶይ ኢስታ ቦላ ዪዛ ዋዴ
 ጸሲ ኢስታ ዋሶዛ ሲያንዴ?
- 10 ኡባ ዳንዳይዛ ጸሳን
 ኢስቲ ኡፋዬታንዴቶ?
 ዋዴን ዋዴንካ
 ጸሳ ሱንፋ ጴይጋንዴቶ?
- 11 «ጸሳ ዋልቃይ ኣይ ማላ ጊታኮ
 ታ ኢንቴና ታማርሳና፤
 ኡባ ዳንዳይዛ ጸሳይ
 ቆፒ ዋሶይሳ
 ታ ኢንቴፌ ቆቴኬ።
- 12 ኢንቴኒካ ሃይሳ ኡባ ኤሬታ፤
 ሂስቲን ሃይሳ ሃዳ ሚሽ
 ኣይሰ ሃሳዬቲ?
- 13 «ሄኮ ኡባ ዳንዳይዛ ጸሳይ
 ኢታ ኣሲኔ ጌናንቻቲ
 ኤካና ላታይ
 ሃይሳፌ ካሊዛይሳ።
- 14 ኢዛ ናይቲ ቲሪፒኮካ ኦላን ዉራና፤
 ኢዛ ዜሬፋቲካ
 ካሊ ጳዪን ኮሻታና።
- 15 ሃሳፌ ኣቲዳይቲ ሃርጌን ዉራና፤
 ኣምኤቲካ ኢስታሰ ዬኬቴና።
- 16 ኢታ ኣሲ ቢራ
 ቢታ ማላ ሸሻናዉ፥
 ማይኦካ ማና ቢታ ማላ
 ዶራናዉ ዳንዳይሰ።
- 17 ጊዶ ኣቲን ኢታ ኣሲ ሸሺዳ
 ማይኦዛ ጸሎ ኣሲ ማይኣና፤
 ኢዚ ሸሺዳ ቢራካ
 ጌሻቲ ጊሼቲ ኤካና።
- 18 ኢዚ ኬጸዛ ኬፋቲካ
 ኣቻሮ ኬፋ ማላኔ
 ካል ናጊዛዴይ ኣቂዛ
 ጋባ ማላ ላሌታና።
- 19 ኢታ ኣሲ ዉርሴፋ ዋዴ

- ዲሬ ገዲዲ ኢቼስ፤
 ኢዚ በገዛ ዋዴ ገዲኮ
 ኢዛ አቆታይ ኡባይ ሳይደሰ።
- 20 ዳጋማይ ኢዛ ቦላ ዲኦ ማላ
 ቆፖንታ ዲሺን ጋካና፤
 ገዶላካ ጎቲ ጫርኮይ
 ኢዛ ዴንሉ ኤፋና።
- 21 ኣርሼይ ሞኪዛሶ ባጋ ጫርኮይ
 ኢዛሶፔ ኢዛ ፒቲ ሳይሳና።
- 22 ኢዚ ባቃቲዲ ኣቲ ባናሰ
 ባጼቲኮካ
 ጫርኮዚ ቃዴቴሉ ባይንዳ
 ኢዛ ቦላ ጌዴ ሚናና።
- 23 ጫርኮዚ ኢዛ ቦላ ኩሼ ባቂደሰ፤
 ኢዚ ዲዛሶፔ ዋይቁላን
 ፒጺሪ ዬገደሰ።

28

- አዶ ኤራቴሉ ናሻናሰ ሺቁዳ ጊንጾ
- 1 «ቲማፔ ቢታ ጋርሳን ዲዛ
 ማኢዲኔቲ ቦኬቲዲ
 ቢራ ኬኢዛሶይኔ
 ዋርቃይ ሴሪ ኦሴቲዛሶይ ደሰ።
- 2 ቢራታይ ቢታፌ ቤቴሰ፤
 ጸርቁማላይ ማኢዲኔ ሹቻፌ
 ሴሪዲ ኬኤሰ።
- 3 ኣሳይ ቋማ ካንሉዲ፤
 ዲጌ ቢታ ገዶ ቦኪ ጌሊዲ
 ሃኪ ዲዛሶዛ ዲጌ ዋዲዲ
 ገርዲ ገዴ ቋማ ገዶን
 ማኢዲኔ ሹቻ ኮዬቴሰ።
- 4 ኣሲ ዲዛሶፔ ሃኪዲ፤
 ኣሳ ቶሆይ ዬዲ ኤርንታሶ
 ጋኬቴሰ።
 ሄንካ ጨማ ኦላ
 ቦኬቴሰ፤
 ዋዶሮ ቦላራ
 ኩሎቲ ኩሎቲ ዋዲዲ

- እሳፔ ሻኬቲ ባርካ
ኦሌቴሰ።
- 5 ቢታይ ሚቴቲዛ ካል ኢሜሰ።
ኢዛሰ ጊደይ ታማን ሰሪዲ
ሺሬቲ ሺሬቲ ዋጂሰ።
- 6 ሰምፔሬ ጌቴቲዛ አልኦ ሹቻይ
ቢታን ዲዛ ሹቻታ ጊደን ቤቴሰ፤
ሄ ቢታ ጊደንካ
ዋርቃይ ቤቴሰ።
- 7 ጌዴ ማኢዲኔዛኮ ኤፊዛ ኦጌ
ጸሎይካ ኤሬና፤
አንኮታ አይፌይካ ቤዪቤና።
- 8 ኢታ ዶኣቲ ሄ ሶሆዛ
ዬጂቤቴና፤
ጋሞይካ ኢዛ ባጋራ
አጂቤና።
- 9 አሲ ጋዴ ጎዪሼ ሚኖ ሹቻታ
ባ ኩሼን ዴንፊሰ፤
ዙማታካ ጸጸፔ
ሺሪ ዩጌሰ።
- 10 ዛላካ ጳልቂዲ
ኢዛ ጊደራ አዳናሰ
ኦጌ ኬሴሰ፤
አልኦ ጊዲዲ ማኢዲኔ
ሹቻታካ ዴሜሰ።
- 11 ሻፋታ ፑልቶታ ቲቄሰ፤
ቢታ ጊደን ቆታን ዲዛ
ሚሻታ ቆንጨ ኬሴሰ።
- 12 ሂሰቲን አጼ ኤራቴሊ
አዋፔ ቤቴዜ?
አኬካሰካ ዲዛሶይ አዋ?
- 13 አጼ ኤራቴሊ
ሼምፖራ ፓጻ ዲዛ ሜጂታቲ
ዲዛ ቢታን ቤቴኩ፤
ኢዚሰ ቱማ ዋጋካ
ኤሪዛ አሲ ዴና።
- 14 ሳዋጋ ጊታ አባይካ
ታ ጊደን ዲኩ፤

- አባይካ ታናራ ዱኩጎ ጌሰ።
- 15 ኤራቴሌ ጌሻ
ዋርቃን ሻሜቱኩ፤
ኢዚ ዋጋይካ
ቢራን ሄሪጌቴና።
- 16 አጾ ኤራቴሌ
ኦፊፊ ጌቴቲዛ ዋርቃፊ፤
ማርጊዴኔ ሴምፔሪ ጌቴቲዛ
ኣልኦ ሹቻታፔ
ኣቃ ሶንቹቲዳሮ።
- 17 ዋርቃይኔ ጌሻ ሄሪጋይ
ኢዚራ ጊናቴቴና፤
ጸንታ ዋርቃፊ ኦሴቲዳ
ጌጼይካ ኢዞ ላማና።
- 18 ሶንቹቲዳ ሄሌሎይኔ
ኣልማዜ ጌቴቲዛይቲ
ኣጾ ኤራቴላራ ጊናቴቴና፤
ኣጾ ኤራቴላ ጋቴይ
ሉሌ ጌቴቲዛይሳፊካ ሶላ።
- 19 ቶጳዚዮኔ ጌቴቲዛ
ቶጳያ ቢታ ኢንቁይካ
ኢዚራ ጊኔና፤
ከሂ ጌዪዳ
ዋርቃፊካ ኣቃዉሰ።
- 20 «ሂሰቲኮ ኤራቴሌ ኣዋፔ ያዜ?
ኣኬካይካ ኣዋፔ ቤታዜ?
- 21 ሼምፖራ ፓጻ ዲዛ
ሜዴታታፔ ጌሚዳሮ፤
ሳሎራ ፒራዲዛ ካፎቲካ
ኮዪዲ ኢዞ ዴሜቴና።
- 22 ቃዮይኔ ሃይቆይ፤
ኅኑ ኢዚ ጊሻሰ ኤሪዛይ
ዋሪን ጸላጎ ጌቴሰ። *
- 23 ኣጾ ኤራቴላኮ ኤፊዛ ኦጌዛኔ
ኢዛ ዲዛሶዛ ኤሪዛይ ጸላ ጸላ።

* 28:22 ዋሪ ጊዛይሳ ኢሲ ኢሲ ባጋ ጋሞላ ቃላን ፓፑንላ ጌቴሰ።

- 24 ኢዚካ ሳኣ ጋጸ ኩሜል ዴሜሰ፤
 ሳሎፔ ጋርሳን ዲዛይሳ
 ኡባ ቤዴሰ።
- 25 ኢዚ ጫርኮ ዋልቃ ኦሊዳ ዋዴ
 ዋጋ ጊታ ኣባ
 ኢዚ ማኪዳ ዋዴ፥
 26 ኢራሲኔ ዋልቃንፋራ ዲዛ
 ዲዳሰ ዋጋ ዋሊዳ ዋዴ፥
 27 ጸሲ ኤራቴል ቤዴዴሰ፤
 ፓጪ ጸሊዲ ኢዞ ቦንቺዴሰ፤
 ፒልጊ ቤኢዲ ሚንሊ ዋሊዴሰ።
- 28 ሄ ዋዴ ኣሳሰ፥
 ሩሄኮ ኤራቴል ጉሲ
 ጸሳሰ ያሻቴላ፤
 ኣኬካ ጉሲ
 ኢታፔ ሃኮ ጊዴሰ።»

29

- ኢዮቤ ወርሴላን ሺሺዳ ማጋና
- 1 ኢዮቤካ ባ ሃሳያ
 ሰንል ጉጂዲ ሂዘጊዴሰ፤
- 2 «ታሰ ሃኢ ዴኦዚ
 ካሴ ጸሲ ታና
 ናጊዛ ዋዴዛ ማላ ጊዲዳኮ
 ታና ኣይ ማላ ኡፋይሳንዴሻ!
- 3 ሄ ዋዴ ጳማ ጊዶራ ታ ቢሺን
 ጸሲ ታሰ ፖኢሲሺን
 ታኒ ፖኦን ሄሜታይሲኮሺን።
- 4 ጸሳ ማዶይ ታ ኬላ
 ካሴ ናቴቴላ ዋዴ
 ናጊዛይሳላ
 ሃኢካ ናጊዳኮ
 ኣዜ ዲዛይ?
- 5 ኡባ ዲንዳይዛ ጸሳይ
 ታናራ ዲዛ ጊሻሰ
 ታ ናይቲ ኡባይ

- ታ ዩሾን ዴቴሰኮሺን።
- 6 ታኒ ቶሆ ማላን
 ሜጩታናሼ ጋካናሰ
 ዳሮ ማሐ ዴማይሰኮሺን፤
 ዋጋራ ሚላቲ
 ሚላ ቢታንካ ቶኬቲዲ
 ዲኦ ማላ ጎጊዛ ዳሮ ዛይቲ
 ታሰ ኢሜቴሰኮሺን።
- 7 ካታማ ፔንጌ ኣቻን ዲዛ
 ዲቡሻ ባዳ
 ዲላታን ታ ኡቲዛ ዎዴ፥
 8 ናቴላ ናይቲ ታና ቤኢዲ፥
 ቦንቾሰ ታ ሲንላፌ
 ኢሲ ባጋ ጌቴሲሺን፤
 ጨማቲካ ታ ቦንቾ ጊሻሰ
 ባ ኡቲዳሶሆፔ
 ዴንዲ ኤቄቴሲሺን።
- 9 ሃሳይሼ ዲዛ ዴሬ ካሌሊዛይቲ
 ታና ቤኢዲ ባንታ ኩሼታን
 ባ ዶና ዶና ኦይኪዲ
 ጮኡ ጌቴሰኮሺን።
- 10 ዴሬ ዳናቲካ ታኒ ዲዛሶን
 ጮኡ ጌቴሲሺን፤
 ኢሰታሰ ኢንጻርሲ ኦይኬቲን
 ሃሳይካ ኢሰታ ጸኔሰኮሺን።
- 11 ታና ሲዪዳ ኡባይ ናሺዴሰ፤
 ታና ቤኢዳ ኡባይ ጋላቲዴሰ።
- 12 ሃይሲካ ሃኒዳይ
 ታኒ ማንቆታ ዎሳ ሲያዳ
 ኢሰታ ኣሺዛይሳኔ
 ዪኦ ናይታ ታ ማዲዛ ጊሻሳ።
- 13 ሃይቃና ማቲዳ ኣሳታ
 ታ ማዲዛ ጊሻሰ
 ታና ኢሰቲ ኣንጂዲ፤
 ኣምኤ ማጫሳታ
 ታ ማዲዛ ጊሻሰ
 ኡፋይሳን ዩዲዳ።

- 14 ዲሎቴል ማይኦ ማላ ማይኦሲስ፤
ሱሬ ፒርዳካ
ካባ ማላ ጎጸ ማይኦሲስ፤
ቆቤ ማላካ
ሁኤን ዋላሲስ።
- 15 ቆቂታስ ኣይፌ፤
ዎቤታስካ ቶሆ ጊዳሲስኮሺን።
- 16 ማንቆታስ ኣዋ፤
ታ ኤሮንታ ኣሳታስካ
ኣፓካቶኮሺን።
- 17 ጌኔ ኣሳ ባንቂላ ሜንላሲስ፤
ኢዚ ቦንቂ ኤኪዳይሳካ
ኢዛ ዶናፔ ዩጊሳሲስ።
- 18 «ታኒ፥ ታ ላይላይ
ኣንጮ ማላ ዳሪን
ታኒ ታሶን ዲዛ ማላ
ቦንቾን ሃይቃና
ጋዲስኮሺን።
- 19 ጸጸቲ ኡባ ዎዴ
ሃሌ ዴሚዛ ማላኔ
ሃጋቲካ ጸዛን
ጨሊሊዛ ሚላ ማላኮሺን።
- 20 ኡባ ዎዴ
ታ ቦንቼቲዳ ማላ
ዳይስኮሺን፤
ታ ዎልቃይካ
ኡባ ዎዴ ኦራዴስኮሺን።
- 21 ኣሳይ ታ ዞሬዛ
ላሞታን ጮኡ ጊዲ ኤዝጌስ።
- 22 ታ ሃሳያይ ኢስታ ኣሊዛ ጊሻስ
ታፔ ጉዬራ ሃሳይዛ
ኣሲ ዴና።
- 23 ጎሻንቻይ ባጼሳ
ኢራ ዴማናው
ኣሞቲዛይሳ ማላ
ኢስቲካ ታ ሃሳያ ሲያናው
ባንታ ዶና ዶይዲ

- ናጌቴሰኮሺን።
 24 ታ ሚጫ ቤሲሺን
 ኢሰቲ ኡፋዬቴቴሰ፤
 ታ ሲንላይ ፖኢሺን ጸርጾቲዳ
 ኢሰታ ሲንላይ ቢርሼቴሰ።
 25 ካሴ ታ ኢሰቲ
 ኮዪዳ ማላ አይሳይሰኮሺን፤
 ባ ኦላ አሳ ካሌሊዛ
 ካዎ ማላ
 ታ ኢሰታ ካሌላዲሰኮሺን፤
 ኢሰቲ ሙዞቲሺን
 ታኒ ኢሰታ
 ሚንፍላይሲኮሺን።

30

- 1 «ኢሰታ አዋቲ
 ታሰ ዶርሳ ዉዴዛ ሄሚዛ
 ታ ካናታራ ሞንታ ማላ
 ኢሰቲ ታ ካጂዛ አሳታኮሺን፤
 ሃኢ ገዲኮ
 ላይላን ታፔ ናቲዛ አሳቲ
 ታ ቦላ ቁልጮቴሰ።
 2 ኢሰታሰ ዎልቃይ ኢጺዳ ገሻሲኔ
 ኢሰታ ቦላይ ገልቂዳ ገሻሰ
 አይኮካ ታና ጎኤቴና።
 3 ሜቶፔኔ ኮሻ ዳሮፔ
 ዴንዲዳይሳን
 ባዞ ቢታ ቢ ቢዲ
 ሚላ ጸጸ ማጾሊ
 ጋንጨቴሰ።
 4 ማጺኔ ማላ ማልኢዛ ባዞን
 ሞኪዛ ዲማ ዲማ
 ሚላ ሃይላታ ማጾቴሰ፤
 ማልኦንታ ሳንካራ ጸጸ
 ቆሬሬሊ ሜቴሰ።
 5 አሲ ካይሶታ ዋሲዲ
 ጎዲዛይሳ ማላ
 ኢሰቲካ ዴራ ገደፌ ጎዴቴሰ።

- 6 ኢስቲ ባንታ ዱሳሶ
 ሃሊ ባይንዳ ሻፋ ጊደን፥
 ኣሲ ባይንዳ ባዞ ቢታኒኔ
 ኬልካ ጊደን ቦኬቲዳ
 ጎንጎሎታን
 ደሳይ ባይንዳ ዴኢዳ።
- 7 ዋራይ ዲዛሶ ዩዪ ዩዪ
 ዋራ ደኣታ ማላ ዋሴቲስ፤
 ዋራ ጋርሳን ኢሲ ቦላ
 ሸቄቲ ኣቄቲስ።
- 8 ባንታ ቢታፌ ጹርቃፌን ሾጮቲ
 ጎዴቲዳ ጊሻስ
 ሎኦ ሱንሊኔ ዋዚናይ
 ባይንዳይታ ጊዲዲ ዴቲስ።
- 9 ሃኢ ቃሴ ኢስታ ናይቲ
 ዩላን ታና ቂዴቲስ፤
 ታኒ ኢስታ ጊደንካ
 ሚጮቲላስ ኣታዲስ።
- 10 ታና ሻቲቲዲ
 ታፔ ሃኬቲስ፤
 ኣይኮ ዩላይካ ባይንዳ
 ታ ሲንላን ጮቲቲቲስ።
- 11 ጸሳይ ታ ዋልቃ ዳቡርሲዲ
 ታና ካዉሺዳ ጊሻስ
 ኢስቲ ቃሴ ቢጸላይ ባይንዳ
 ፓራ ማላ
 ታ ቦላ ቶቶ ቶዴቲስ።
- 12 ታፔ ኡሻቻ ባጋራ
 ዩዳ ዲጪዲይቲ
 ታ ቦላ ዴንዲዳ፤
 ታና ኦይካናስ
 ዋጺማዴ ዋሊዳ፤
 ታና ጊደሊዳ።
- 13 ታስ ኣጲዛሶ ጳይሲዲ
 ታና ዋጳና ኮዬቲስ።
 ኢስቲ ሃይሳሶ ኦላናይሳ
 ዲጋናዴይ ዴና።
- 14 ዲኦይ ሜንሊ ጌሊዛይሳ ማላ

- ኢስቲካ ታና ጨጌ ጌሊዳ፤
ኡባካ ማንፌሬሊዳ
ታ ቦላ ዪዳ።
- 15 ጌታ ዳጋማይ ታና ጋኪዴስ፤
ታስ ዲዛ ቦንቾይ
ጫርኮ ማላ አፂዴስ፤
ታ አታና ጌዛ ሂዶታይ
ሻራ ማላ ዴንዲ ቆይዴስ።
- 16 «ታ ሼምፖፖ ኬሃ ጨጫዴስ፤
ሃይቆስካ ማታዴስ።
- 17 እማርስ ኩሜል ታ ሜቄላቲ
ሃርጌን ዋዬቲቲስ፤
ሳኮዚካ ታስ ሼምፖ
እሜና።
- 18 ታና ሳኪዛ
ዋልቃማ ሳኮዛ ጋሶን
ታ ማይኦይ ጉንዲ ሞሬቲዴስ፤
ቆጄ ጸንፋ ሻሚዜ ማላ
ታና ጨሊ ኦይኪዴስ።
- 19 ጸሲ ታና ዲጌ
ቢታን ኦሊዳ ጌሻስ
ታኒ ጉዲላኔ
ቢዲንል ሚሳታዲስ።
- 20 ጸሶ፥ ታ ኔና ዋሳዲስ፤
ጌዶ አቲን ኔ ታስ ዛራቤካ፤
ታ ኤቃዳ ኔኮ ዋሳዲስ፤
ኔኒ ጌዲኮ ኔ ሲንፋ
ታኮ ዛራቤካ።
- 21 ኔ ታስ አዳፌ ማንዴ ኢታዳሳ፤
ኔኒ ኔ ጌታ ዋልቃንካ
ታና ጎዳዳሳ።
- 22 ኔ ታና ዴንፋዳ
ጫርኮ ቦላ ዋላዳሳ፤
ኢዚ ታና ዩሻና ማላካ
እፋዳሳ፤
ጎቴ ጫርኮይካ
ታና ሺሬቺ ሺሬቺ

- ዬጌሰ።
- 23 አሳ ኡባሰ ቃዳ ጊዲዳ ሃይቆስ
ኔ ታና አፋዳ ኢማናይሳ
ታ ኤራይሰ።
- 24 «ኢሲ ሜቶቲዳ ኡራይ
ማዶ ዴማናሰ
ባ ኩሼ ሚጨዲ ዋሲሺን
ቱማፔ አይ አሲካ ኢዛ ቆሄና።
- 25 ታኒ ሜቶቲዳ አሳታሰ
ዴካቤኪና?
ማንቆታሰካ ሚሼታቤኪና?
- 26 ሎኦ ሚሽ ዴማና ጋ
ታ ናጊሺን
ኢታ ሚሽ ታና ጋኪዴሰ፤
ፖኦይ ያና ጋ ታ ናጌቲሺን
ታሰ ጋላሳይ ጳሚዴሰ።
- 27 ታ ዋዚናይ ዳሮ ጨጨዴሰ፤
አይ ሳሮካ ዴማቤኬ፤
ሜቶ ጋላሳቲካ
ታ ቦላ ጋኪዳ።
- 28 ታ ቦላይ አዋ ጹሳን ጊዶንታ
ሙዘቲፋን ካሬዲዴሰ፤
ዱላታ አሳ ሲንፋን ኤቃዳ
ማዶ ታሰ ኦይቻይሰ።
- 29 አሳፔ ሻኬታዳ
ዋራካናታሰ አሻ፥
ጉቶታሰ ላጌ ጊዳዲሰ።
- 30 ታሰ ጋልባዚ ካሬዲዲ ዴንዲዴሰ፤
ታሰ ቦላዚካ
ሚሻን ጹጌቲዴሰ።
- 31 ታኒ ታ ኡፋይሰ
ኢሰታን ቆንጨሲዛ
ባጋናኔ ዛዬይ
ሃኢ ታ ካዮታዳ
ኬሲዛ ዚላሳ ቃላ
ሲሲዛ ሚሽ ጊዲዳ።

31

ኢዮቢ ባ ወርሱፋ ሃሳያ ፖሊዴስ

- 1 «ሎኦ ማጫሳኮ ያላዳ
አሞቶንታ ማላ፤
ታኒ ታ አይፌታራ ጫቆ ጌላዲስ።
- 2 ቦላን ዴኢዛ ጸሳይ
አሳስ አይ ቃዳ ኢማንዴሻ?
ሳሎን ዲዛ ኡባ
ዳንዳይዛ ጸሳፌ
አሳስ ኢሜቲዳ ጊሻይ ኣዜሻ?
- 3 ኢታ አሳ ቦላ ቆሆይ፥
ናጋራንቻ አሳ ቦላካ ቆዮይ
ጋካናይሲ ኤሬቲዳዝ ጊዴኔ?
- 4 ጸሳይ ታ ኦሲዛይሳ
ኡባ ቤዬኔ?
ታ ሄሜታካ ሻኪ ኤሬኔ?
- 5 ታኒ ዋርዶ ሃሳይዳ ጊዲኮ፥
አሳካ ባሌላዳ ጊዲኮ፤
- 6 ጸሲ ታና ሱሬ
ጌዳራን ጌዳሮ።
ታኒ ጸሎ ጊዲዳይሳ ሻኪ ኤሮ።
- 7 ታ ሱሬ ኦፔፔ ከኢዳ ጊዲኮ፥
ታ አይፌይ ቤኢዳ ኡባ
ታ ዋዚናይ አሞቲዳ ጊዲኮ፥
ቃሴካ ታ ኩሼይ
ናጋራን ቱኒዳ ጊዲኮ፥
- 8 ታኒ ዜሪዳይሳ ሃራ አሲ ሞ።
ታ ጫሬቻዚካ ኩሜላ
ሾዴቲ ኦሌቶ።
- 9 «ታ ዋዚናይ
ሃራ ማጫ አሞቲዳ ጊዲኮ፥
ታ ሾሮዛ ማቾ
ላይማታናስ ኢዛ ፔንጌን
ታ ዙጊዳ ጊዲኮ፥
- 10 ታ ማቻ ሃራ አሳስ ጋጩ፤
ቃሴካ ሃራ አዴይ ኢዚራ ዚንኦ።

- 11 ሃይሲካ ኬሂ ቱና፤
ዋጋንካ ቃጸይሲዛ ናጋራ።
- 12 ሃ ናጋራይ ታማ ማላ
ጹጊዛ ጊሻሰ
ታ ሃይሳ ኦሊዳኮ
ታ ኣቆታ ጹጊ
ቃይሳናኮሺን።
- 13 «ማጫኔ ኣቱማ ጊዲዳ
ታ ኣይሌቲ ታና ሞቲን
ኢሰታ ሞቶዛ
ታ ካቃዳ ኣጊዳ ጊዲኮ፥
- 14 ጸሲ ታና ፒርዲዛ ዎዴ
ታኒ ዋናኔ?
ቃሴ ኢዚ ታና ኦይቺዛ ዎዴ
ታኒ ኣይ ዛሮ ኢማኔ?
- 15 ታ ኣይይ ኡሎን ታና ሜዲዳይሲ
ታ ኣይሌታካ ሜዲዳይ
ኢዛ ጊዴኔ?
ኩና ኡባታካ
ኣዪ ኡሎን ሜዲዳይ
ኢዛ ዴኔ?
- 16 «ማንቆቲ ታና ዎሲን
ታ ዲጋ ኤሪኬ፤
ቃሴካ ኣሞኤ ማጫሳታ
ሚንሉሉንታ
ኣጋ ኤሪኬ።
- 17 ዪኦኔ ዪቶ ናይታ ኣጋዳ
ታ ካሐ ታርካ ማቤኬ።
- 18 ታኒ ታ ዬላጋቲላፌ ደማዳ
ታኒ ኢሰታ ኣዋ ማላ ዲቻዲሰ፥
ታ ዴኦ ላይሐ ኡባን
ኣሞኤ ማጫሳታ ማዳዲሰ።
- 19 ማይኦይ ቃዪን
ሜጎይ ዎዲዛዴ፤
ዎይኮ ሜቶፔ ዴንዲዳይሳን
ካሎ ዲዛዴ ቤያዳ፥

- 20 ታ ደርሳታ ኢስኬፌ
 ኦሴቲዳ ማይኦ ታ ማይዚን፥
 ኢዛዴ ሆኢን ታና ዛሪ ጋላቶንታ
 ኢጊዳ ዋዴይ ዴና።
- 21 ታኒ ሞቶን ኢስታ
 ላላናይሳ ኤራዳ
 አዋይ ባይንዳ ናይታ
 ናቂዳ ጊዲኮ፥
 22 ታ ኩሼይ ሃሼፔ ኬኦ።
 ታ ቄሴይካ ኩሬዛፔ ኮልዶ።
- 23 ታኒ ጸሳ ሃንቆሰ
 ያዪዛ ጊሻሲኔ
 ኢዛ ቲማቲላሰ ያዪዛ ጊሻሰ
 ሃይሳ ማላ ዮኦታ አላናፌ
 ታ ዳንዳይኬ።
- 24 «ታኒ ታሰ ዲዛ
 አቆታን አማኔታቤኬ።
 ዋይኮ ፓያ ዋርቃካ
 ታሰ አማኔቲዛ
 ሚሽ አላቤኬ።
- 25 ታሰ ዲዛ አቆይ ዳሪዴሰ፤
 ታኒ ዱሬቲላፌ ዴንዲዳይሳን
 ዳሮ ሚሽ ዴማዲሰ፥ ጋዳ
 ኡፋዬታ ኤሪኬ።
- 26 አርሼ ፖኦዛ ቤያዳ፥
 አጊና ሎኤቲላ ቤያዳ፥
 27 ታ ዋዚናን ኢስታ
 ጌማራ ቦንቻቤኬ፤
 ቃሴካ ታ ኩሼ ሚጫ ዬራዳ
 ኢስታሰ ጎይናቤኬ።
- 28 ታኒ ሃይሳ ማላ አላዳኮ
 ሳሎን ዲዛ ጸሳ
 ካዶ ጊዲዳ ጊሻሰ
 ሃይቲ ሃ ኦሶቲ
 ታ ቦላ ፒርዳ ኤሂዛ ናጋራታ።
- 29 «ታ ሞርኬታ ኩንዴላን

- ታኒ ኡፋዬታቤኬ፤
 ኢታ ሚሺ ኢስታ ቦላ
 ጋኪሺንካ ሚጫቤኬ።
 30 «ታ ሞርኬቲ ጳዩቶ» ጋ ቃንጋዳ
 ናጋራ ኦሳቤኬ።
 31 ታኒ ኡባ ዋዴ
 ኢማላ ሞኪዛይሳ
 ታሶ ኣይሌቲ
 ታ ጊሻሰ ማርካቴቴሰ።
 32 ታኒ ታ ኬላ ካሬ
 ኦጌራ ኣጲ ቢዛ ማንዳራሰ
 ደያ ዋላዲሰ።
 ሄሳ ጊሻሰ ጋዴይ ቃሚን
 ዪዳ ኢማሊ
 ካሬን ኣይሳ ኤሪኬ።
 33 ታኒ ታ ሞሮ ጌንሳቤኬ፤
 ሃራ ኣሳታ ማላ
 ታ ናጋራካ ቆታቤኬ።
 34 ታና ኣሳ ዳሮይ ያሺሲኒኔ
 ሶ ኣሳታ ካጶይ ዳጋንሊን
 ታኒ ታሶን ጮኡ ጋዳ
 ቆቴቲዳ ዋዴይ ዴና።
 35 «ታ ጊዛይሳ ሲዪዛዴይ
 ቤቴሬኔሺን!
 ታኒካ ቴቄ ቃላ
 ሺሻናኮሺን!
 ኡባ ዳንዳይዛ ጸሳይ
 ታ ጊዛይሳ ዛሮ ኢዚ ኢሞ!
 ታና ሞቲዛ ሞታንቻይ
 ታና ሞቲዛይሳ
 ጸፊ ሺሺን
 ታ ቤያርኪናሺን!
 36 ዋይቶ ማላ ታኒ
 ታ ሃሺን ቶካናኮሺን፤
 ካላቻ ማላካ
 ታ ሁኤ ቦላ ጎጻና።
 37 ዳናቴሊ ዲዛ ኣሳ ማላ

ጸሳ ሲንሳን
ያዮንታ ኤቃዳ
ታ ኦሊዳ ኡባ
ቆንጨሳ ዮታናኮሺን።

- 38 «አሳ ጋዴ ዋጋይ ባይንዳ
ቦንቃ ኤካዳ
ታኒ ጎዪዳ ጊዲኮ፥
39 ሄ ጋዳ ጎዳታ
ታ ሚሺሲዳ ጊዲኮ፥
አይኮካ ኢስታስ አሞንታ ዳሺ
ሞኪዳ ካላ
ታኒ ሚዳ ጊዲኮ፥
40 ሄ ታ ጎዪዛ ጎሻሶን ዲዛ
ጊስቲ ጊሻስ አጉንሏ፥
ባንጋ ጊሻስ
ሻራፋይ ሞኮ» ጊዴስ።
ኢዮቤ ባ ሃሳያ
ሃይሳን ፖሊዴስ።

32

ኤሊሁ ሃሳያ
(32:1—37:24)

- ¹ ኢዮቤ፥ «ታኒ ጸሎ አሳ» ጊዛ ቆፋ ላሞንታ ጊሻስ ሄሹ
አሳቲ ኢዛ ዘሪዛይሳ አጊዳ።
² ኤራማ ዘሪሳፌ ቡዜ ዴሬ አስ ባራኬሌ ና ኤሊሁይ ኢዮቤ
ባና ጸሳፌ አሊዲ ጸሊሲዳ ጊሻስ ኢዮቤ ቦላ ኬሂ ሃንቄቲዴስ።
³ ቃሴካ ኢዮቤ ላጌ ሄሻቲ ኢዮቤ ቦላ ፒርዳፌ አቲን ኢዛ
አማንሏዛ ቃላ ዮቲ አማንሶንታ ጊሻስ ኢስታ ቦላካ ሃንቄቲዴስ።
⁴ ኤሊሁይ ሃንኮይታፔ ዬላጋ ጊዲዳ ጊሻስ ሃንኮይቲ ባንታስ
ዲዛይሳ ሃሳዪ ዉርሳናሺ ጋካናስ ኢዮቤራ ሃሳያናዉ ባ ታራ ናጎ
ቦላ ዴስ።
⁵ ኢዮቤ ላጌ ሄሻቲ ኢዮቤስ ቤሲዛ ዛሮ አማናስ ዳንዳዮንታይሳ
ቤኢዲ ኬሂ ሃንቄቲዴስ።
⁶ ቡዜ ዴሬ አስ ባራኬሌ ና ኤሊሁይ፥
«ታኒ አንቴፌ ዬላጋ ጊዲዳ
ጊሻሲኔ

- አንቲ ጨማ ገዲዳ ገሻሰ
 ፖኮይኔ ያሺ ታና ኦይኪን
 ሃኖ ጋካናሰ
 ታ ቆፋ ቆንጨሶንታ ጋምኣዲሰ።
 7 «ጨማቲ ሲንላቲ ሃሳዬቶ፤
 ባንታ ላይላን ዴሚዳ
 አቶ ኤራቴላፌ ታማርሴቶ)
 ጋ ቆፓዲሰ።
 8 ገዶ አቲን አሳ ገዶን አቂዲ
 አቶ ኤራቴላ አሳሰ አሚዛይ
 ኡባ ዳንዳይዛ ዶሳ ኣያና።
 9 አሰ አቶ ኤራንቻ ኬሲዛይ
 ጨማቴላ ገዴና፤
 ቃሴካ ኣሲ ኣኬካናሰ
 ዳንዳይዛይ
 ኢዛዴሰ ላይላ
 ኣዱቂዳ ገሻሰ ገዴና።
 10 «ሃሳ ገሻሰ ሎኤላ ሲዬቲ፤
 ታኒካ ታ ቆፋ አንቲሰ ዮታና።
 11 አንቲ ሃሳይዛ ዋዴ
 ታኒ ጮኡ ጋዳ ኤዘጋይሰ፤
 አንቲ ሃሳያና ቃላ
 ቆፒሺንካ ታኒ ናጋይሰ።
 12 ታኒ አንቲ ሃሳይዛይሳ
 ሎኤላ ሲያዲሰ፤
 ገዶ አቲን አንቲፌ
 ኦኒካ ኢዮቢ ሞራንቻ
 ገዲዳይሳ ኣማንሊዳይኔ
 ቃሴካ ኢዛ ሃሳያሰ
 ቤሲዛ ዛሮ አሚዳይ ዴና።
 13 ኢዮቤ ሃሳያሰ ቤሲዛ ዛሮ
 አማናሰ ዳንዳይዛይ
 ዶሳፌ አቲን አሰ ገዶንታ ገሻሰ
 አንቲ፥ «ኮኒ አቶ ኤራቴላ
 ዴሚዳሰ) ገዲ
 ጮ ሃዳ ጨቂቶፍቴ።
 14 ኢዮቢ ማርሼቲዳይ

እንቴናራፔ ኣቲን
 ታናራ ጊዳና፤
 ታኒካ እንቴ ሃሳይዛይሳ ማላን
 ኢዛሰ ዛሮ ኢሚኬ።

15 «ኢሰቲ ዳጋሚዲ
 ሃሳይዛ ቃላይ ቆይዳ ገሻሰ
 ኣይኮ ሃሳያናዉ
 ዳንዳይቤቴና።

16 ሄኮ! ኢሰቲ ሃሳይዛ ሚሺ
 ቆይዳ ገዲ ኤቂዳ፤
 ሂሰቲን ታኒካ ገዲ ጋ
 ናጋናሲ ታሰ ቤሲዜ?

17 ኣካይ! ገዲ ገዲ፤
 ታኒካ ታ ባጋራ ዲዛ
 ዛሮዛ ኢማና፤
 ታ ቆፋካ ቆንጪሳና።

18 ታ ሃሳያናሰ ቤሲዛዚ
 ዳሮይ ዲዛ ገሻሰ፤
 ታናን ዲዛ ኣያናይ
 ታና ዋልቃራ ሃሳይሴሰ።

19 ቤኢቴ! ታኒ ሃሳዮንታ ኣጊኮ
 ዋይኔ ጫጄ ዋሒዛ
 ኦራሳ ሉካሞይ
 ሸምፒዛሶ ቆይዲ
 ቆቃናሰ ፑሪዛይሳ ማላ
 ታ ጊደይ ፑሪዲ
 ቆቃና ጋኪዴሰ።

20 ኣኔ! ታኒ
 ሃይሳፌ ሃሳያዳ ሸምፓይሰ፤
 ታ ዶና ዶያዳ
 ታኒ ሃሳያናሰ ቤሴሰ።

21 ሃይሳ ሃ ዮኦዛን
 ታኒ ኦናካ ማዲኬ፤
 ዋይኮ ኣይ ኣሳካ ኣዳሺኬ።

22 ታኒ ኣሰ ኣዳሽይ ሙሉካ ሃኔና፤
 ታ ሄሳ ማላ ኦሒኮ
 ታና ሜዲዳይሴ

ታና ሃንቃና።

33

- 1 «ኢዮቤ! ታ ኔሰ
 ዮቲዛይሳ ሲያ፤
 ታ ኔሰ ገዛይሳካ እኬካን ኤዘጋ፤
- 2 ታ ኔሰ ዛሮ እማናሰ
 ገጌታ ኡታዲሰ፤
 ታ ዶናይካ
 ገጌቲ ኡቲዴሰ።
- 3 ታ ሃሳይዛ ቃላቲ
 ታ ዋዚና ሱሬቴላ
 ቆንጨሴቲሰ፤
 ታ ኢንጻርሳይ
 ታ ኤሪዛ ቱማ ሃሳዬሰ።
- 4 ታና ሜዲዳይ ጸሳ ኢያና፤
 ታሰ ዴኦ ኢሚዳይ
 ኡባ ዳንዳይዛ ጸሳ ኢያና።
- 5 ኔኒ ዳንዳይዛ ገዲኮ
 ታ ጎይሳሰ ዛሮ እማ፤
 ኔ ጋናይሳ ገገሳዳ
 ታናራ ሃሳዬታ።
- 6 ሄኮ! ታኒ ጸሳ ሲንላን
 ኔናራ ገና፤
 ታኒካ ሜዴቲዳይ ኡርቃፌ።
- 7 ኔኒ ታሰ ያያናሰ ቤሴና፤
 ታኒካ ኔና
 ናቃናዉ ኮሼና።
- 8 ኔኒ ሃሳይዳ ኡባ ኤዘጋሽ
 ታ ጋሞኢዲሰ፤
 ኔ ኢንጻርሳፌ ኬኢዳ ቃላታ
 ታ ሲያዲሰ።
- 9 ኔኒ ሃሳያሼ፥ ሳታኒ ቆሆይኔ
 ቦሬይ ባይንዳ አሳ፤
 ታኒ ናጋራ ኦሶንታዴኔ
 ጸሎ አሳ።
- 10 ገዶ አቲን ጸሲ ታና ቃጻያናሰ
 ጋሶ ኮዬሰ፤
 ታናካ ባሰ ሞርኬ ማላ ቆዴሰ።

- 11 ታ ቶሆታ ኢዚ
ዲሩማን ዲዲ ቃቺዴስ።
ታ ቢዛሶ ኡባን
ታና ጸሌስ፣ ጋዳሳ።
- 12 «ኢዮቤ! ሃይሲ ኔ ሃሳያይ
ባላ ጊዲዴስ፤
ታኒካ ኔስ
ቆንጨሳናስ ኮያይስ፤
ጸሲ ኣሳ ኡባፌ ኣጼስ።
- 13 ሂሰቲን፥ ሩኒ ጸሲ
ኣሲ ማጋኒዛ ማጋና
ሲዬና፣ ጋዳ
ኣይስ ጸሳ ቦላ ዙዙማይ?
14 ኣሲ ኣኬኬናፌ ኣቲን
ጸሲ ዲማ ዲማ
ኤጌራ ሃሳዬስ።
- 15 ኦማርስ ኣሲ ሂጸን ኢቺ ዲዛ ዎዴ
ኣሲ ኮይሮ ጳስኮ
ሴራጊዳ ዎዴ፤
ኣጉሞኒኔ ኣጂታንካ
ጸሲ ሃሳዬስ።
- 16 ሄ ዎዴ ኣሲ ኢዛ ቃላ ሲያና ማላ
ሃይሳ ዶዬስ፤
ኢዚ ባ ኢሚዛ ሴራንካ
ዳጋንጮስ።
- 17 ሄሳ ማላ ኦሶን ኣሲ
ናጋራ ኦሶንታ ማላ ዲጌስ፤
ኦቶሬቴላካ ኢስታፌ ዴንጮስ።
- 18 ጸሲ ኣሳ ሺምፖ
ጳዮፔ ኣሺስ፤
ባሻ ሃይቆፔካ ዎዜስ።
- 19 ዎይኮ ኣሲ ሜቄላን ጌሊዳ
ሳኮን ዲሺን
ኣሲ ባ ባላፔ ሲማና ማላ
ሃርጌ ሂጸን ጸሲ ዞሬስ።
- 20 ሃይሳ ማላን ሃርጋንቻ ካል

- ላንቃናሰ ኢዛ ኢቴሰ፤
 ሎኦ ካሊካ ሃራሴሰ።
- 21 ጊልቃቴላፔ ዴንደይሳን
 ኢዛሰ ኣሾዚካ ዉሪዴሰ፤
 ሜቄሊ ጸላ ኣቲዴሰ።
- 22 ኢዛ ሼምፖይ ኬዛናሲኔ
 ሞጌታናሰ ማቲዴሰ።
- 23 «ኣሲ ሱሬ ኦጌ ቤሳናሰ
 ሼያን ቆዴቲዛ
 ጸሳ ኪታንቻታፔ
 ኢሶይ ኢዛ ማዳናሰ ዪዳኮ፥
- 24 ኪታንቻይ ኢዛሰ ቃጵቲዲ፥
 ሂዛ ወዚዛዴ
 ታ ዴሚዳ ጊሻሰ
 ኢዚ ዲጌ ዲፎን
 ዋጵንታ ማላ
 ኣጋጋ!፤ ጊዲ
 ሃይቆ ኦይኪዳኮ፥
- 25 ሄሳ ጊሻሰ ኢዛ ኣሳቴላይ፥
 ቂሪ ና ኣሾ ማላ
 ዛሪ ኦራጸና፤
 ኢዛሰ ዬላጋቴላ ዋዴ ማላ
 ቃሴካ ሃናና።
- 26 ሄ ዋዴ ጸሳኮ ኢዚ ዋሳና።
 ኢዛ ዋሳካ ጸሲ ሲያና፤
 ጸሳ ሲንሐ
 ኢዚ ቤኢዲ ኡፋዬታና፤
 ጸሲካ ኢዛ ዋሳሰ
 ዛሮ ኢማና።
- 27 ኢዚ ኣሳ ሲንላን፥
 ሪታኒ ናጋራ ኦላዲሰ፤
 ሱሬ ጊዲዳይሳካ ጌላሳዲሰ።
 ጸሳይ ጊዲኮ ታ ሞራ ማላ
 ታሰ ኦሊቤና።
- 28 ታኒ ዲፎን ጌሎንታ ማላ
 ታና ኣሺዴሰ፤
 ሄኮ ሃኢ ፓጻ ዳዳ

ታኒ ፖኑ ቤያይሰጎ ገ ዬጲዴሰ።

- 29 «ሄኮ! ጸሲ ሃይሳ
ኡባ ሚሻ
እሳስ ዛሪ ዛሪ ኦሴሰ።
- 30 ዳኦን ዲዲ ፖኑ ቤያና ማላ
ኢዛ ሼምፖ ሃይቆፔ ኣሼሰ።
- 31 «ኢዮቤ! ታ ኔሰ ዮቴዛይሳ
ሎኤላ ሲያ፤
ታኒ ኔሰ ዮታይሰ
ኣኔ ኔኒ ጮኡ ጋ።
- 32 ኔኒ ሃሳያናሰ
ኮይዛ ሚሺ ዲኮ
ታሰ ዮታ፤
ታ ኔኒ ጲሎ ገዲዲይሳ
ኔና ቤሳና ኮያይሰ።
- 33 ኣካይ ገኮ!
ታኒ ሃሳይዛይሳ
ጮኡ ጋዳ ሲያ፤
ታኒ ኔና
ኤራቴሰ ታማርሳና» ገዴሰ።

34

- 1 ኤሊሁይ ባ ሃሳያ ጉጂዲ ሂዝጊዴሰ፤
- 2 «ኢንቴኖ ኣጵ ኤራንቻቶ!
ታ ኢንቴሰ ሃሳይዛይሳ ሲዩቴ፤
ኢንቴኖ ኤራንቻቶ
ታ ሃሳያ ኤዝጊቴ።
- 3 ኢንጻርሲ ካላ ማልኦ
ሻኪ ኤሬሰ፤
ሄሳሶካ ሃይሊ ዮኦ
ሻኪ ኤሬሰ።
- 4 ቱሙ ገዲዲ ዮኦ
ኣኔ ሻኪ ኤሮሰ፤
ሎኦ ገዲዲ ሚሺካ
ኢሲፌ ታማርሰ።

- 5 «ኢዮቤ፥ ቀኑ ጸሎ ሺን
 ጸሊ ታና ሱሬ ፒርዳ ዲጊዴሰ።
- 6 ታኒ ቱማንቻሺን
 ዋርዳንቻ ማላ ቆዳታዲሰ፤
 ታ ኣይኮካ ሞርንታ ዳሼ
 ፓጸንታ ማዲንላን
 ዋዬታይሰ፤ ጊዴሰ።
- 7 ኢዮቤ ማላ ጸላ ሰላ
 ቂልጪዛዴይ ቤታንዴሻ?
- 8 ኢዚ ኢታ ኦሴዛይታራ ላጌቴሰ፤
 ኢዛሰ ፔይሻይካ ኢታ ላጌታራ።
- 9 «ጸላ ኡፋይሳና ጊዲ ኦሶይ
 ኣሰ ኣይኮካ ማዴና፤ ጌሰ።
- 10 «ኣኬኪዛ ኣሳቶ
 ኣኔ ታና ኤዘጊቴ!
 ኢታ ኦሶይ ጸሳፌ፤
 ባላ ኦሶይ
 ኡባ ዳንዳይዛ
 ጸሳፌ ሃኮ!
- 11 ጸሊ ኣሳሰ
 ኢዛዴ ኦሶ ማላ ኢሜሰ፤
 ኢዛሰ ኢዛዴ ሄሜላ ማላ
 ኦሴሰ።
- 12 ኡባ ዳንዳይዛ ጸሳይ
 ሙሌካ ኢታ ሚሽ ኦሴና፤
 ኣይ ኣሳሰካ
 ሱሬ ፒርዳ ጌላሴና።
- 13 ጸሳሲ ቢታ
 ሃዳራ ኢሚዳዴይ ዴና፤
 ኢዛ ኣላሜ ሰላካ
 ሹሚዳዴይ ዴና።
- 14 ጸሊ ባ ኣያናዛኔ
 ባ ሸምፖዛ
 ባኮ ዛሪ ኤካና ኮዪዳኮ፥
 15 ኣሽ ማይኢዳይ ኩሜል ጳያና፤
 ኣሳ ዜሬሒካ

- ዱጌ ቢታን ሲማና።
 16 ኔኒ እኬኪዛ ጊዲኮ ሃይሳ ሲያ፤
 ታ ኔሰ ሃሳይዛይሳ ኤዘጋ።
 17 ሱሬ ፒርዳ ኢጸዛዴይ
 ዴሬ እይሳናሰ ዳንዳይዜ?
 ኔኒ ጸሎኔ ዋልቃማ ጸሳ
 ናጋራንቻ ኬሳይ?
 18 ካዋታ አንቴ ጳሌኬታ፤
 ሹሜታካ አንቴ ኢታ
 ጋናይ ኦኔ?
 19 ኡባቲካ ኢዛ ሜዴታታ ጊዲዳ
 ጊሻሰ ኢዚ ሹሜታ
 ሻኪ ማዴና፤
 ዲሬታካ ማንቆታፔ
 ሻኬና።
 20 ኢሰቲ ሌላ ጊደል
 ቆፖንታ ሃይቃና፤
 ኡባይ ኮኮሪ ጳያና፤
 ዋልቃማቲካ እና ኩሹይካ
 ቦቾንታ ኪቻና።
 21 «ጸሲ አሳ ኡባ
 ታንጎዛ ጾሌሰ፤
 አሳ አሳ ሄሜል ካሌቴሰ።
 22 ኢታ አሳቲ ቆቴታና ማላ
 ጊርዲ ጊዳ ጳማይ ዴና።
 23 ጸሲ አሳ ቦላ ፒርዳናሰ
 ባሬ አሜና።
 24 ዋልቃማ ዳናታ
 ዳናቴላፌ ዴንላናሰ፤
 ኢሰታሶሆን ሃራ ዋላናሰ፤
 አይኮ ኦይሻይ ሺቆንታ
 ኢዚ ሄሳሶ ኦፊሰ።
 25 ኢዚ ኢሰታ ኦሳ ኤሪዛ ጊሻሰ
 ኢሲ ኦማርሰ
 ኢሰታ ዳናቴላፌ ጳይሳና።
 26 ኢሰቲ ኦፊዳ ማካላቴላ
 ጋሶን ኡባ አሳ ሲንሳን

ማካላንቻታ ቃጸዬሰ።

27 ኢዚ ኢሰታ ቃጸዬዛይሲ
ኢሰቲ ኢዛ ካሊዛይሳ ኣጊዳ
ጊሻሳ፤

ኢዛ ኣዛዘታካ
ኢሰቲ ካጲዳ ጊሻሳ።

28 ኢሰቲ ማንቆታ ኡንኤሊዳ፤
ፑዴ ጸሳኮ ዋሳና ማላ
ኦሊዳ።
ጸሲካ ማንቆታ
ዋሲዛ ሲዪዴሰ።

29 ጸሲ ጮኡ ጊኮ
ኦኔ ኢዛ ቦላ ፒርዳናይ?
ኢዚ ባ ዘኮ ዛሪኮ
ኦኔ ኢዛ ቤያናይ?

30 ሄሳፉካ ጸሳሰ
ያዮንታ ዴራ
ኡንኤሊዛ ካዎይ
ዴራ ቦላ ዴንዲኮ
ኢዛ ኦኔ ዲጋናይ?

31 «ኢዮቤ! ኔኒ ኔ ናጋራ
ጸሳሰ ፓጸዳ
ዛራ ናጋራ ኦሊኬ ጋ
ቃላ ጌላዲ?

32 ታ ኦሊዳ ናጋራይ ኣዋይሳኮ
ታና ታማርሳ፤
ታ ሞሪዳ ጊዲኮ
ዛራዳ ኢዛሶ
ኦሊኬ! ጋዲ?

33 ሂሰቲን ኔኒ ማሬታናፔ
ኢዲሰ ጋዳ
ኔኒ ሺሺዛ ቆፋ ማላ
ጸሲ ኔ ኣሞዛ
ኔሰ ፖላና ማላ
ኔ ኮያይ?

34 «ታና ሲዪዛ ኣሳቲ

- እኩኪዛ ኤራንቻቲካ፥
 35 «ኢየሱስ ኤራቴላ ባይንዳ ሃሳዬስ፤
 ሁኔይ ባይንዳ ሃሳያታ
 ሃሳዬስ» ጌቴስ።
 36 ኢታ አሳታ ዛሮ ማላ
 ዛሪዛ ገሻሰ
 ኢየሱስ ወርሴላ ጋካናዉ
 ፓጮቲዳኮ አዜ ዲዛይ!
 37 ኑ ገደን ዋጋፔ ካሬ ኬኢዴስ፤
 ጸሳ ቦላ ካጼ ዳርሲዴስ፤
 ባ ናጋራ ቦላካ
 ማካላቴላ ጉጂዴስ» ጌቴስ።

35

- 1 ኤሊሁይ ባ ሃሳያ ጉጂዲ ሂዝጊዴስ፤
 2 «ኢየሱስ ኔ ኔና፥
 «ታኒ ጸሳ ሲንፋን ጸሎ»
 ገዛይሲ ሊኬ?
 3 «ናጋራ ኦላንታ አገኮ
 ታ አይ ጎኤታኔ?
 ቃሴካ አይ ዴማኔ?» ጋዳ
 ኔኒ እይቻዳሳ።
 4 ታኒ ኔሲኔ ኔናራ ዲዛይታሰ
 ዛሮ አማና።
 5 «ጵቁ ጋዳ ፑዴ ሳሎ ጸላ፤
 ኔፔ ጵቁ ገዲ ዲዛ
 ሻራ አኬካ።
 6 ኔኒ ናጋራ ኦሊኮ
 ጸሳ አዛን ቆሃይ?
 ኔኒ ኢዛ ዳርሳ ዳርሳ ቆሃኮ
 ኢዛ አይ ኦላናዉ ዴንዳያይ?
 7 ኔኒ ጸሎ ገዲኮ ኢዛሰ አይ አማኔ?
 ኢዚ ኔፔ አይኮካ ኮዬና።
 8 ኔ ናጋራ ኦሊኮ ቆሃናይ
 ኔ ማላ አሳታ ጸላ።
 ኔ ሎኑ ሚሽ ኦሊኮካ

ኔ ጎሊዛይ አሰ ጸላ።

- 9 «አሲ ሃራይ ዳርሲ
 ቆሂሺን ዋሴሰ፤
 ባፔ ዋልቃቲዛዴ ኩሼፔ
 ባና ኣሺ ኤካናዴሰ
 ማጋኔሰ።
- 10 ጊዶ ኣቲን ኢሰታፌ ኦኒካ፥
 ረታና ሜዲዳ
 ጸሳይ ኣዋኔ?
 ሌላ ጊዶል
 ማዛሙራ ኢሚዛይሲ ኣዋኔ?
- 11 ሜሄታፔ ኑና ኣሉ
 ታማርሲዳ፤
 ሳሎ ካፎታፔካ
 ኣጵ ኤራንቻታ
 ኦሉዳይ ኢዛ፡ ጊዳይ ባዋ።
- 12 ኢሰቲ ዋሴቴሰ፤
 ኢዚ ጊዲኮ ኢሰቲ ኦቶራንቻታኔ
 ኢታታ ጊዲዳ ጊሻሰ
 ኢሰታሰ ዛሮ ኢሜና።
- 13 ጸሲ ቱማ ዋዚናፔ ጊዶንታ
 ዋሶ ሲዬና፤
 ኡባ ዳንዳይዛ ጸሳይ
 ሄሳ ማላ ኤዘጌና።
- 14 ኢዮቤ! ኔኒ ታ ጸሳ ኣይኮካ
 ቤኢኬ ገኮካ፥
 ኔ ሜቶይ ኢዛ ሲንፋን
 ዴኢዛ ጊሻሰ፥
 ኔኒ ዳንዳያን
 ናጋና ኮሼሰ።
- 15 ቃሴካ ጸሲ ኔና
 ባ ሃንቆን ሃንቆንታ
 ኣሳ ኢታቴላ ጮኡ ጊዲ
 ኣጳና ኔሰ ሚሳቲዜ?
- 16 ኢዮቤ! ኔኒ ጮ ሜላ
 ሃሳያ ዳርሳሳ፤

ኤራቴሌ ባይንዳ
ጮ ጋዳ ሃሳያሳ።»

36

- 1 ኤሊሁይ ባ ሃሳያ ጉጂዲ ሂዝጊዴስ፤
- 2 «ጸሳ ገሻስ ታኒ ሃሳያና
ሃራይ ዲዛ ገሻስ
ጉሐ ዳንዳያዳ ታ ገዛይሳ ሲያ።
- 3 ታኒ ዳርሶፔ ዳሚዳ
ኤራቴላን፥ ታና ሜዲዳ
ጸሲ ጸሊሎ ገዲዳይሳ
ታኒ ኔስ ኤሪሳይስ።
- 4 ታ ቃላይ ዋርዶ ገደንታይሳ
ኔኒ ሎኤላ ኤራ፤
ኔናራ ሃሳያና ታስ ኩሜላ
ኤራቴሌ ዲዛይሳ ኤራ።
- 5 «ቱሙካ ጸሲ ዋልቃማ፤
ገዶ አቲን ኦናካ ካጄና፤
ኢዚ ኡባካ አኬኬስ።
- 6 ኢዚ ኢታ አሳታ ፓጸ ዋጴና።
ሜቶቲዳ አሳታስ ገዲኮ
ሱሬ ፒርዳ ፒርዴስ።
- 7 ጸሲ ጸሊሎ አሳታ ናጌስ፤
ካዋታ ማላ
ቦንቾ አልጋን ኡቲሴስ፤
ሜርናስ ኢሰታ
ቶቁ ቶቁ ሂሰቲስ።
- 8 ገዶ አቲን አሲ
ሳንሳላታን ቃሹቲኮ፥
ዋይኮ ሜቶ ገቲን ኦይኬቲኮ፥
- 9 ኢሰቲ ባ ኦቶሬቴላን
ኦሒዳ ናጋራ ቆንጨሴስ።
- 10 ኢሰቲ ሴራ ሲያና ማላ
ኢሰታ ሃይላ ዶዬስ፤
ኢሰቲ ባንታ ኢታ ኦሳፔ ሲሚዲ
ማሬታና ማላ አዛዜስ።
- 11 ኢሰቲ ጸሳስ አዛዜቲዲ ኦሒኮ፥

- ባንታስ አቲዳ ላይላ
ዱሬቴላኒኔ
ኡፋይሳን እንጋና።
- 12 ጊደ አቲን ኢዛ ሲዮንታ ኢጲኮ
ኢስቲ ኦላን ወራና፤
ኢስቲ ባንታ ኤያቴላን
ዲሼ ሃይቃና።
- 13 «ባንታ ዋዚናራ ጸሳ ካዲዛይቲ
ቃጸዬቲዳ ማላ ዳና፤
ኢዚ ኢስታ ቃጸይሺንካ
ኢስታ ካሌሊዛይቲ
ዋሴቴና።
- 14 ኢስቲ ባ ፖሊዛ
ኢታ ላይማቴላ
ቦሻን ጳያና፤
ባንታ ዬላጋቴላ ላይላንካ
ሙልቄቲ ሃይቃና።
- 15 ጸሲ ሜቶን ኢንኤቲዛይታ
ኢስታ ሜታፔ አሻና፤
ኢስታ ጋኪዳ ሜታን
ኢስታስ ቲሚርቲ ኢማና።
- 16 «ሃይሳ ሃ ዋዴዛን
ጸሲ ኔሰ ቆፒዛይ
ኔና ኔ ዲዛ ሜታፔ ኬሲዲ
ሎኦ ካሊ ኩሚዳ
ማዳን ኤፋናሳ።
- 17 ሃኢ ጊዲኮ
ኔ ኦሊዳ ሞራፔ
ዴንደይሳን ኔ ቦላ
ፒርዴቲዳ ጊሻሰ፤
ኔሰ ቤሲዛ ቂጻቴ
ኤኮ ቦላ ዳሳ።
- 18 እኒካ ኔና ዱሬቴላ ዳሮን
ጨሞንታ ማላ፤
ማታኤንካ ኔና
ባሌሶንታ ማላ ናጌታ።

- 19 ኔሰ ዲዛ አቆታይኔ ጎዳቴሉ
ዳሮ ገዲኮካ
ኔና ሜቶፔ አሼቴና።
- 20 ዴራ ዲዛሶፔ ዳይሲዛ
ዳማ ዋዴይ
ያና ማላ አሞቶፋ።
- 21 ኔኒ ሜቶ ገደን ፓጩቲዛይ
ሄሳ ጋሶን ገዲዳ ገሻሰ
ሲማዳ ናጋራ
ኦሶንታ ማላ ናጌታ።
- 22 «ጸሳ ዋልቃይ
አይ ማላ ገታኮ አኬካ፤
ጸሲ ኡባፌ አጽ አስታማሬ።
- 23 «ሃይሳ ኦላ» ገዲ
ጸሳ አዛዚዛ አሲ ዋይኮ፥
«ኢታ ኦሶ ኦላዳሳ» ገዲ
ኢዛ ዋላሲዛይ ኦኔ?
- 24 ኢዚ ኦላዛ ኦሳ ገሻሰ
አሳይ ኡባ ዋዴ ዬላን
ጋላቲዛይሳ ማላ፥
ኔኒካ ኢዛ ኦሳሰ
ዬላን ጋላታ።
- 25 አሳ ዜሬሉ ኡባይ
ጸሳ ኦሳ ቤዪዴሰ፤
አሳይ ቲሺ ኦላ
ሃኮን ቤዪዴሰ።
- 26 ጸሳ ገታቴላ
ፒልገዲ ጋካናሰ
ኑኒ ዳንዳዮኮ፤
ኢዛ ላይላ ቆዳይካ
ኑ ኤራፔ ቦላ።
- 27 «ጸሲ ሃላ አባፌ
ፑዴ ሳሎ ኤፌሰ፤
ዛሪዲካ ኢራ ሳሎፔ
ዱጌ ቡኪሴሰ።
- 28 ኢራ ሻራፔ ኬሲዲ
ዋልቃማ ኢራ አሳሰ ቡኪሴሰ።

- 29 ጊደ ኣቲን ጸሲ
ሻራ ዋስቲ ሚጨዛኩ፥
ዋልቃንፋ ጊደን ኡቲዲ
ኢዚ ዋኒ ሃሳይዛኮ
ኦኒ ኤራናዉ ዳንዲይዜ?
- 30 ጸሲ ኣባ ጨማቲፋ ካሚዲ
ኢዚ ባ ዩሾን ዋልቃንፋ
ዋስቲ ላሊዛኮ ጸላ።
- 31 ሃይሳ ማላ ኦሊዲ
ጸሲ ባ ዴራ ኣይሴስ፤
ኣሳይ ሚዛ ዳሮ ካፋካ ሞኪሴስ።
- 32 ዋልቃንፋ ኢዚ
ባ ኩሼን ኦይኬስ፤
ኦይኪዲ ባ ዶሲዳ
ባጋ ባና ማላ ኣዛዜስ።
- 33 ዳዳይ ዋልቃማ ኢራይ
ያናይሳ ማላቲስ፤
ሜሄቲካ ኢራ ኡሾይ
ዪዛይሳ ኤሬቲስ።

37

- 1 «ዋልቃማ ኡሾፔ ዳንዳይሳን
ታ ዋዚናይ ኮኮሪዴስ፤
ያሻቲፋፌ ዳንዳይሳን
ፔሪ ባና ጋኪዴስ።
- 2 ኢዛ ዶናፔ ኬኢዛ ቃላ ሲዪቲ፤
ዳዳ ማላ ጉሚዛ
ጊሪሳ ቃላ ሲዪቲ።
- 3 ሳሎፔ ጋርሳን ዋልቃንሉ
ዋልቃሜስ፤
ቢታ ጋጸ ጋካናዉ ኪቲስ።
- 4 ሄሳፌ ጉዬ ዋልቃማ
ባ ጊሪሳ ሲሴስ፤
ያሺሲዛ ባ ጊሪሳ
ዳዳ ማላ ጉንፊስ፤
ዋልቃንፋ ፖኦይካ
ዛሪ ዛሪ ቤቲስ፤
ባ ያሺሲዛ ጊሪሳን ጉሜስ፤

- ኢዚ ባ ጊሪሳ ሲሲዛ ዋዴ
 ዋልቃንላ ዲጌና።
- 5 ጸሳ ጊሪሳ ጉንላይ
 ማላሊሲዛ ጊታ ጉንላ
 ጉሜሰ፤
 ኑኒ ኤራናዉ ዳንዳዮንታ
 ጊታ ሚሻታ ኦሴሰ።
- 6 ቢታ ቦላ ሻቹ
 ዋዳና ማላ ኦሴሰ፤
 ዋልቃማ ኢራይካ
 ቡካና ማላ ኣዛዜሰ።
- 7 ኢዚ ሜዲዳ ኣሳቲ
 ኢዛ ኦሶ ኤራና ማላ
 ኡባ ኣሳይ ባንታ ኦሶዛ
 ኦሶንታ ማላ ቲቄሰ።
- 8 ሄ ዋዴ ዋራ ዶኣቲ፥
 ባቃቲዲ ባንታ ቆቴቴላሶ
 ጌሌቴሰ፤
 ባንታ ጎንጎሎዛን ቆቴቴቴሰ።
- 9 ዋልቃማ ጫርኮይ
 ፑዴሃፔ ዴንዴሰ፤
 ሞጪዛ ጫርኮይ ፑዴሃፔ ዬሰ።
- 10 ጸሳ ፔኖይ ሃላ ሞጪሴሰ፤
 ኢዛፔ ሻቹ ሜዴሰ።
- 11 ሻራይ ሃላ
 ቶካና ማላ ኦሴሰ፤
 ባ ጊደን ዋልቃንላ
 ዋልቃማና ማላ ኦሴሰ።
- 12 ጎዳ ካሌሶን ሻራቲ
 ቢታ ዩሾን ዩዬቴሰ፤
 ባንታና ማዲዛ
 ኣዛዘታካ ፖሌቴሰ።
- 13 ጸሲ ኢራ ቡኪሲዛይ
 ቢታ ኢርጺሳናሰ፥
 ኣሳታ ቃጸያናሰ
 ዋይኮ ባ ሲቆ ቆንጪሳናሳ።
- 14 ኢዮቤ! ኑኒ ታኪ ጋዳ ሲያ፤
 ጸሲ ኦሴዛ
 ማላሊሲዛ ኦሶታ

- ዎዚናን ዋፋዳ አኬካ።
- 15 ጸሲ ሻራ ዋስቲ አዛዚዛኮ፥
ዋልቃንፋካ
ዋስቲ ዋልቃንፊዛኮ
ኔኒ ኤራይ?
- 16 ሻራ ሳሎ ቦላ
ዋስቲ ዋፊዳኮ፥
ማላሊሲዛ ኡባ ኤሪዛ ጸሳ
ኦሶዛ ኔ ኤራይ?
- 17 ሳሎይ ጸርቂማላ ሚሳቲዛ ዋዴ፥
ዋልቃማ ባዞ ጫርኮይ
ቢታ ቦላ ጫርኪዛ ዋዴ
ኔኒ ሆምቤን ሴራና።
- 18 ጸሲ ሳሎ ሴሪዳ
ማሰቶቲ ማላ ሚጨኮ፥
ኔኒ ኢዛ ማታን ኡታዳ
ማዳናጧ ዳንዳያይ?
- 19 «ኦሰ ኤራይ ፓጩ ጊዲዳ ጊሻሰ
ኦኒ አይ ጊዲ
ጸሳሰ ዛራናኮ
ኔኒ ኦና አኔ ታማርሳ።
- 20 ጸሳራ ሃሳያና
ጋዳ ኦይቺኬ፤
ታ ኢዛ ኦይቻዳ አዛሰ
ኢዚ ታና ጳይሳና ማላ
ዴንፊሶ?
- 21 ጫርኮይ ሻራ ሳሎፔ
ቁጨ ጌሺዛ ዋዴ፥
ኦኒካ ጸልቂዛ አርሼ
ቲሺ ሂሰቲ
ጴላናሰ ዳንዳዬና።
- 22 ፑዴሃፔ ዋርቃ ማላ
ጸልቂዛ ፖኦይ ያና፤
ጸሲ ማላሊሲዛ
ቲማን ቆንጫና።
- 23 ኡባ ዳንዳይዛ ጸሳይ
ኦ ቆፋፔ ቦላ፤

- ኢዛ ወልቃይ ጌታ፤
 ኢዚካ ቱሙ ፒርዲዛዴ።
 24 ባንታ ቆፋን፡
 ሉኒ ኣቶ ኤራንቻታ ጌዛይታ
 ኢዚ ካጼሰ፤
 ሄሳ ገሻሰ ኣሳይ ዉሪ
 ኢዛሰ ያዬሰ።»

38

- ጸሓፊ ኢዮቤስ ኢሜቲዳ ዛር
 1 ሃይሳፊ ጉዬ ጎዳይ
 ጎቲ ጫርኮ ጌዶን ጌዲዲ
 ኢዮቤስ ሂዘጌዳ፡
 2 «ሃይሲ ኤራይ ባይንዳ ሃሳያን
 ታ ዘሪዛ ካጼዛይ
 ኢዚ ባሰ ኦኔ?
 3 ኣኔ ኣዴ ጌዲኮ
 ዳንጨታ ታ ሲንፋን ኤቃ፤
 ታኒ ኔና ኦይቺዛይሳ
 ታሰ ዛራ።
 4 ታኒ ሃይሳ ኣላሜዛ ሜጲሺን
 ኔኒ ኣዋን ዳይ?
 ኔ ኤሪዛኔ ኣኬኪዛ ጌዲኮ
 ኣኔ ታሰ ዮታ።
 5 ሃይሲ ሳኣይ ኣይ ኬና ጌዳናኮ
 ቆፋ ቃቺዳይ ኦኔ?
 ሳኣ ቦላ ኢዚ
 ሚጼ ዋደርታ ሚጨዳይ
 ኦናኮ ኔ ኤራይ?
 6 ቢታ ቱሳቲ ኩንዶንታ ማላ
 ሚንሒ ኦይኪዳ ወልቃይ ኣዜ?
 ኣላሜዛ ኦሶ ደሚሺን
 ዮቻ ሹቻ ዩጌዳይ ኦኔ?
 7 ባካሌ ጸለንቲቲ
 ኢሲ ቦላ ዩጸዛሸ፡
 ኪታንቻቲ ኡባይ ኢሊሊዛሸ
 ኔኒ ኣዋን ዳይ?

- 8 «አባይ ቢታፌ
 ቆይቼ ከኢዛ ዋዴ
 ፑልቶ አይፈታ ጎርዲዳይ ኦኔ?
- 9 አባ ሻራን ካሟዳይ
 ቃሴካ ገርዲ ገዳ ቆማን
 ጎርዲዳይ ታና።
- 10 አባሰ ዛዋ ሜዲዳይ
 ፔንጌኔ ዛዋ ዋሊዳይ ታና።
- 11 ሃይሳ ጋካናዉ ያ!
 ሃይሳፌ አጵፋ!
 ኔ ዋልቃማ ዳምባላይ፥
 ሃይሳን ኤቆ ጋዲሰ።
- 12 «ኢዮቤ! ኔኒ ዩሌቶሶፌ
 ዋንታይ ዋንታና ማላ
 አዛዛ ኤራይ?
 ዋንታ ፖኦሰካ
 ሶሆ ገገሳ ኤራይ?
- 13 ዋንታይ ቢታ ቦላ
 ፖኦ ቤሳና ማላ
 ኢታ አሳቲ ቆቴቲዳሶፔ
 ቆንጨፍ ከዛና ማላ
 ኔ ኢሰታ አዛዛ ኤራይ?
- 14 ዋንታ ፖኦይ ቢታ
 ቃላምኤቲ ዲዛ ማይኦ ማላ
 ቤታና ማላ ኦሌሰ፤
 ማና ሚሻ ቦላ ዲዛ
 ማታሜ ማላ
 ቆንጨን ቤሴሰ።
- 15 ኢታቲ ፖኦ ዲጌቲዳ፤
 ኢሰቲ ማካላቴላን ዴንሊዳ
 ኩሼይካ ሜቂዴሰ።
- 16 «ኔ ዱጌ ጨማ አባን
 ዋዳዲ?
 ዋጋ ጌታ አባ ጋርሳን
 ሲሜሬታ ኤራይ?

- 17 ሃይቆ ፔንጌታ ኔና ቤሲዳ?
ጊርዲ ጊዳ ቋማ
ፔንጌታካ ቤያዲ?
- 18 ሳኣይ ኣይ ከና ዳልጋ ጊዲዳኮ
ኔ ኤራይ?
ኣኔ ሃይሳ ኡባ ኤሪዛ ጊዲኮ
ኔ ታሰ የታ።
- 19 «ፖኦይ ዲዛሶ ኤፊዛ ኦጌይ ኣዋኔ?
ቃሴካ ቋማይ
ዴኢዛሶይ ኣዋኮ
ኔ ኤራይ?
- 20 ኔኒ ፖኦኔ ቋማ
ኢሰቲ ዲዛሶ ዲዛሶ
ኤፋናሰ ዳንዳያዪ?
ኢሰታሶይ ዲዛሶ ኤፊዛ ኦጌዛ
ኔ ኤራይ?
- 21 ኔኒ ቢታይ ሜጴቲዛ ዋዴ
ዬሌቲዳ ጊሻሲኔ
ኔሰ ላይላይካ
ዳሮ ጊዲዳ ጊሻሰ
ኔ ኤሮንታ ኣጋካ!
- 22 ሻቺ ዋጲዛ
ኬላን ጌላዲዬ?
ዋይኮ ኡቲዳ ሻቻ
ዶሬ ቤያዲ?
- 23 ሃይሳ ሃ ሻቻዛ
ታ ኦላ ጋላሳሲኔ
ሜቶ ጋላሳሰ
ኅኤታናሰ ሚንጃ ዋሒዳዛ።
- 24 ዋልቃንሒ ኣዋፔ ዳንዲዜ?
ዋይኮ ኣርሼይ ሞኪዛ ባጋፊ
ጫርኮይ ቢታ ቦላ ላሌቲዛሶ
ኤፊዛ ኦጌይ ኣዋኔ?
- 25 ኢራሉ ዋጲዛሶ ጊግሲዳይ
ዳዳይ ዋላኩቲዳ ኡሻሰ
ኦጌ ጊግሲዳይ ኦኔ?
- 26 ኦኒካ ባይንዳ ቢታን

- እሲካ ደንታ ባዞን እሺዛይ፥
 27 ኢራይ ቡካና ማላካ
 ኦሊዛይ ኦኔ?
 እሲ ባይንዳ ሶሆዛኔ
 ባዞ ቢታ
 ሃል ካልሲዳይ
 ቢታይካ ማታ ሞካና ማላ
 ኦሊዳይ ኦኔ?
 28 ኢራኔ ጸዛ ኢሚዛይ ኦኔ?
 29 ሻቺኔ ኬንቾ
 ኢሚዛይ ኦኔ?
 30 ኬንቾ ሃላ ሹቻ ማላ
 ሚንሴሰ፤
 አባ ሃሊካ ሻቻሉ
 ሹቻታና ማላ ኦሴሰ።
- 31 «ፒሊያዲሴ ጌቴቴዛ ጸለንቴታ
 ኢሲ ቦላ ቃቻናሰ ዳንዳያይ?
 ኦሪዮ ጌቴቴዛ ጸለንቴታ
 ኢሲ ቦላ ኦይኬቲዳ ዋዶርዛ
 ዲላናዉ ዳንዳያይ?
- 32 ጸለንቴታ ኡባ
 ኢሰታ ዋዴን ዋዴን
 ኬሳናዉ ዳንዳያይ?
 ዛርዶ ጌቴቴዛ ዶኣ
 ሜጶይ ዲዛ ጸለንቴ፥
 ኢሰታ ማራታራ
 ኔ ካሌላናዉ ዳንዳያይ?
- 33 ሳሎቲ አይ ማላ ዋጋን
 አቋዛኮ ኤራይ?
 ሃይሳ ሃ ዋጋዛካ
 ቢታ ቦላ ኦሲሳና ዳንዳያይ?
- 34 «ዳሮ ኢራ ኔሰ ቡኪሳና ማላ
 ሻራ ኔ አዛዛናዉ ዳንዳያይ?
- 35 ዋልቃንል ኔ አዛዞን ዋልቃሚዜ?
 ዋልቃንል ኔ ዬዳናሰ ዳንዳያይ?

- ኢስቲካ ኔሰ፥
 ሂሳብ ነህ ሃን ደሰ ገረ ኤሪዞ?
- 36 ዋዚናስ ጨንጫቴሰ
 ቆጋናስ ካሃ አሚዳይ ኦኔ?
- 37 ባ ኤራን ሻራታ ቆዳናስ
 ዳንዳይዛይ ኦኔ?
 ሳሎፔ ሃሰ ዱጌ ቲጋናስ
 ዳንዳይዛይ ኦኔ?
- 38 ጉዱላ ኦይሴሴዱ
 ጳሼ ኬሳናስ
 ዳንዳይዛይ ኦኔ?
- 39 «ማጫ ጋሞይ ዋራ ገደን
 ዛማዳ ኡቲዳሺን
 ኔ ኢዚስ ሚዛ ሚሽ ሻንካታዳ
 አማናስ ዳንዳይ?
- 40 ዋይኮ ጋፊ ኡቲዳ ኢዚ ማራታ
 ካልሳናዉ ዳንዳይ?
- 41 ቁርቲ ጋፊዱ ቢቻሪዛ ዋዴ
 ኢስታ ጨዩቲካ ሚዛ ሚሽ
 ጳይዱ ታኮ ዋሲዛ ዋዴ
 ኢስታስ ሚዛ ሚሽ
 አሚዛይ ኦኔ?

39

- 1 «ጌኔሳቲ ዩሊዛ ዋዴ ኔ ኤራይ?
 ዉሻ ጌቲቲዛ ዶኣይ ሚጸቲዱ
 ዩሊሺን ቤያ ኤራይ?
- 2 ኢስቲ ሴባቲዱ
 ኣይ ላጌ ዋዴ ጋሞኢዛኮ
 ኣዉዴ ዩሊዛኮ ኔ ኤራይ?
- 3 ጉልባቲ ሚጸቲሼ ባንታ ማራታ
 ኢስቲ ዩሊዛይ
 ኣዉዴኮ ኔ ኤራይ?
- 4 ኢስታ ማራቲ
 ዋራን ዱጨዱ ሚኔቴስ፤
 ኢስታፌ ሻኬቲዱ ቤቴስ፤

- ቢዳፔ ጉዬ
 ባንታ ኣዬታኮ ሲሜቴና።
- 5 ሃርዲዲይ ዩዳ ዳና ማላ
 ኦሲዲይ ኦኔ?
 ኢሰታ ቃሾፔ ቢርሺዲይ ኦኔ?
- 6 ባዞዛ ኢሰታስ
 ዲዛሶ ሂሰታ ኢማዲስ፤
 ማጺኔይ ዲዛ ዴሞባን
 ኢሰታ ዋላዲስ።
- 7 ካቺ ዳሪዛ ካታማታፔ
 ሃኪዲ ዴቴስ፤
 ጉዬራ ላጊዛይቲ
 ቆዲዛይሳ ደሴቴና።
- 8 ዙማታ ቦላን ፔኤቴስ፤
 ሄን ባስ ጊዲዛ
 ጨሊላ ማታ ኮዬቴስ።
- 9 «ሜንሱ ኔስ ኦላናስ
 ኤኖ ጋንዴ?
 ዋይኮ ኔ ዜጴን
 ኤኖ ጊ ኤቃንዴ?
- 10 ሜንሱ ዋጸዳ
 ጎሽ ጎያናዉ ዳንዳያይ?
- 11 ኢዛ ሚኖቴላን ኔ ኣማኔታይ?
 ኔስ ዴጺዛ ኦሶዛ
 ኢዚ ኦላና ማላ
 ኢዛስ ኣጋ ኤራይ?
- 12 ኢዚ ኔኮ ሲሚ ያና ማላ፤
 ኔ ካሐ ቡኪዛ ባሌይ ዲዛሶ
 ሚያናይሳ ኣማኔታይ?
- 13 «ያንቻይ ባ ቄፌ
 ኤሶን ሚጫዉስ፤
 ጊዶ ኣቲን
 ሳንጋኖ ካፎ ማላ ፒራጱኩ።
- 14 ያንቻይ ባ ጰጰሌ
 ቢታን ዩጋዉስ፤
 ቢታ ጊዶን ኡቲዲ

- ሆኑና ማላ ከላወሰ።
- 15 ሄራ አዲዛዳይ
 ባ ቶሆን ማንሰ።
 ዋራ ደክተካ
 ዬዲ ለቂሰቴሰ።
 ጋዳ ቆፑኩ።
- 16 ባ ጨዋታሰ አላጋ ማላ
 ማንጾ አታወሰ።
 ኢዚ ዳቡራይ ሃዳን አቲኮካ
 ወዳ ጉኩ።
- 17 ሃይሳሉ ኢዚሰ ጨንጫቴላ
 ጃይሳዳ ኢዛ ኤርንታ ማላ
 ኦሊዳይ ታና።
- 18 ኢዛ ዴንዳዳ ዋጺዛ ዋዴ፥
 ባናራ ጋዴ ዋጺዛ
 ቶጋታ ቦላ ሚጫወሰ።
- 19 «ኢዮቤ! ፓራታሰ ዋልቃ
 አሚዳይኔ አድሳ ጋማ
 አሰታ ሞርጌን ማይዚዳይ ኔኔ?
- 20 ፓራታ ቦሌ ማላ ጉፐዛይ
 አሰቲ ሃርቡቂሽ አሳታ
 ዳጋንላና ማላ
 ኦሊዛይ ኔኔ?
- 21 ፓራቲ ኦላ ዴምባ ቶጌቲ ቢሽ፥
 ባንታ ዋልቃንካ ጨቁቲሽ፥
 ሎዳን አዳራሶ ደሚቴሰ።
- 22 ያሽ ጊዛ ሚሽ ሙሌካ ኤሬቴና፤
 አይ ሚሽካ
 አሰታ ዳጋንሴና፤
 አሰታ ቦላ ጊላ ማሻ
 ዴንሊዳኮካ
 ጉዬ ሲሚቴና።
- 23 አሰታ ቶጊዛ ኦላንቻቲ
 ኦይኪዳ ኦላ ሚሻቲ፥
 ዋዋጪ ጊሽ ባንታ ጊዶን
 ጊሬቲሽ ሲዬቴቴሰ።
- 24 ዛዬይ ዛዬቲሺን ጮኡ ጊ

- ኤቃናዉ ዳንዳዬቴና፤
 ዪሎኒኔ ሃንቆን ኩሚዲ
 ኦላ ዴምባ ዎጾቴሰ።
- 25 ዛዬይ ፑኔቲዳ ታይቦን
 ኡፋይሳን ዋይቄቴሰ፤
 ሃኮን ዲሼ ኦላ ፔኖ ኤሬቴሰ፤
 ኦላ ካሌሊዛይቲ
 ኢሚዛ ኣዛዞዛኔ
 ኦላንቻታ ጨቄቴላ ሲዬቴሰ።
- 26 «ዲሎይ ሳሎ ቦላ ፓሊዛይ፥
 ኢዚ ባ ቄፌዛ ዱጌሃ ሚጪዛይ
 ኔ ኤራቴላኔ?
- 27 ጎሌይ ፑዴ ኬኢዲ
 ቶቃሶሆን ባ ኬላ ኬዲዛይ
 ኔ ኣዛዚኔ?
- 28 ጎሌይ ዛላታ ጊዶን ኣቄሰ፤
 ኬልካ ጊዶን ባ ኬላ ኬዶሰ፤
 ዛላቲካ ኢዛሰ
 ቆቴቲዛሶ ጊዴቴሰ።
- 29 ሄን ኡቲዲ ባሰ
 ሚዛ ሚሽ ያሌሰ፤
 ኢዛ ኣይፌቲካ
 ሃኮን ዲዛዝ ዴማቴሰ።
- 30 ሃይሳ ማላን ጎሌቲ
 ሚዛዚ ዲዛሶ ሽቄቴሰ፤
 ኢሰታ ጨዬቲካ
 ሱላ ኡዬቴሰ» ጊዴሰ።

40

- 1 ቃሴካ ጸሲ ኢዮቤሰ፥
- 2 «ኢዮቤ! ኣሲ ኡባ
 ዳንዳይዛ ጸሳራ ማርሼቲዲ
 ላላና ኔሰ ሚሳቲዜ?
 ታናራ ጸሳራ ማርሼቲዛይ
 ኔና ጊዲዳ ጊሻሰ
 ኣኔ ታሰ ዛራ» ጊዴሰ።

- 3 ኢዮቢ ዛሪዲ፥
- 4 «ጎደ! ታኒ እይኮ ማድንታ
ለፋ አሳ፥
ሃኒፌ ጉዬ ታ ኩሼን
ታ ደና ጎርዳዳ፤
ጮኡ ጉሳፌ አቲን
ኔስ ታ ዛራና ዛሮይ
ታስ ዴና።
- 5 ታኒ ኢሲቶ ጋናይሳ ጋዲስ፤
ጊደ አቲን ታስ
ዛሪዛ ሚሺ ባዋ፤
ሃይሳፌ ጉዬ ኡባካ
ታ ሃሳይኬ» ጊዴስ።
- 6 ሄሳፌ ጉዬ ጎዳይ
ጎቴ ጫርኮ ጊደን ጊዲዲ
ኢዮቤስ ሂዘጊዴስ፥
- 7 «አኔ አዴ ጊዲኮ ዴንዳዳ ጊዴታ፤
ታ እይቺዛይሳ ታስ ዛራ።
- 8 ታና ፒርዳ ጌላሲዛዴ ኬሳዳ
ኔና ጸሎ አስ ኬሳናስ ዳፌታይ?
- 9 ጸሳ ዋልቃ ማላ
ሚኖ ዋልቃይ ኔስ ዲዜ?
ጸሳ ቃላ ጉንፋ ማላ
ኔ ቃላይ ጉማናዉ
ዳንዳይዜ?
- 10 ሄሳ ማላ ጊዲኮ
አኔ ኔ ቦንቸኒኔ
ኔ ጊታቴላን ዴንዳ!
ኔ ቲማቴሊኔ
ጊታቴላ ማይእ።
- 11 ኦቶራንቻታ ቤያዳ ካዉሻ፤
ኔ ሃንቆዛ ኢስታ ቦላ ጉሳ።
- 12 አኔ ሎኤፋ ጸላዳ
ኦቶራንቻታ ኡባ ዬላቻ፤
ኢታ ኦሊዛይታ
ኢስቲ ዲዛሶን ሄን ቆይሳ።
- 13 ኢስታ ኡባ ሞጎ ማይኦን ጸጸዳ
ኢሲ ቦላ ዲፎን ሞጋ።

- 14 ሄሳፌ ጉዬ ኔኒ
ኔ ዋልቃን ጸኒዛይሳ
ታኒ ኔሰ ማርካታና።
- 15 «ታኒ ኔና ሜዲዳይሳሉ
ሆሪቁ ጌቴቲዛ
ዶኣ ሜዲዳይሳ፤
ኢዚካ ቦራ ማላ ማታ ማሰ።
- 16 ኢዛሰ ጸሳን ዲዛ ዋልቃ ቤያ፤
ኢዛሰ ኡሎ ጌዶን ዲዛ
ሻያ ሚኖቴላ ጸላ።
- 17 ኢዛሰ ጎይናይ
ሊባኖሴ ዚጋ ሚላ ማላ
ሰቲ ጌዳይሳ፤
ኢዛሰ ጌዳ ጸጾቲካ
ሚኖኔ ኦርዴታ።
- 18 ኢዛ ሜቄላቲካ ጸርቂማላኔ
ቢራታ ማርፎ ማላ ሚኖታ።
- 19 ታ ሜዲዳ ሜዴታ
ኡባፌ ዋልቃማ፤
ታፔ ኣቲን ኢዛ ጸናናይ
ሃራይ ዴና።
- 20 ዋራ ዶኣቲ ኡባይ ካኢዛ ዙማይ፥
ኢዛሰ ሚዛ ሚሽ ሞኪሴሰ።
- 21 ኩዋይ ዲዛ ሚላ ጋርሳን፥
ማቃ ጌዶኔኔ
ሃላ ዲዛሶ
ጫሬ ጌዶን ኢቼሰ።
- 22 ኩዋይ ዲዛ ሚላቲ
ኢዛ ባንታ ኩዋን ጌንፊቴሰ፤
ሻፋ ዶናን ዲፊዚዛ ሚላቲ
ኢዛ ካሚቴሰ።
- 23 ሻፋ ሃላ ኪጸሰ
ኢዚ ዳጋሚና፤
ዮርዳኖሴ ሻፋይ
ኬሂ ኩሚዲ ጎጊንካ
ኢዚ ያዬና።
- 24 ኢዛ ኣይፌታ ቶይሲዲ
ኢዛ ኦይካና ኣሲ ዲዜ?

ኢዛ ሲጾካ ዳፎን ቃቺዲ
ኢዛ ኦይካናሰ ዳንዳይዛይ ኦኔ?

41

- 1 «ኔኒ ለዋታኔ ጌቴቲዛ
ኦባ ጊደን ዲዛ ዶኦ
ሞሌ ኦይከዛ ማንጸኮን
ኦይካናሰ ዳንዳይ?
ዎይኮ ኢዛ ኢንጸርሳ
ዎዶፎን ቃቻናሰ ዳንዳይ?
- 2 ኢዛ ሲጾዛን ዳፎ አላዳ፥
ዎይኮ ኢዛ ጋጮዛ
ማንጸኮን ጌልላዳ፥
ኦይካናሰ ዳንዳይ?
- 3 ኢዚ፥ «ታና ማራርኪ!» ጌ
ኔና ዋሳኔ?
ዎይኮ ሎኦ ቃላን
ኔና ኦይቻንዴ?
- 4 ኔሰ ሜርናሰ አይሌ ጊዲዲ
ኔሰ ኦላናዉ
ኢዚ ኔሰ ቃላ ጌላኔ?
- 5 አሳራ ሜዜ ካፎ ማላ
ኔ ኢዛ ኔናራ ሜዜሳኔ?
ዎይኮ ኔሰ ማጫ ናይታ
ካሳና ማላ
ኔ ቃቻ ዋላኔ?
- 6 ሞሌ ዛልኣንቻቲ
ኢዛ ሻማናዉ
ሚሻን ማርሼታኔ?
ዎይኮ ቃንጾሬሊዲ
ኢዛ ባንታሰ ጊሼታኔ?
- 7 ኢዛ ጋልባካ ኔ ኮዪዳሶራ
ቶራን ጫዳ ዳካናሰ
ዳንዳይ?
ዎይኮ ኢዛ ሁኤዛ
ሆጾ ሚሻን
ጫዳ ሉካናዉ ዳንዳይ?

- 8 እኔ ኔኒ ኢዛ ዳንዳያና ጊዲኮ
ኩሼን ቦቻ!
ኢዛራ ኔ ባጼቲዳ ባጼ
ዋዴናዉካ ባላካ፤
ናሞኣንሉ ኢዛራ
ኔ ባጼታናሰ ካጃላካ።
- 9 ሌዋታኔ ጌቲቲዛ
ኣባ ጊዶ ዶኣራ ባጼቲዳ
ኢዛ ጾናና ካጃሎሰ
ጳሌይ ዴና።
ኢዛ ቤኢዛ ኡባይ
ባቦን ኮኮሬሰ።
- 10 ኢዛ ቦላ ሜቶ ጋፋና ጉሲ፥
ሄሳ ኬና ዴጾ ጊዲኮ፥
ሂሰቲን ታናራ ኤቁታናሰ
ጸሊዛዴይ ኢዚ ባሰ ኦኔ?
- 11 ሳሎፔ ጋርሳን ዲዛ ሚሺ
ዉሪካ ታሳ፤
ሂሰቲን ታ ኢዛሰ ዛራና ማላ
ታሰ ታልኢዳይ ኦኔ?
- 12 ሌዋታኔ ጌቲቲዛ
ኣባ ዶኣ ጊሻሰ፥
ኢዛ ሚኖ ዋልቃ ጊሻሲኔ
ኢዛሰ ሎኢዛ ቦላ ጊሻሰ፥
ታ ቆንጨሶንታ ኣጊኬ።
- 13 ኦርዴ ጊዲዳ ኢዛ ጋልባ ሾቃናሰ፥
ዋይኮ ኢዛ ባንቁላ ፖቃናሰ
ዳንዳይዛይ ኦኔ?
- 14 ኬሂ ያሺሲዛ ኣቻቲ ዲዛ
ኢዛ ባንቁላታ ፖቃና
ዳንዳይዛይ ኦኔ?
- 15 ኢዛሰ ዘኮ ጋልባይ
ማራራ ኡቲዳ ጎንዳሌታ ማላ፤
ኣዳፌ ሺዲ ኦይኬቲዳይታ።
- 16 ኢሰቲ ኢሶይ ኢሳራ
ሺጲ ጊዳ ጊሻሰ
ኢሰታ ጊዶራ ሃራይ ኣቲን
ጫርኮይካ ኣጴና።

- 17 ኢስቲ ኡባይካ ኢሶይ ኢሳራ
 ኦይኬቲ ኡቲዳ ጊሻሰ
 ኣይ ሚሺካ
 ኢስታ ሻካናዉ ዳንዳዬና።
- 18 ኢዚ ጳሺዛ ዎዴ
 ጸጸልቁ ጊዛ ፖኦይ ቤቴሰ፤
 ኢዛ ኣይፌቲካ ዎንታ ማላዶ
 ኣርሼ ማላ ፖኤቴሰ።
- 19 ኢዛ ዶናፔ ታማ ላጮይ ኬዜሰ፤
 ታማ ፒንጾሊካ
 ላሌቲሼ ቤቴሰ።
- 20 ፔንቲዛ ዲሰቴይ
 ኡቲዳ ጮጮን ዲዛ
 ኣፊራይ ጮዋቲዛ ማላ፤
 ኢዛ ሲዴፔ ጮዋይ
 ኬዚሼ ቤቴሰ።
- 21 ኢዚ ሺዎፒዛ ሺዎፖዛ ሴላይ
 ጸዲንፋ ኦይሴሌሰ፤
 ታማ ላጮይካ ኢዛ ዶናፔ ኬዜሰ።
- 22 ኢዛ ሞርጌን ዎልቃይ
 ኩሚዳ ጊሻሰ
 ኢዛ ሰንፋይ ያሺሴሰ።
- 23 ኢዛ ኣሾይ ዲላኣ ጊዲዳ ጊሻሰ
 ኢዛ ቦላይ ቢራታ ማላ ሚኔሰ።
- 24 ኢዛስ ቲራይ ሹቻ ማላ ሚኖ፤
 ጋጪዛ ዎጸ ማላካ ሚኖ።
- 25 ሃ ዶኣዚ ዳንዲዛ ዎዴ
 ዎልቃማቲ
 ኣቶንታ ባቦን ኮኮሬቴሰ።
- 26 ኣይ ማሻኒኔ ቶራን
 ዎይኮ ዎንዳፌኒኔ
 ጫዲዛዛን
 ኢዛ ኢስቲ ጫዲኮካ ጸኔቴና።
- 27 ኢዚ ቢራታ ማቃ ማላ
 ሚንሴሬሌሰ፤
 ጸርቂማላካ ሙሳ ሚላ ማላ
 ቲፌሬሌሰ።
- 28 ኢዛ ቦላ ዎንዳፌ ጸንጊኮካ

- ኢዚ ያዪዲ ባቃቴና፤
 ያንባርሻ ሹቺካ
 ኢዛ ሲንፋን ኢሺና ማላ።
 29 ኮጾ ማታ ማላ ቆዴሰ፤
 ኣሲ ኢዛ ቦላ ቶራ ጸንጊሺን
 ቂጼ ሚቶ ሚጨሰ።
 30 ኢዛሰ ኡሎ ጋልባ ሃንቻዚ
 ኢዚ ኡርቃ ጊደራ ቢሺን
 ቢታ ማራሻ ማላ ቦኬሰ።
 31 ኣባ ሃፋ ፔንታ ማላ ፖጨሴሰ፤
 ኦቶን ፔንቲዛ
 ዛይቴ ማላ ፖጲሴሰ።
 32 ኢዚ ኣጲ ቢዛ ኦጌይ ፖኢሴሰ፤
 ኣባ ሃፋካ
 ሆሞ ጮፑ ሂሰቴሰ።
 33 ኢዚ ያሽ ኤርንታ ሜጼታ፤
 ቢታ ቦላ ኢዛ ሚሳቲዛ ሜጼታይ
 ሙሌካ ዴና።
 34 ኬሂ ጌታ ጊዲዳ ሜጼታታካ
 ኢዚ ካጼሰ፤
 ኢዚ ዶኣ ኡባ ቦላ ካዎ።»

42

ኢዮቤ ባና ካወሺዴሰ

- 1 ሃይሳፌ ጉዬን ኢዮቤ ጸሓሰ ሂዝጊ ዛሪዴሰ፤
 2 «ታ ጎዳዉ!
 ኔኒ ኡባ ሚሽ ኦፋናሰ
 ዳንዳይዛይሳ ታ ኤራዲሰ፤
 ኔ ቆፋካ
 ጴጲ ዲጋናይ ዴና።
 3 ታ ኤሪዛራ ኬሂ ጉል ጊዲሺን
 ታ ዳሮ ሃሳይዛይሳ
 ኣዛሰ ጊዲዳኮ
 ኔ ኦይቻዳሳ፤
 ቱሙካ ታኒ ኤርንታይሳኔ
 ኣኬኮንታ ኡባ ሃሳያዲሰ።

- 4 ታ ኮይሻ ኤዘጋ ሲያዳ
 ታስ ዛር አማ» ጋዳሳ።
- 5 ታ ሃሮ ጋካናስ ኔ ጊሻስ ኤሪዛይሲ
 ኣሳፔ ሲዮይሳን ጸላ፤
 ሃኢ ጊዲኮ ታ ኣይፊታን
 ታ ኔና ቤያዲሰ።
- 6 ሄሳፌ ዴንዲዲይሳን
 ታ ሃሳይዳ ሚሻቲ
 ታና ዬላቺዳ ጊሻስ
 ቢዲንፋኒኔ ጉዲላን ኡታዳ
 ታ ኔፔ ማሬታና።»

ኩሻ ቆፋ

7 ጸሲ ኢዮቤራ ሃይታንታ ኡባ ሃሳዬቲዳፔ ጉዬ ቲማኔ ዴሬ ኣስ ኤልፋዜስ፡ «ኣንቲ ታ ኣይሌ ኢዮቤ ማላ ታ ጊሻስ ሊኬ ሃሳዮንታ ጊሻስ ታኒ ኔ ቦላኔ ኔ ላጌታ ቦላ ሃንቂታዲሰ።

8 ሄሳ ጊሻስ ሃኢ ላፑን ዋፋናታኔ ላፑን ጳርሾታ ኤኪዲ ታ ኦሳንቻ ኢዮቤኮ ቢቲ። ሄን ኣንቲ ናጋራ ጊሻስ ጸጌቲዛ ያርሾ ሺሺቲ። ታ ኦሳንቻ ኢዮቤ ኣንቲስ ዋሳና፤ ታኒካ ኢዛ ዋሳ ሲያዳ ኣንቲና ኣንቲ ናጋራ ማላ ቃጸይኬ። ኣንቲ ታስ ኢዮቤ ማላ ሎኦ ሚሽ ሃሳይቤኬታ» ጊዴሰ።

9 ሄሳፌ ጉዬ ቲማኔ ዴሬ ኣስ ኤልፋዜይ፡ ሹሃ ዴሬ ኣስ ቤሊዳዲኔ ናኢማኔ ዴሬ ኣስ ዞፋሬይ ቢዲ ጸሲ ኢሰታ ኣዛዚዳ ማላ ኦሊዳ። ጸሲካ ኢዮቤ ዋሳ ሲዬዴሰ።

10 ኢዮቤ ባ ሄዡ ላጌታስ ዋሲዳፔ ጉዬ ጸሲ ኢዚ ዛሪ ዱሬታና ማላ ኦሊዴሰ። ካሴ ኢዛስ ዲዛይሳፌ ኣሊዲ ዳኮ ኢዛስ ኢሚዴሰ።

11 ሄ ዋዴ ኢዮቤ ኢሻቲ፡ ኢዛ ሚቹቲኔ ካሴ ኢዛ ኤሪዛይቲ ኡባይ ኢዛ ቤያናስ ዩዳ። ኢዛራ ኢሲፌ ኢዛሶን ካሐ ሚዳ፤ ኢሰቲ ኢዛስ ሚሹቲዛይሳ ቆንጪሲዲ ጸሲ ኢዛ ቦላ ጋሊዳ ሜቶዛ ጊሻስ ኢዛ ሚንፊሊዳ። ኢሶይ ኢሶይ ቢራፔኔ ዋርቃፌ ኦሴቲዳ ሚዲጋ ኢዛስ ኢሞታ ኢሚዳ።

12 ጸሲ ኢዮቤስ ዉርሴፋ ዴኦዛ ኮይርይሳፌ ኣሊ ኣንጂዴሰ። ሄሳ ጊሻስ ኢዮቤስ 14,000 ዶርሲ፡ 6,000 ጋሜላቲ፡ 1,000 ዋላ ቦራቲ፡ 1,000 ማጫ ሃሬቲ ዴቲስ።

13 ቃሴካ ላፑን ኣቲማ ናይታኔ ሄዡ ማጫ ናይታ ዛሪ ዬሊዴሰ።

14 ማጫ ናይታፔ ኮይሮሮ ዩሚማ፥ ናምኣንሳዮ ቄጺኦ፥ ሄሸንሶዮ ቄሬኔ-ሃፊኮ ጊዲ ሱንሰዲዳ፡፡

15 ቢታ ቦላ ኢዮቤ ማጫ ናይታ ማላ ሜታ ሎኦ ማጫይ ቤቲቤና፡፡ ኢሰታ ኣዋይ ኢሰታስ ኢሰታ ኢሻታራ ቢታ ላታና ማላ ሻኪ ኢሚዳ፡፡

16 ሄሳፌ ጉዬ ኢዮቤ 140 ዳኢዳ፡፡ ባ ናይታ ኦይዳንሶ ዩሌታ ጋካናስ ቤዪዳ፡፡

17 ኢዮቤ ዳሮ ላይሰ ዲዲ ሎኦ ጨማ ጨሚዲ ሃይቂዳ፡፡

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b